

梅讀稿

四明張氏約園開雕

梅讀稿序

梅讀先生姓楊氏諱自懋鄞人也以洪武二十八年乙亥生景泰二年辛未卒春秋五十有七父諱範字九疇世稱栖芸先生潛心理學遠宗慈湖東發近與黃南山李孝謙以道誼相契通易詩書三經爲文操筆立就醇古爾雅生子三先生其長也年十六爲童子師西塾韻語一詩卽十六歲作也聖學之源流傳述之緒統言之歷歷無毫髮差此豈尋常能及哉蓋先生之志固在推所學以覆庇斯民乃官止倉副一攝縣令仕旣齟齬志

梅讀稿序

一四明叢書
約園刊本

不得伸然處事以禮爲主禍福委諸命橫逆至往往自反居困不見有憂色視人之急如己之急而施與弗吝也嘗舉呂氏鄉約故事月一行之其治獄也每求其生而不可得則哀矜之故稱爲楊佛夫以先生之爲人道積厥躬知勉諸己而已天爵之修人爵從之天爵修矣人爵之得不得於先生無與也乃不於其身而於其子孫天道不彰彰哉斯稿十卷自卷一至卷八詩也卷九卷十文也附錄五卷贈言也而神道碑則其子守陟作也子守陳卽鏡川先生謚文懿守陟卽碧川先生斯稿

爲碧川編輯謂之梅讀稿者嘗於梅下翫易云先生詩
文多不留稿此存什一於千百者耳而淵然之光發越
已如此是烏可聽其泯泯乎余先刻文懿碧川二集今
得此更刻之君子之澤遠矣民國三十四年一月後學
張壽鏞序

梅讀稿序

二四明叢書
約圖刊本

奉天承運皇帝敕曰朕惟親之賢者能成其子子之孝者欲顯其親肆國家推恩於臣而必及其親焉所以彰賢而勸孝也亦何閒於存歿哉爾福建泉州府倉副使楊自懲乃翰林院編修守陳之父一命在身行善不怠義方訓子克舉厥官推其本源宜隆褒卹茲特贈爾爲文林郎翰林院編修服所寵恩永賁泉壤

敕命

天順六年五月十七日

之寶

諸敕

一四明叢書
約圖刊本

奉天承運皇帝制曰朝延簡任才能以勵夫爲臣之忠因推恩典以遂夫爲子之孝此激勸之良法亦厚倫重本之道也贈翰林編修楊自懲乃翰林院侍講學士守陳之父學古入官弗究厥施敦德履仁用昌其後嘗囚子貴已受贈恩今子敘陞宜隆褒命茲特加贈爲奉直大夫翰林院侍講學士九原不昧服斯寵光

制誥

成化十五年十一月二十七日

之寶

奉天承運皇帝制曰國家登崇賢俊圖懋治功爵位既厚其躬衰榮必及其父義實通于今昔制不異于存亡爾贈奉直大夫翰林院侍講學士楊白懲乃南京吏部右侍郎守阯之父博涉經書惇行孝弟奮自儒彥辟于有司官資不滿其平生義訓遂成乎二子後先相望佐銓部于兩京存沒攸同進恩封於三品茲特加贈爲通議大夫南京吏部右侍郎匪徒爲隴隴之光亦以紆風木之感

制誥

誥敕

二四明藏書
樂圖刊本

弘治十二年三月二十五日

之寶

贈翰林院侍講學士梅讀先生像贊

先生孝友忠信通經學古爲高材大而匠斲小之甚爲
大聖所試之委吏職料量兆行而不幸及之閱三十年
以子贈禮部尙書守陳貴贈翰林院侍講學士又十年
尙書弟翰林院侍講學士守陟徵爲贊乃再拜謹爲贊
曰

此梅讀先生像也德行道藝道本諸身生丁盛明景運
昌辰宜逸駕還轍瞻諸後絕塵知病已不行已病不愠
人不知病人恐年紀之易耆艾喜祿入之得逮親兆亦

梅讀先生

像贊

四明叢書
約園刊本

既已足行蠖胡不之求伸悵伯樂之不終逢聖竟致掩
泣祥麟庸詎知培厚而達達必盛蓄深而流流必遠信
人定之亦勝天矧天道寔好旋返鳳鳥至而鳴岐趾定
振振有衍賢俊登庸三場首選旣綸閣清華亦君臣蹇
蹇重體羣臣禮使恩偏鸞回鳳翥紫誥芟芟大哉帝訓
君言地光澤漏重泉親德莫報罔極子心莫罄埃涓惟
仁覆閔下惟堯則之惟蕩蕩難名皇仁其天南京大理
寺卿致其事仁和夏時正再拜書

梅讀楊先生存稿敘

翰林學士鄞城楊公維新奉其先府君梅讀先生遺文手澤見示公之言有曰先子夙承先祖棲芸先生之教傳四聖之經工文詞尤長於詩所作爲多稿多不錄其存僅此焉耳寔家世之至寶也願序之俾子若孫世知寶焉又曰先子早以敏瞻稱德履純備而材器倜儻其如試竟屈於場屋官止倉曹而年不登下壽哀哉先子平生唯吾子其知之深非子其誰白之時正淺薄甚曷克承此雅厚正統中舉進士寓京師明時坊獲與先生

梅讀存稿

序

一四明叢書

約園刊本

旅邸接鄰日過逢其賢父子閒披觀扣應教迪良多愧以淺薄雖無以自附於高明亦焉能自嫌自外諉謂不盡知哉三十年來先生九原不作而典刑斯在眷懷今茲惻惻盈襟尙忍序先生遺文乎唯先生之平生未易言其知明持堅則於學士公所言得斯實錄而於管蠡鑿鑿乎少槩云矣此編皆五七言近體古風皆清婉和平雖不爲嶄絕隱奧而淵然之光自不可狎翫字以屬稿曾如不經意者皆清逸可喜自非積之厚而得之深能然乎宜學士公寶重之欲傳之子子孫孫永永也夫

子孫之於父祖尊之當如天敬之當如天於其衣冠杖履琴瑟書策以至涕唾之所犬馬之賤無所不致其敬況遺文手澤乎況既歿而存什一於千百乎存什一於千百寡矣岷山片玉所寶豈在多歟於戲先生之文之字無非可寶之玉君子比德於玉玉其爲德宜珪璋宜瑚璉追琢其章而薦登宗廟顧乃橫棄道左不辰其得然歟然而君子於出與處與其自虧以得則無寒被褐而懷光雖不珪璋不瑚璉而可以珪璋瑚璉者固在果孰得失輕重之哉唯內之重者外自輕禮其門而義

梅讀奇稿序

二四明叢書

約園刊本

其路時乎有所爲焉故寧位卑祿薄擇其職之易稱者居以全吾寶故至今猶存其無恙也種之藍田歲得璧雙日浴其象於池衆寶出焉昆玉後先發解第一纘武魁經聯輝竝曜亦旣握瑤琯而擅玉堂歸視其庭瑤芝玉樹森列也先生之所委瑞不旣多乎唯有德者必有言先祖是善知者在所當知遺文手澤不亦心畫心畫德行英華之外發歟先生遺文手澤之存先生德行之存知寶遺文手澤有不平生德行之是寶乎楊氏賢子若孫尚慎之哉匪我言耄乃學士公孝思維則之訓也

是爲序弘治十一年乙未夏六之望南京大理寺卿致
仕仁和夏時正拜手自書

梅讀存稿

序

三四四
約園刊本

梅讀先生存稿序

翰林學士鄞城楊公維新以其尊府公梅讀先生遺文墨稿見示時正旣受而讀之而學士公言曰先子夙承先祖棲芸先生之教傳四聖之經工文詞平生所作雖多惟是手澤之存謹此稿耳此家世之至寶也幸序之俾子若孫世世知所寶焉又曰先子學敏贍而竟屈於場屋材器倜儻而位止於倉曹德行純備而年不登下壽哀哉惟先子平生惟吾子其知之深非子其誰白之時正淺薄甚曷承雅命重念正統間舉進士京師日獲

梅讀稿序

一四明叢書
約園刊本

侍先生明時坊寓邸披觀扣應教迪良多三十年來先生九京不作典刑猶在懷念今昔惻惻盈襟尙忍敘先生遺文手澤也耶然來命不可虛辱也乃言曰先生之平生未易言於此亦可少槩之矣文辭皆清婉和平不爲嶄絕隱奧而淵然之光自不可狎玩字以屬藁曾不經意而皆清逸可喜是非有德者不能是宜學士公寶重之志傳子孫永永也夫子孫之於其父祖尊之當如天敬之當如天惟尊之故敬之故於其所用衣冠杖屨琴瑟書策以至涕唾之微犬馬之賤無所不致其敬焉

況遺文乎況手澤乎文爲心聲之華字爲心畫之妙況
既沒存什一於千百乎存十一於千百寡矣然崑山片
玉所瑤豈在多歟於戲先生之文之字片玉矣君子比
德於玉先生其玉爲德也必溫潤栗然必孚尹旁達已
顧迺韞匱而藏被褐懷光宜瑚璉而無所於釋不珪璋
而追琢其章遂爾橫棄道傍也彼自衒而售吾無能自
亂得別者何多苦先生之玉雖不珪璋瑚璉而其所以
珪璋瑚璉固自若夫何得無取舍重輕之乎惟重其內
故輕其外其進以禮其退以義不以其道也富貴則不

梅讀稿序

一四明叢書

約園刊本

處貧賤則不去故寧屈其職之易稱者以終身而先生
之玉固無恙而至今其猶在也昔有種之藍田歲得璧
寶有池口浴衆寶出焉發解第一昆玉後先踵武魁經
而騰矐賢科聯翩接袂亦旣握瑤琯而擅玉堂矣歸視
其庭皆德環玉樹也先生委瑞後人不旣多乎夫有懷
有言尙友者誦其詩讀其書欲知其人況爲之子若孫
乎楊氏賢子若孫珍藏而世寶之其河圖其天球以無
忘學士公圖惟永傳之孝哉是爲序成化十一年乙未
夏六之望南京大理寺卿致仕仁和夏時正拜手自書

此序夏公初稿先刻以寄公公爲更定以復今已刻
于卷首二序皆公親書初稿十年所書尤精今公既
沒先友盡矣覽其詞翰尙有典刑不敢以重複去之
移置卷末亦可參玩其用意所在云守趾謹識

梅讀稿序

三四明叢書
約園刊本

梅讀先生存藁目錄

卷一

西塾韻語

喜復故宅

過和嘉阜定墓穴

次聞篋國雍韻

畫錦堂

贈鳳亭鄉康先生

夜泊西渡

夜泊西陵阻雪

西興除夜

元旦用前韻

混堂

上吳山

錢塘歸興

送糧長姪森

梅讀稿

目錄

四明叢書
約圖刊本

竹隱堂

題扇面

將橋八詠

洞僊古橋

風伯舊祠

曲江書屋

玉泉義井

積瀆飛濤

古渡靈湫

戚浦魚燈

光溪酒市

畊讀

次王士原寫懷韻

遺安堂

和人韻送糧長

偶興

送別次人韻

畊讀

摺扇

題畫葡萄

題扇面景物

題牛畫

僧舍畫梅

卷二

應舉述懷

失解將還阻雨遣興

雨夜書愁次友人韻

上吳山

伍子胥廟

途中偶成

途中遇雨

端午感興

歸興

遣僕回家

摺扇

題扇面

梅讀稿

目錄

二四明叢書

約園刊本

次韻答聞國雍

客舍病中自和

春雪

遣悶

夢王仁兄

賀鄉貢士趙政

送別

賀杜頤端六十得子

春雨述懷次張琳兄韻

和鄭太守訪黃太守韻

送黃太守復任二十六韻

次韻答傅應熊

送張琳兄歸田

次韻答徐宗吉文

蘭室徐宗吉原韻

遊天童育王寺

梅竹圖爲呂亨元賦

和張琳兄四思詩 行思 坐思 眠思 夢思

題李御史澗海觀風卷

和張琳兄韻 和卞振舍韻 思養堂

卷三

元宵 森碧軒

營屋有感 名子志喜

奉和父親秋日閑居韻

栖霞先生原韻 白燕

梅讀稿

目錄

三

四明叢書
續編刊本

琴堂清畫

卞振舍和予客舍病中韻復和答之

酬璉上人次韻 次韻答李昂先生

朝陽軒 除夜雷雨

惜別 同題男守陳作

與姪守陶 次呂善長送行韻

留別陳先生 寄張琳兄次韻

次錢塘寄姪守陶 途中寄友

舟中遣悶 途中卽景述懷

思遠樓

題王氏家譜

壽萱

送致仕官

題扇面

畫竹

題四季翎毛

山水畫

畫梅

扇面臘梅

寄張鑑兄

卷四

自此以下爲
北遊寓興

父親生日

觀萱有感

寄朱周二姓親契

寄櫟陽李宅諸親

梅讀稿

目錄

四四明叢書

寄張三舅

約園刊本

北京八景寓興送林公子廷舉回廣東鄉試

居庸疊翠

玉泉垂虹

瓊島春雲

西山霽雪

太液晴波

薊門煙樹

蘆溝曉月

金臺夕照

奉和父親嚴韻

栖芸先生原韻

母親誕日

送林郎中往四川審刑

京闈失解遣懷

奉和父親嚴韻

栖芸先生原韻

示男守陳

男守陳奉答

南山歌一百韻

秋闈四勝爲林貢士廷舉賦

棘闈角藝

薇省題名

鹿鳴禮宴

畫鷁榮歸

謝秋官林公惠物物各一首

花椒 兔筆 羅帕 印璞 葛巾 川芎

摺扇

贈林進士廷舉 望雲

和林進士廷舉秋興八首韻

梅讀稿

目錄

五四明叢書

約園刊本

百丈寺

碧雲塢

送友人歸鄉

春日思親

喜勉之攜守陳復至

寓清軒

送縣令復任

張繡衣母挽詩

卷五

送歲貢生入南監

送縣令之任

送陳繡衣按閩

甲子京闈又失解

病後感懷

男守陳奉和

病後感懷示一二知己

分題送趙原政歸嘉興

毘陵思賢

吳門訪舊

拙齋

望松軒

寄章主事尙素

送韓繡衣永熙巡河路

古城八景

鯉湖春瀾

龍塘晴靄

彭城松風

余林桂月

社陵樵奕

前潭釣瑣

人田寶稼

竹屋書燈

甲子臘月十三日大雪題都憲幕壁

梅讀稿

目錄

六四明叢書

新刻本

乙丑三月父親誕日

和秋官林公分書田詩

送秋官林公陞山西右參政

送林廷暉廷準侍父往山西

同題守陳作

七賢過關

上工部侍郎李公蕢二十韻

贈徐中書瑛

贈凌先生宗政

送林廷臯往山西省父

同題守陳作

驄馬南巡

挽戶部李亞卿

遺興

男守陳奉和

挽章母

雙節堂

送本府閩貳守芳之任

同題守陳作

奉答父親寄示詩韻

除夜

男守陳奉和

卷六

早朝

給假後喜家書到

朱瑩昆季以子歸有日邀子兄弟到南郭園亭酌

別酒酣遂寫以贈 積慶堂

潞河曉發

男守陳奉和

梅讀稿

目錄

七

四明叢書
總圖刊本

舟中端午

男守陳奉和

歸家

郊行

寄繡衣林廷舉

寄林廷臯

記年

寄友人

花香竹影

卽景

曉發西壩

晚次梁湖

弟自恣和

到西興

過錢塘江

到皂林

弟自念奉答

次蘇州

泊楓橋

到橫林

到孟濱河口次日過揚子江

到揚州

高郵湖口

寶應驛前

淮安羅家溝

三义河

到古城

皂河至邳州

至新安驛

過呂梁洪

過沛縣

至穀亭閘

到新安閘水勢危險阻而不進

梅讀稿

目錄

八四册叢書

約圖刊本

自恣和

至濟寧閘

至草橋

至分水閘

經張秋口泊東昌

曉發東昌晚到臨清

阻風臨清閘下

到德州

泊青縣曉雨

到直沽

直沽哭季叔父

到楊村

河西務行至高店阻風

到和合店阻風

到攬登車入城

送戴太守浩之永州府

挽兵部李侍郎賁

送李聰扶父侍郎襁歸壙

憶友人

贈致仕官

中秋後有感

詠史集古句二十首

卷七

元旦試筆

赴官泉州途中寓興

出京馬上偶成 潞河發棹 蔡村阻風

直沽有感 到德州 滄洲懷仙 發磚河驛

至安陵 過武城 到魏家灣 開河見魚

趙村闢土 泊谷亭聞 景山

呂梁洪下 泊河坊淺遇雷雨

梅讀稿

目錄

九四明叢書

約園刊本

白洋河 過三叉河 到淮安

曉發白馬湖 泊丹徒 過揚子江

到毗陵 楓橋別張尙溫

泊師姑橋

正統十四年二月手栽香梓於門前景泰改元四

月十一回家已喜長茂

武陵別守陳

自此以下爲南遊寓興

范村接潮

釣臺懷古

男守阯奉和

大洋曉發

男守陞奉和

張埠夜雨

楊村晚晴

蘭溪水磨

夔州水碓

清湖客房

蒙嶺曉行

甘嶺夜宿

界首書懷

男守陞奉和

梨關寫景

南浦行舟

蔡墩遠眺

平洲登高

小湖觀瀾

建寧玩月

蒙洲人家

延平路次

梅讀稿

目錄

十四明葉書

約園刊本

過水口驛

到福州城

男守陞奉和

大義曉發

酒頭野市

宿楓亭驛

過萬安橋

卷八

到任上泉州府金同知

上泉州衛王指揮

新婦歎

喜守陳中解元

守陞次韻寄解元兄

守陞次韻寄兄

上范布政大人

上參政吳大人

送人入京

歲除偶成

自恣奉和

辛未正旦偶題

得男守陳庶吉士書 守陞次韻寄吉士兄

守陞次韻同寄 賀王三舍賢相

送行詩以天高一鴈遠海闊孤帆遲分韻起句

祈雨有應十四韻上李僉憲

喜雨詩上泉州府金同知

送莊給事赴雷州太守

梅讀稿

目錄

十二四明叢書

約園刊本

同臧希玉先生往永春途中寓興

攝德化縣 守陞奉和四首

寓德化縣布政分司偶成

文苑清玩詩

蟹菜菜 騎牛過水

蘭陽四景詩

臺花四季 十月牡丹 雙頭瑞蓮

方塘魚樂

龜峯八景詩

石筍文筆

書樓聽鶴

東野古榕

龍坂鹽埕

山寺晚鐘

馬塘秋水

漁村夕照

海門秋霽

送劉茂才歲貢之京

卷九

曲江書屋記

賀應孟春冠帶序

送范貳尹之黃陂序

祭外母文代作

送翁鼎錢歸鄞序

祭守陶姪

卷十

梅譜稿

目錄

十二四明叢書

約園刊本

送黃原吉之京序

送龍岩盧先生守制序

送張君省兄歸鄉序

送泉州府王經歷考滿序

送倉副何君考滿序

文苑清玩序

龍江釣隱序

附錄卷一

梅邊讀易記

梅邊讀易詩十二首

敬梅軒記

敬梅軒賦

敬梅軒詩六首

卷二

歲除高詠卷序

和除夜詩四十三首

跋梅讀先生遺卷

卷三

贈遺詩文

詩五首

書二首

林氏分書日記

送楊先生歸省序

對鷗閣賦

慶榮壽賦

卷四

幽光集序

故泉州司倉楊君行狀

梅讀稿

目錄

十三四明叢書

約園刊本

故泉州司倉楊君墓誌銘

楊司倉哀辭

輓詩四十五首

卷五

勅封楊太孺人行狀

贈翰林院編修楊公夫人張氏墓誌銘

輓詩十五首

題跋一首

神道碑一通

目錄終

先大夫梅讀存稿目錄序

梅讀存稿古今詩八卷雜文二卷先大夫贈侍郎梅
讀府君之所作也其孤守陞編次成集而以府君所
蒙三朝誥勅冠于首簡次像贊次序而詩文次之附
錄五卷系于後總爲目錄一卷而守陞涕泣言曰府
君沒世今四十二年矣平生詩文多不留稿幸存什
一於千百僅此耳然多紀行應世之作其崇論鉉議
高文大篇已雲散烏沒不可復得嗚呼惜哉府君承
先祖贈侍郎柄芸先生之教聞道甚早年十六爲人
師作西塾韻語十一章慨然有希賢希聖之志謂治

梅讀稿

目錄

十四四明叢書

約園刊本

經莫先於易羲文周孔四聖之精蘊在焉以程邵朱
之說爲入門潛心力學無閒寒暑晨夜取唐人詩起
傍梅花讀周易之句因號梅讀其後一門易學屢魁
多士實肇于此府君宣德閒以易應鄉舉與同邑趙
公敏俱有聲場屋時有司辟知名士掌書記府君與
趙俱見辟辭避不獲已趙後舉于鄉爲國子學正府
君再舉京闈不偶竟授泉州府倉副使歎曰治經學
道將以行之也不意命之奇一至此乎旣而曰孔子
猶爲乘田委吏況吾二親尙存敢擇祿耶居官舉職

常有餘裕監司才之檄攝德化縣事縣在萬山中瘴鄉仕者憚往府君曰吾常恨不得一郡一邑以施吾經世安民之道此獨不可爲之兆乎有被檄帥永春縣民兵討鄧賊餘孽人尤難之府君曰吾常恨不得一障乘之以施吾禁暴戢兵之策此豈不可以少試之乎府君往來二邑撫創殘之民平反側之寇保之如赤子擾之如龍蛇卒致民安而寇弭四境寧謐受代之日二邑吏民感泣攀送相屬于道不可勝計既還泉州監司御史交口嘉獎欲連章薦拔之不幸至

梅讀稿

目錄

士四明叢書

約園刊本

于大故矣嗚呼痛哉府君仕旣齟齬志不得伸道不得行獨其詩文可傳於世而又多亡逸其僅存者固不可使之泯泯也且其交游皆一時賢俊唱和詩文若梅邊讀易歲除高詠與夫贈遺諸作氏名具在而都憲張公大理夏公大參林公相知尤深所作尤盛可以考見其麗澤淵源所漸亦有後賢晚進聞風而踵作者皆不可遺也故今集爲附錄府君沒世十年以先兄文懿公推恩贈編修又十六年贈侍講學士又二十年以守陞推恩贈侍郎誥勅已大書于集首

先夫人實從其爵具見恩命世載錄而此不書以不
繫於集也若名卿才大夫士撰述府君與夫人之事
實著於詩文者皆附錄之而守陞所作神道碑亦附
于末蓋以表見府君之道雖不得大行于世然其脩
於身見於言施於事刑于其家者皆可傳也遂爲刻
本以永其傳而敘其所以若此言不能文強顏披淚
書之以詔來裔云爾弘治十八年五月十一日男通
議大夫南京吏部左侍郎奉敕加正二品俸守陞謹
序

梅讀先生存稿卷一

贈翰林侍講學士四明楊自懲復之

永樂八年庚寅爲里塾師時所作

西塾韻語

仲尼固天縱義理由生知十五志于學十七爲人師不厭亦不倦旣聖猶不居所以木鐸音萬古開羣迷回也非助我商也能起予聖人於二子豈眞有望之搆謙迺如此何況常人爲教學有相長斯言良不虛

仲尼素王道顏子王佐才由可使治賦求可使理財赤

梅讀稿

卷一

四明叢書
約園刊本

用典禮樂賜爲使往來夫子得邦家庶事其康哉

孟軻生戰國迺願學孔子舉世尙從衡獨談堯舜理齊

卿十萬祿棄之如敝屣退與萬章徒作書繼論語

仲舒下帷讀三年不窺園弟子或莫見以次相授傳天

人二三策正誼明道言劉向稱匪過歆言豈爲然

河汾隱君子十五爲人師先達有傲者白首北面之太

平十二策進不用於隋旣退續經書高名至今垂

退之作師說抗顏師一世藉湜與習之曾不稱門弟指

教與從遊實兼師友義所以唐文章數子殊超詣

洙泗源已遠濂洛沂其流關閩亦同波敦澤覃九州洛
黨一以禁僞學仍見仇宋轍訖南狩誰復興東周

吾鄉高憲敏

高侍郎

始受伊洛傳舒公

舒文靖

友朱陸而迺

師南軒陸學寢以盛達者楊沈袁

楊文元簡沈端憲煥袁正憲

文潔

與果齋

黃文潔震史果齋蒙卿

獨宗晦庵言

吾鄉盛陸學朱學宗者希吾父棲芸翁私淑何常師德
性與學問尊道兩不遺卓然聳山斗後學咸歸依

吾鄉素文獻吾家本詩禮今我不力學汨沒良可恥我
車既膏兮我馬亦秣只鞭策敢怠違先民有遐軌

梅讀稀

卷二

二四明叢書

約圖刊本

我今年十六趨庭方學詩童蒙乃求我我豈好爲師學
焉知不足教焉困乃知自反仍自疆古人以爲期

永樂閒自葑里別業復楓江故宅以後所作

喜復故宅

家難久流離歸來喜可知楓江鷗落處桃浦燕來時堂
室徒懸磬田園但卓錫重闈總無恙百事不須疑

過和嘉阜定墓穴

先業惟留此常時氣鬱蔥春來花獨盛冬到雪偏融一
穴今初定三占昨已同但期千載久寧望世爲公

袁安墓地

世爲三公

次聞篋國雍韻

南窗寄傲若無鄰，獨喜才郎向我親。
興逸總憐賡唱美，情深不厭往來頻。

九重城闕煙花曉，萬里山河錦繡春。
便欲相攜壯遊覽，未應長是一鄉人。

畫錦堂

爲鳳亭鄉
郎參政賦

昔年曾佐紫薇堂，謝事歸來鬢已蒼。
金荔橫腰春正永，錦葵被體日爭光。
夸鄉伯業輕西楚，垂世功名重武康。

梅讀稿

卷一

三四明叢書

約園刊本

四壁淋漓多翰墨，高文誰可敵歐陽。

贈鳳亭鄉康先生

隔窗聽得讀書聲，欲見斯文歎未能。
聖閭如天思徑造，侯門似海喜容登。
高齋繩爽詩懷迥，小酌更深酒量增。
壯志共談經濟略，雲梯月殿約同升。

夜泊西渡

曙雞三唱別親庭，船過西津第一程。
萬里澄江如練淨，半篷斜月當燈明。
梅花開遍添行色，竹葉傾殘壯客情。
回首郡城猶未遠，便風時送夜鐘聲。

夜泊西陵阻雪

客船暫泊淞江頭六出花飛攬我愁好似韓公秦嶺馬
爭如王子剡溪舟清光璀璨搖銀海寒粟粼皴起玉樓
漫說党家金帳裏淺斟低唱百無憂

西興除夜

一年三百有六旬今宵冬盡喜逢春鄉儻隨俗言辭別
歲籥更新造化均綠蟻滿壺須盡醉青蚨在篋未爲貧
誰云客裏多岑寂連艦歡呼總故人

元旦用前韻

梅讀稿

卷一

四四明叢書

約園刊本

憶自離家已越旬忽驚今日是新春一城花柳寒猶滯
萬里乾坤暖未勻無藥可醫心內癖有詩難濟客中貧
懸知兄弟親庭下拜壽稱觴少一人

混堂

陶坏結甃是團圓別是人閒一洞天困顛朝朝凝溼氣
石池日日湧溫泉漆園謾詫忘形客萍水相逢脫殼仙
安識暮春沂水上幾人風詠舞雩前

上吳山

一上胥山俗慮消好風吹送不知勞仰瞻象緯天將近

俯瞰江湖地漸高
金碧樓臺時整飭
綺羅人騎日遊遨
錢塘自古繁華地
對景哦詩興甚豪

錢塘歸陣

公事纔竣別異鄉
月生潮長便登航
客容舊比梅花瘦
歸興今先柳絮狂
千里江山歸畫軸
滿懷風月入詩囊
衡門童稚應相候
笑指春釭酒正癡

送糧長姪森

吾族慣膺徭今推爾富饒徵完一鄉稅去趁百官朝棹
向龍灣泊鄉臨鳳闕飄拜聽宣諭罷歸路趁春潮

梅讀稿

卷一

五四明讀書

約園刊本

竹隱堂

一丘高臥愜幽情
爲有亭亭竹數莖
月滿階除金鎖碎
風生庭院玉鏘鳴
七賢林下應同趣
六一溪中且避名
只恐孫枝出牆去
伶倫截取作蕭笙

題扇面

雲白山逾白
身閒興愈賒
榮枯都不校
獨坐占鷗沙

將橋八詠

百尺徒杠誇大川
金堤玉址幾千年
方言謾自稱黃將
石刻由來號洞僊
虹偃長流人往復
月明華表鶴臨蹊

我生亦有相如志，驅馬行看向此旋。右洞僊古橋。

一區廟宇在河洲，四面青蘋水亂流。郊祀已闕供樵爨，
村氓猶自享春秋。新碑翻訟昌黎伯，舊號相傳寧順侯。
最是年豐入報祀，滿江鼉鼓駕龍舟。右風伯舊祠。

清江一曲抱幽居，隔岸青山畫不如。彷彿張公封爵地，
分明楊子讀書廬。吟憑水檻盟鷗鳥，坐對芸窗剔蠹魚。
爲語彬彬諸子弟，相從於此惜三餘。右曲江書屋。

玉泉堂裏玉泉寒，爇石鄰鄰碧蘚攢。三伏行人無患渴，
一源活水不曾乾。味甘農舍炊雲子，香沁詩脾煮月團。

梅讀稿

卷一

六四明叢書

約園刊本

欄口氣如虹，隱見此中疑。有白龍蟠。右玉泉義井。

水門橫截築長虹，啓閉隨時利七鄉。潦水趨江飛急瀨，
奔潮入港響鳴瀧。聲吟鼉扇秋尤壯，勢走鯨鯢夜更狂。

彷彿巴陵三峽在，幾回驚夢聽淙淙。右積瀆飛濤。

小溪港口水交馳，靈物蜿蜒蟄在茲。萬頃波濤常擁護，
半空雲霧自低垂。欲知天意爲霖處，先覩神光射斗時。
咫尺銅盆該祀典，此中亦擬建靈祠。右古渡靈湫。

網罟纔收舟已橫，短篷低敝見熒熒。寒光遙警棲沙鴈，
清影微明照水螢。兩岸蘆花外，破白一汀煙浪點。開青。

滄浪歌罷俄吹滅寧識韓蔡對聖經 右戚浦漁燈
風外帘旗青閒紅糟房臨水勝新豐舊筠竹葉香偏華
新釀桃花色更紅樓上不逢騎鶴客船頭頻醉換魚翁
寒儒未有金貂解清聖賒來時一中 右光溪酒市

畊讀

君子當未遇安居守田廬安居豈素食既畊時讀書潛
心篤經訓委力躬當畬鳩催雨膏沃帶經荷犁鋤解愠
誦南薰羹稗仍芟除築場伺秋登簡編恆卷舒素絢旣
乘屋倦倦惜居諸謀道復謀食心力誠勤渠嗟哉唐董
生處此垂名譽伊尹起有莘阿衡輔商儲吾今畊且讀
出處知何如將爲伊尹歟將爲董生歟

次王士原寫懷韻

吉凶消長每相隨命稟初生詎可違蟲蠖屈伸應有義
龍蛇舊蟄且無時閒看世態趨炎熱莫與常情較是非
且樂絃歌忘外慕儻來軒冕敢前期

遺安堂

世人徇名利馮河蹈虎尾賢哉三槐孫以安遺來嗣舍
彼闌闔居擇此枌榆里堂廡旣落成輪奐固翬美畊鋤

正疆場收穫富糜芑妻子靡咨嗟童僕盡欣喜遯肥鮮
交游居易樂生理榮辱不關情毀譽那入耳處心平如
衡履道坦如砥千龐德公君能踵其趾門不雜塵空身
不入城市以茲垂後昆繩繩未云已

和人韻送糧長

春入河堤柳色黃半篙新水碧生香交情欲盡雙瓶酒
別意惟因萬斛糧銅浦帆開風正順錢塘客到日初長
微垣若怪催科拙爲說民饑待發倉

偶興

梅讀稿

卷一

八四明叢書

約園刊本

檢束身心不外求飄然應世一虛舟執鞭求富誠爲恥
被褐居貧亦寡尤草不藉榮於二月木寧怨落在三秋
區區人爵何須問惟日孳孳天爵修

送別次人韻

牙樁錦纜木蘭舟才子乘舊作勝遊江燕迎颿飛復下
沙鷗驚棹去還留青山綠水從行賞紫館紅樓真爲謀
屈指歸期何日是一尊更待話綢繆

畊讀

豹隱南山欲澤衣士當未遇復何爲勤勞稼穡心無逸

涵泳詩書慎務滋庭雪映殘修錢鎮隴雲翠破事吾伊
平生有志希伊尹堯舜君民敢自期

摺扇

舒卷無心自有機每當酷熱動涼颺烏犀骨酪磨難磷
白玉肌膚涅不緇達處則行窮則止用時無肆舍無卑
寒暄來往尋常事肯學齊紈歎別離

題畫葡萄

鮫人夜泣月明中灑下珠璣綴艸龍還憶酒闌曾摘取
水晶滿把弄秋風

梅讀稿

卷一

九

四明叢書
約園刊本

題扇面景物

山中茅屋戶常扁獨占鷗沙遠世情滿目江山唵不盡
襟懷容得許多清

放浪形骸不繫舟白雲流水共悠悠洞簫聲起寒蘆畔
吹徹江山一片秋

題牛畫

脫將童牯散無拘來往何勞塵尾驅牧豎肯將書掛角
絕勝藉艸弄禽雛

農餘童犢兩優閒吹竹橫騎任往還自是太平風月調

豈知叩角唱南山

僧舍畫梅

華發占先春清高不染塵大梅梅熟後三昧妙傳真

梅讀稿

卷一

十

四明叢書
納園刊本

梅讀先生存稿卷一

梅讀先生存稿卷二

贈翰林侍講學士四明楊自慤

宣德閒應鄉舉以後所作

應舉述懷

自少罹家難辛勤幸有家正宜鋤秀艸強要踏槐花白
屋門將大青雲路不賒猶嫌干祿晚親髻已將華

失解將還阻雨遣興

風雨秋將晚歸心更鬱紆楚人勞獻玉齊主好吹竽客
館留譚笑親庭待拜趨桂芳還有日回首莫嗟吁

梅讀稿

卷二

四明叢書

初刻本

雨夜書愁次友人韻

黃昏風雨送鐘聲坐對寒燈睡不成曲藝有鍼能補衮
窮山無路可登瀛兒齡尙幼憑誰撫親壽將衰每自驚
竟夕幾迴成永歎何當忠孝兩全情

五更睡覺雨敲窗推枕遲徊懶下牀有酒不銷心上悶
無錢難療眼前瘡十年往事都成夢萬里脩程未促裝
拂曙開簾聊自遣高堂化日喜舒長

上吳山

吳山巔上重遊遊景物繁華古帝州東望江波三設險

西看湖水墜涵秋上方梵宇丹青迥下界人家紫翠浮
閭闔舉頭疑不遠風雲未遇與悠悠

伍子胥廟

憶昔姑蘇麋鹿遊夫差瞋冒爲誰羞錢唐江上潮聲惡
知是將軍怒未休

途中偶成

勞生塵務苦相羈跋涉艱難只自知望斷白雲心轉苦
經行碧嶂足生胝尺書到處憑人寄囊米隨時仗僕炊
自古聖賢多涉難樂天安命復何疑

梅讀稿

卷二

二四明叢書

約園刊本

途中遇雨

夏初爲客近霞城無奈紛紛雨乍零泥滑怕逢高下路
身勞頻憩短長亭山田得水秧初插巖壑多風樹不停
堂上雙親凝竚久何當晴霽早歸寧

端午感興

三歷端陽不奉親今年僑寓倍傷神囊金欲盡思歸切
詩卷常增感興頻漫有紅醅隨俗醉竟無角黍薦時新
半生勞苦成何事深谷榴花笑煞人

歸興

客舍霞城一月餘拂衣今喜詠歸與愁懷總藉雙瓶酒
行李惟存一束書溽暑蒸人梅雨歇香風拂袖稻花初
登山涉水多深險善保遺軀到故廬

遣僕回家

身居逆旅若羈棲遙想雙親泪暗垂一紙平安先走報
回期只在月圓時

摺扇

雪膚裁繭楮風骨削琅玕舒卷疑鵬翼參差訝鳳翰片
雲生素影半月散清寒他日涼颺至恩情也未殫

梅讀稿

卷二

三四明讀書

約園刊本

題扇面

放舟散步入松陰三尺絲桐足洗心流水高山向誰奏
知音只在白雲深

宣德末辟掌書記以後所作

次韻答閩國雍

建水清漣漪芝山邈高卓中有肥遯人挺若雞羣鶴結
髮慕前賢橫經授來學文章綺繡如咳唾珠璣若持心
冽冰霜味道甘酥酪筆翰快龍蛇胸襟飽經略霧豹正
韜藏雲鵬未騰躍扶搖萬里程未可俄而度嗟予鮮才

能生長由村落朝出事農功夕歸坐書幕夏夜每囊螢
秋風期薦鶻科名未有成辟命何其迫干木苦踰垣子
雲欲投閣亡命逮友于名韜竟難脫平生金石交居然
歎離索忽承雲緘來熹翫盈把握得非滄海珍信是荆
山璞慰謝感情深廣酬愧才薄願言各勉旃厚積終必
發人爵豈他求努力修天爵

客舍病中

雨窗病臥歎羈棲欲奏長楊事已非老過四旬渾不遇
荒殘三徑未能歸青雲宦業成虛慕白髮親顏奈久違
愁悶轉深扶起坐忽驚西日到幽扉

自和

驂駟遠騁鳳高棲奈我于今出處非太守漫奇王子敬
功曹誰重尹翁歸業勤經史從人笑分守齷齪與世違
常想拂衣歸隱處閒雲流水舊柴扉

春雪

四野闕春紅瑤花樹樹同風寒飄更起地暖落還融親
舍滄茫外官曹晝靄中公餘且歡笑不放酒盃空

遣悶

梅讀稿

卷二

四四明叢書
新圖刊本

客窗春暖燕飛飛，羈思無聊雅志違。
故里江山徒密邇，上林花柳自芳菲。
盤珠豈料沉沙礫，坂馬何由脫馬鞵。
公退且欣家釀熟，一壺留客醉斜暉。

夢王仁兄

與君少長共嬉戲，四十年來一故知。
自擬天倫情不減，誰知世網苦相維。
棘林夜哭人何在，桃浦春歸鳥亦悲。
夢裏分明訴懷抱，曙鐘驚散淚雙垂。

賀鄉貢士趙政

鶚薦秋闈正妙齡，天香滿袖拜親庭。
一時多士風雲會，三試文章月露形。
虎榜高懸標姓字，重門竝立煥丹青。
光溪從此增光采，盡使鄉人重五經。

送別

秋風鴻鵠恣翱翔，君亦飛騰入帝鄉。
幾載同袍思踵武，一時分手去觀光。
文旌遠映霜楓色，詩卷清沾月桂香。
獨羨祖鞭先著步，彈冠寧肯效王陽。

賀杜頤端六十得庶子

甲子云週氣轉豪，少陵新出海棠梢。
夢龜曾卜鼎初象，承德期占蠱五爻。
未訖髯絲看種種，且誇頭玉峙嶢嶢。

若還解作潛夫論願結忘年爾汝交

春雨述懷次張琳兄

九十春光不放晴客中懷抱轉淒清花因待暖皆緘口
鳥未遷喬不弄聲蝴蝶夢多思故里鯤鵬翅溼礙修程
何當高舉雲霄上掃盡重陰覩大明

和鄭太守訪黃太守詩韻

馬蹄東去蹴芳塵爲訪金闈共藉人遊興爭如詩興逸
交情不逐宦情新同分符竹江南地相對苑尊越上春
周道往來平若砥不須候吏問前津

梅讀稿

卷二

六四明叢書

約園刊本

送黃太守復任二十六韻

早歲登高第才華獨擅場彤除傳詔久青鎖著名芳
邇郡需司收廷臣舉俊良丹書加玉璽紫綬縮金章
五馬臨甌粵雙旌出帝鄉袍葵輝繡采帶荔惹鑪香
慣得龔黃理能循召杜方撫綏安境土操守凜風霜
猿鶴閒棲息豺狼遠遁亡疲癯豐肉帛逋竄復農桑
八邑均寒暑三時若雨暘犬羆因盜息牛茁促畊忙
澆薄歸仁厚饑荒變富穰驅遷心正直虎渡政昭彰
有袴歌廉范還珠異孟嘗風謠時皞皞絃誦日琅琅
草木滋元氣川原集

百祥六年成美績千里覲明皇考最天顏悅褒功御宴
張辭朝當曉霽回騎值秋涼雨露沾恩重江山引興長
兒童迎竹馬父老慕甘棠再慰斯民望重看庶事康常
情無變易謙德自尊光大量吞滄海奇材具棟梁超陞
應不遠調燮步巖廊

次韻答傅應熊

芝眉一別又經年欲賦停雲思惘然雅操真同清廟器
疎才羞比架梁椽五言破的詞鋒健六藝沉酣腹笥便
欲問羲皇畫前事何時重會講先天

梅讀稿

卷二

七四四叢書

約園刊本

送張琳兒歸田

無心雲出岫倦翮鳥知歸且遂斑衣樂都忘世事機溪
山應待風月得相依惆悵獨羈絆徒勞誦式微

次韻答徐宗吉丈

南州華胄一高人與我交游分外親早歲才猷知俊邁
老年德學愈精淳芹宮驥子文將顯栢府麟兒志漸伸
豚犬何知蒙獎譽願敦世好比荀陳

蘭室徐宗吉原韻

喜識關西四代人迄今與汝倍相親楓江共羨家聲舊

花縣咸推德性淳，綵服弗違堂上樂。丹心擬向日邊伸，
庭階蘭玉雖俱好。早步瀛洲數守陳。

遊天童育王寺

名山玉几勝天台，樓閣重重翠作堆。寶塔有光皆舍利，
金沙無地不如來。林閒過客時停騎，湖上僧來曉渡杯。
畫壁幾人詩句在，碧紗籠處也塵埃。

梅竹圖爲呂亨元賦

甲拆句萌千萬類，皆稟陰陽清淑氣。美哉二物得其尤，
挺出羣芳搖落際。玲瓏萬箇玉精神，瀟灑兩枝金翡翠。

梅讀稿

卷二

八四明叢書

約園刊本

蓓蕾先含天下春，虛心久抱凌雲志。截筒和鳳知有聲，
結實調羹知有味。冰霜節幹自貞剛，鐵石心腸無婉媚。
歲寒交契不塵凡，桃李春風總童稚。何日化工一轉移，
雙根並向玉堂植。

和張琳兄四思詩韻

出門復入莫吾知，意馬心猿枉見馳。欲見美人秋水隔，
轉添鷓鴣客暮雲。思嗅殘籬菊香風，處踏碎庭梧月影時。
目斷鄒溪情正切，鱗鴻忽有寄來詩。

右行思

兀坐寒窗強欲唵，唵時都是別離心。屋梁月落疑丰采，

竹徑風來想履音柿葉題詩誰與寄菊花和酒自孤斟
從君分手歸田後幾對青燈憶到今 右坐思

思君長自廢書眠夢寐難成愧睡僊連榻未忘燈火夜
分甌猶記雪霜天北窗吟就停雲句高枕歌闌伐木篇
起盼庭柯探消息鵲聲忽爾報簷前 右眠思

人生會少別離多夢裏相尋幾度過恍到鄴溪重講論
儼從花縣載酣歌片時來往神應速百歲交游誓不磨
卻憶張高情尙淺半途迷路欲如何 右夢思

題李御史瀾海觀風卷

梅讀稿

卷二

九四明說書

約園刊本

丹青玉節下鑿坡繡豸青驄按瀾河異命重申皆艸偃
商聲丕振轉春和列城弦誦塵無警萬里舟航海不波
民俗熙熙淳古上還朝敷奏載賡歌

和張琳兄所寄詩韻

一別知心幾月來營茅蹊徑頓難開半生事過身如夢
四十年來志尙孩薄酒也曾隨俗飲新詩長自爲君裁
公餘常想忘懷話肯棹蘭舟訪不才

和卞振舍韻

聖明天子重都兪側陋無由效拂吁趨事每勞心惕若

致身寧待髻，瞻如曹風庭。院嗟分手夜，月軒窗肯念予。
獨愧疎才負知己，何時挾策聽傳臚。

思養堂

庭椿久矣隕，風霜賴有慈。萱憂可忘陟，怙忍歌加感慨。
壽觴垂瀝願，康強藥牘見面終。天慕菽水娛心愛，日長
追遠養生情。曷已故將華扁揭高堂。

綠陰晴晝爲花僉憲賦

萬山雨過擁新青，天霽風薰海宇清。臺柏影團冰署潤，
庭葵心正繡衣明日離。黃道豺狼遁地覆，蒼雲炒木榮
梅讀稿 卷二 十四明叢書
約園刊本
願得清陰均四表，不徒兩浙頌歌聲。

次韻答卞振舍

凍雨半成雪，相知久不來。我懸徐孺榻，誰賦楚王臺。蝸
室區區守鶉衣，短短裁原思。非是病寄語，莫相猜。

送別

秋風鴻鵠恣翱翔，君亦飛騰入帝鄉。幾載同袍思重武，
一時分手去觀光。文旌遠映霜楓色，詩卷清沾月桂香。
獨羨祖鞭先著步，彈冠寧肯效王陽。

奉和父親爲子感歎嚴韻

幸聞詩禮侍庭闈射策深懷合有司一落泥塗身久困
再瞻霄漢事都非白華誤點殊堪愧東哲白華詩云鮮
俟晨葩莫之點學
註點汚也丹桂須攀尙可期早晚拂衣當奉命臘殘春
意滿皇畿古與玷同

梅讀稿

卷二

十四明樓書
約園刊本

梅讀先生存稿卷二

梅讀先生存彙卷三

贈翰林侍講學士加贈南京吏部右侍郎楊自懲

正統元年以後在邑中所作

元宵

鳳歷新頒正統年春正三五月初圓煙花城市皆燈火
羅綺樓臺盡管絃萬國臣民同慶抃六街人馬自喧闐

寥寥惟有揚雄宅靜對爐薰讀太玄

箋云前二聯鋪敘極富麗結末一轉

森碧軒

梅讀稿

卷三

一四明叢書

約園刊本

門外蒼筤幾萬竿好聲時聽報平安酒傾竹葉光相映
簾展波紋色共看繞屋均垂青玉佩滿庭環立碧琅玕
伶倫若許聲和鳳宜向林中取次刊

營屋有感

我家全盛時豐屋天際翔三十六隈水流落九明堂新
宅官籍沒舊宅人遁亡向來輪奐地化作沙礫場草閒
臥堦石一石數丈長豪家爭睥睨利誘還力攘曉曉聒
吾耳口舌相支撐我諉白諸翁爲言翁怒瞪曰此先世
物寶重逾琳琅欲圖一瓦覆無論千金償取予非道義

吾寧畏豪強彼知不可奪揮手去踉蹌舊物幸存此泰
山一毫芒我有萬閒屋結構胸中藏志期復先業力乏
徒慨慷草創三四楹廢址重開荒長繩曳階石拙工致
損傷成虧諒有數興廢亦何常衛荆苟完美孟獻非所
望作詩詔來裔肯搆無相忘

箋云今舊第思誠堂前長階石中有斷紋者舊物也

名子志喜

我生一長男今已十二歲千金坐垂堂凜凜惟恐墜一
從入法曹活人不勝計自知後必昌一子良未愒差穀
作新居孟秋日庚子丁丑惟吉時定礮立基址此時報

梅讀稿

卷三

二四明叢書

約園刊本

弄璋闔門盡欣喜古人命子名取物或待事叔孫獲僞
如尼父榮君賜立基子迺生是名曰守阯我今有兩兒
長者頗騰異少者知何如競爽未可冀欲教俱成賢從
違聽天意

箋云結語用康節詩意

奉和父親秋日閑居詩韻

吾親無一事秋老思逾清籬落黃花瘦郊原赤燒明眼
猶空四海心不慕三旌獨愧兒違養空懸愛日誠

棲芸先生原韻

飲罷黃花酒心神自覺清舊居雖戶窄新構且軒明霜

葉飄紅錦風簷舞翠旌老來堂上景朝夕但忠誠

白燕

乙鳥生來幾百春羽毛仙化色如銀想辭寶墨新婚客
來訪茅山舊主人紅頰洗殘純粉素烏衣卸卻絕緇塵
雕梁秋到思歸計獨潔其身眾莫倫

琴堂清晝

爲張縣令鐸賦

賢侯蒞政日初長靜撫絲桐不下堂曹吏抽毫皆俊爽
幕賓待座總才良庭槐影正全無暑院竹聲清自有涼
一曲南薰思解愠願施此化被多方

梅讀稿

卷三

三四明叢書

約園刊本

卞振舍和子客舍病中韻復和答之

僑居無賴覺栖栖公子頻過不我非客邸于今和且樂
舞雩何日詠而歸葭依玉樹知何幸蟹負蜚驢願不違
猶愧布韋難報德但持詩句拜重扉

酬璉上人次韻

飛錫近從天上回佛場新向廣生開叢林又演真如教
蘭若重逢大辯才聽法降龍潛呪鉢參禪伏虎隱經臺
固知講習清無染肯許淵明結社來

次韻答李昂先生

東風忽聽子規聲欲賦歸田計未成雪楮緘來知句險
風簷看來覺心驚官曹繁冗慚勞役學館清幽羨講明
他日塵緣如蕩滌青鐙細論十年情

朝陽軒

爲太守
鄭公賦

鐘聲破霧曉霞新天下文明聖治臻綵服趨庭纔問寢
銅符啓戶又寅賓曦光遠布千家曉陽德方亨萬國春
一寸丹心相炳煥此時何異對楓宸

除夜雷雨

寒暄交代在今宵風雨紛紛釀歲朝陽氣藹然回大地

梅讀稿

卷三

四四明叢書

一約園刊本

雷聲忽爾震重霄頓令羣蟄先驚動應是三公善典調
甲折勾萌從此始乾坤生意不勝饒

正統五年起家赴京所作

惜別

槐月何皎皎我心悄悄行邁逼公期家常說難了三
親古稀年髻髮總華皓溫清奈暎違甘腴愁缺少一弟
獨當家百事膠且擾親故需往還田園虞旱澇爲囑慎
支吾家聲務承紹回頭顧病妻莫爲離愁攪晨昏自調
燮勿藥早安好竭力事公姑寬心撫諸小大兒年二八

時務未能曉頗解誦詩書丁寧力探討小兒尙蚩蚩但
覓梨與棗三兒又呱呱提攜方襁褓舍之強升堂勸親
勿憂惱百拜話言多薄晚猶謂早忍淚出門畿中心怒
如擣念昔奉明誨誓全忠孝道遠行豈徒哉遺體當慎
保名期廁甲科績當書上考坂馬驟康莊講鷹奮雲表
早晚錦衣還團圓謝穹昊

同題守陳作

悽悽重悽悽父子生別離臨歧長太息再拜前致辭父
行在功名迢迢上京畿道路阻且長焉能免驅馳宿水

梅讀稿

卷三

五四明報書

約園刊本

更發風臨深復登危晨昏誰定省出入誰扶持金軀宜
自保調燮須以時他日天衢亨行義達所爲早賦歸去
來華堂享甘肥匆匆言不盡潮平舟楫移斜陽一分手
心傷淚交垂何當生羽翼萬里相追隨

與姪守陶

吾宗諸姪子咸與我尤親我幸鞭先著威當志早伸已
將心許國肯把淚沾巾好憶傳經日頻煩顧守陳

次呂善長送行詩韻

道誼交游二十年不堪分手共悽然花封愧我初投筆

芹泮嗟君未著鞭驚馬且先馳北野大鵬終擬奮南天
阿戎侍座須嚴訓仍望提攜到日邊

留別陳先生

人生出處似相期君促行裝我拜辭鴻鵠尙能思奮迅
友朋何用歎睽離吾遊桂子風香處君待桃花浪煖時
春滿鳳城重會晤馬蹄鵬翮願追隨

寄張琳兄次韻

議論文煩本不堪古人慎密口緘三雖云善諱心無虐
終見多言德有慚詩筆卒難酬險韻客窗久不接情談
自嗟未得無祇悔全謝相知爲海涵

梅讀稿

卷三

六四明叢書

約園刊本

次錢塘寄姪守陶

郭西分手渺雲濤蹇向錢塘一駐篙百里山川縈別恨
九秋風月助詩豪吾朝紫闕寧辭遠汝事黃堂莫憚勞
更念守陳同宿食晨昏無使廢焚膏

途中寄友

詩書半擔上神京船過錢塘緩一程萍水多逢新契友
金蘭難忘舊交情煙花城闕行行近風月襟懷去去清
他日雲梯如得便登庸何啻拔茅征

舟中遣悶時自恣弟隨行

解纜曉匆匆俄驚夕照紅
孔庭千里外姜被一舟中
雨缺河流淺風嚴樹葉空
客程猶未半雲路若爲通

途中卽景述懷

路險客行遲孤篷歲暮時
關山初下雪河水欲流澌
帝闕嗟遙望親庭柰久違
百愁安可解對月強哦詩

思遠樓

水木山源本人生必有先
自非因祖禰何以繼曾玄
創立懷前德相承賴後賢
家聲應烜赫宗代屢更遷
已往須存念將來要勉旃
精求追遠句熟識孝思篇
霜露心淒若羹牆貌儼然
膽丸藏舊篋手澤在遺編
祠宇秋風際神龜夕照邊
三墟春寂寂碑誌草芊芊
感慨情無極登臨意每懸
烝嘗惟敬謹盟薦務誠虔
秩秩分昭穆倦倦設几筵
螽斯期蟄蟄瓜瓞願綿綿
豈止終身慕尤當累世傳
華顏寔維則何啻百千年

題王氏家譜

王氏由來出太原源流繁衍幾千年
螽斯蟄蟄期生育瓜瓞綿綿喜蔓延
譜牒重修新翰墨宗文歷敘舊英賢

梅讀稿

卷三

七

四明叢書

約園刊本

後人披覩宜珍保繼繩繩勿泯傳

壽萱

南極有老人遐齡與天齊北堂有萱草壽域同親躋親顏漸蒼老草色常綠滋子立羣卉中風霜不能欺貞哉許家母寡節能堅持春秋八十年對此心怡怡黃花映白髮照耀生光輝清香浸醅醪彩色分斑衣勸酒舞舞爛曾玄繞庭闈共言事培養庶答三春暉所以託詩意壽萱扁堂楣願祝萱親壽逸與南極期

送致仕官

梅讀稿

卷三

八四明叢書

約園刊本

遊魚戀舊浦飛鳥思故林人生四方志孰不懷歸心嗟君功名遂富貴歸故岑且無一尊酒爲君歌且斟酒醉歌未絕悵別成沉沉何時脫塵鞅得與爾同襟

題扇面

飛鳴雙健翮齊起斷霞邊俱有沖霄志何須論後先

畫竹

翠葆猗猗長鳳毛新稍漸見拂雲高何當折取長竿去獨步瀛洲釣巨螭

題四季翎毛

山鳥相呼處山花錦綉明東風一吹動萬戶總春聲
天生雙羽翼花竹穩栖遲白首薰風裏猶能振鳳儀
蘆曰荷猶碧江湖秋早時水禽應得所動靜各相宜
羽毛文彩備雙隱老梅柯有待花成實銜飛事變和

山水畫

峯巒起伏白雲齊樓閣高低翠藹迷誰道登臨無便路
徒枉艤棹在東西

瀟灑溪橋上琴囊背小奴知音應不遠松下屋渠渠

畫梅

梅讀稿

卷三

九

四明叢書
約園刊本

巡簷索笑興偏多試問春來信若何萬斛香飄時正好
擬將佳實事調和

扇面臘梅

金蕊散彩映冰枝玉骨含芳沁密脾爲語西湖林處士
邇來風味愈清奇

羅浮山下月黃昏色映冰姿一樣光金箔鎖寒香不展
春風何羨杏桃芳

寄張鑑兄

藩垣分袂正秋涼上國觀光又一陽自愧檉裾難致用

每懷蘭桂賸同芳
萍波遠泛心逾壯
雲樹相思興甚長
聞道促裝應有日
木犀香處候來航

梅讀稿

卷三

十

四明叢書
約園刊本

梅讀先生存稿卷三

梅讀先生存稿卷四

贈翰林侍讀學士累贈南京吏部右侍郎楊自懲

正統六年以後寓京師所作自此以下爲北遊寓興

父親生日

去歲今朝捧壽觴今年臥病在他鄉遙思白髮增龜筭
深憶斑衣獨雁行萬里東風均布煖九霄南極徧揚光
擁衾無計能歸覲默詠新詩禱上蒼

觀萱有感

庭外萱開夏景幽晨昏相對思悠悠藥中聞道養人性

梅讀稿

卷四

一四明樓書

約園刊本

客裏安能忘我憂深想舞衣和藥豔還思誨杖比莖修
何當歸向親庭下竭力滋培春復秋

寄朱周二姓親契

笑云藕橋朱氏母家
新莊周氏母姨家

憶陪羣彥笑談初爭爲浮名跡漸疎杜宇紅殘空夢斷
蘼蕪綠遍未歸歟鄉音契闊嗟無鴈旅館從容幸有魚
欲待蟾宮攀桂後香風滿袖拜華居

寄樸陽李宅諸親

翹翹仙李盛中林桑梓相連歲月深湖上扁舟成別恨
雲中尺素寓歸心故鄉山水多眞樂旅館琴書有賞音

指日成名拜家慶相過還得共廣吟

寄張三舅

箋云舅名玩太夫人之弟父諱侍宗世居樸陽號九世替纓之族

鳳城春好物華新奈我愁眠又泱旬千里庭闈勞念慮
三冬文史費精神資扶苦乏仙囊藥慰問幸逢賢主人
今喜此身強健在平安先寫報姻親

北京八景寓興送林公子廷舉回廣東鄉試

山連西北一關開崖石層層護綠苔翠削峯巒環禁闕
碧滋草樹接蓬萊虎風拂黛搖文飾豹霧和嵐襲酒盃
仰止皇都天設險覽茲神秀發文魁 右居庸疊翠

梅讀稿

卷四

二四明叢書

約園刊本

流水懸崖素練拖淵源傾瀉自天河玉龍噴沫來雲表
銀竦垂頭飲澗阿不向廬山飛瀑布終歸太液助恩波
仙槎乘此知何去直上蟾宮碎桂柯 右玉泉垂虹
瓊華島上氣沖和五色氤氳繞禁坡解作甘霖罩宇宙
能敷清影蔭山河從龍有便回環近出岫無心變化多
一片青青接東廣才郎乘此步巍科 右瓊島春雲
雪霽西郊日正升瑤山萬疊壯神京色連玉疊晴嵐發
光接瓊華爽氣生喬木煖回禽韻好長途水泮馬蹄輕
才郎對此添情思欲奏長楊賦易成 右西山霽雪

靈沼波瀾一鑑開
天風拂拭淨無埃
氣浮沆瀣吞滄海
色泛葡萄潑綠醅
夜月浴金涵具闕
春花泛錦出蓬萊
禹門桃浪高千尺
會待魚龍變化來

右太液晴波

土阜中開樹兩行
煙花環繞色蒼蒼
非關桃李成蹊徑
自有櫻楠具棟梁
影接御林遮朔漠
光凝紫塞近朝陽
梧桐生在高岡上
飛集丹山彩鳳凰

右薊門煙樹

蘆溝橋上月初低
正值都門送客時
比屋殘釐雞亂唱
半天清曙馬爭馳
老蟾駐影輝文旆
仙兔留光映酒卮
把酒問娥娥默應
桂香許汝折高枝

右蘆溝曉月

梅讀稿

卷四

三四明叢書

約園刊本

築臺求士憶昭王
斜日遺基久已荒
碧草微微猶珮委
紫苔冉冉帶金香
霞隨孤鶩連東廣
雲伴歸鴉際海陽
客子吟鞭從此去
擬攀丹桂覲明光

右金臺夕照

奉和父親嚴韻

憶拜高臺九月中
每將衷曲付南鴻
冰霜涉屐慚遺體
風月賡酬幸主翁
定省久違兒罪大
懷思轉切弟心同
文場今歲應鏖戰
奉命當收破敵功

箋云時公之弟章施同在京師也

栖芸先生原韻

秋深別我到春中
未見音書附便鴻
覲闕何時登祿仕

居家投老作儒翁鄉閭親舊情無異綏甸交游志孰同
待汝高攀蟾窟桂顯揚教子一經功

母親誕日

秋初廿八日知是母生辰綠酒無山毒斑衣久已塵然
烏思返哺寸草未酬春最喜膺高壽蒼蒼豈負人

送林郎中大人往四川詳審疑獄

昭代崇儒術華夷益教聲皇圖天共廣聖德日初升禮
樂威儀盛文章治化明風生因虎嘯雲翕應龍興俊乂
俱登用賢良總發英藩垣承義訓甲榜早飛騰才中青

梅讀稿

卷四

四四明藏書

約園刊本

錢選恩霑皂蓋榮蒲鞭奸吏服竹馬小兒迎美政敦民
俗嘉譽動帝京侯留終見召寇借已先徵玉署題御品
金閨籍姓名自期無訟貴豈尙片言能聖意頒寬恤臣
僚讓老成綸音親付畀聖命克祇承方寸存忠恕尋常
秉至誠繡衣光燁燁鐵面色稜稜蜀谷回春暖巴江微
底清涼颺祛暑酷甘雨洗炎蒸猿鶴幽棲穩豺狼遠遁
驚雪寃開鑑月潔已瑩壺冰過青隨宜肆疑刑合致輕
原情須審克折獄在哀矜轍鮒應全活池魚幸復生仁
慈形眾頌正直起輿稱去騎神駢速歸途砥石平回朝

奏欽恤祿秩擬超陞

京闈失解遣懷

東溟久困一潛鱗望到天池擬化身
蹭蹬泥塗猶爾屈崢嶸頭角幾時伸
桂香會見重開日杏苑應知別有春
更把韋編三過讀流行坎止任洪鈞

奉和父親巖韻

來向朝端遇賞音客窗嘯詠幸同襟
秋風未遂飛騰志夜雨寧忘讀誦心
寸草答春徒切切盆葵向日每欽欽
何當遠庇榮歸覲兄弟稱觴樂且沉

箋云詩和樂且耽一作沉

梅讀稿

卷四

五四明叢書

約園刊本

栖芸先生原韻

征鴈南來寄好音東風喜氣欲盈襟
朝臣肯盡延師禮吾子能留訓士心
雲路登登時已近天廷望望日須欽
更應努力探淵奧今古文章豈陸沉

箋云時秋官郎中林公厚延教其子

廷舉廷臯廷翬廷準廷申故云

示男守陳

旅寓雖云風月多不堪光景漸蹉跎
欲攀丹桂徒勞爾深憶黃花可奈何
大父母前心必敬慈親膝下氣須和
力行儘有餘閑日務向鐙窗細琢磨

守陳奉答

一自違顏歲月多遙聞仕路尙蹉跎久疎溫清知安否
缺奉甘腴奈遠何大器欲成終在晚嚴寒將盡定回和
卻憐愚子猶童稚也把窗前鐵硯磨

南山歌一百韻

南山巖巖知幾重截然橫亘明之東南山造化神秀鍾
渾然不見開鑿功千巖萬壑無塵跡浮嵐藹翠常青葱
彷彿廬山五老峯使人對此心神融希夷華裔人中龍
舍靈毓秀標格豐少年於此巢雲松壯遊湖海名譽隆

梅讀稿

卷四

六四明叢書

約園刊本

邇來僑寓都城中都人目作南山翁皤然銀絲兩鬢鬆
炯然碧玉雙目瞳頤貞玄牝顏如童待人接物春雍雍
心旣靈兮耳又聰年彌高兮學彌崇先天無極原降衷
後天太極涵心胸易首乾坤未濟終天根月窟閑從容
圓神方知明吉凶定其猶豫開顛蒙範圍造化皆天工
淵淵格局知變通周天纏度詳分宮五行生旺論并衝
往來扣問多英雄講論貴賤如扣鐘美哉業術有專攻
遠近莫不咸孚願吾生忝與鄉閭同欲噓壯氣騰長虹
讀書事業嗟恹恹浮名十載如轉蓬長安街上一相逢

爲言命在須信從草不謝榮於春風木寧怨落於秋冬
但能賣賣求諸躬自然利動爲時庸話闌始覺情興濃
歌作南山持贈公南山氣勢凌衡嵩阿翁名望何其穹
我歌南山聲摩空令人仰止心無窮

秋闈四勝爲林貢士廷舉賦

環垣列棘慎周防賈勇人人奮入場筆陣奔騰滂夜雨
文鋒淬礪凜秋霜英豪氣吐虹千丈勝負功憑紙一張
中有尊王輕霸王鼇頭獨步喜揚揚 右棘圍角藝

麟史家傳久著聞鑑衡旌別合公論清秋鏖戰借羣彥

梅讀稿

卷四

七四明叢書

約園刊本

揭曉歡呼是亞元姓字含香登桂籍文辭發彩動薇垣
大鯤鬢鬣從今展行聽春雷躍禹門 右薇省題名

折得蟾宮丹桂柯禮筵高設紫薇坡嫦娥新翦綠盤頰
藩府頻傳金叵羅歌詠鹿鳴成旣醉身將豹變感菁莪
飲闌五馬相追送滿面春風喜氣多 右鹿鳴禮宴

丹桂高攀換綠袍鹿鳴宴罷發蘭橈行行欲向瀛洲路
泛泛須從渤海潮文旆霞明迎曉鳳錦帆風順逐秋鷗
林仙夙有青雲便先駕鯨波到九霄 右畫鷁榮歸

謝秋官林公惠物物各一首

秋風吹綻錦珠囊吐出文犀翰墨光膚染深紅承雨露
心存精白結冰霜味如薑桂尤加烈功比鹽梅更有香
何幸分恩來客邸野人懷惠幾時忘 右花椒

昔日中山殺狡孺拔毛利世製清新會書一字分王伯
能判雙辭辨僞真風月品題從記載簡編揮酒幸相親
二毫惠我尤精健留待陳謨上紫宸 右兔筆

新製香羅出汴梁并刀裁翦自成方春風入幕承頒惠
曉日開緘喜滿睚文織錦花彰閃色功纒玉璽爛生光
珍藏不敢輕爲用待覆圖書貢玉堂 右羅帕

梅讀稿

卷四

八四明叢書

約園刊本

玉質金相徑寸方緘來新自白雲堂一團和氣多含蓄
五色花紋莫掩藏已喜切磋能中矩更當追琢使成章
會看施向雲牋上黼黻斯文燦有光 右印璞

新織精絺靜雪花何緣得到野人家功夫緻密文而理
顏色鮮明質不華蠢爾有懷同賜錦服之無斃勝穿紗
空囊愧乏瓊琚報徒把山詩爲葛藟 右葛巾

癖病隨身春復冬香芎一服頓消融心胸自此能開泰
血脈從斯得貫通參木品題應莫比芝蘭氣味頗相同
願言不但私卑陋普爲蒼生濟治功 右川芎

體製新奇鳳翼張隨時舒卷合經常一星機紐黃金燦
半幅雲牋碧玉香曾向殊方除酷暑長從上苑散清涼
煩襟蒙惠多蕭爽期把仁風遠奉揚 右摺扇

贈林進士廷舉

一從弛檐息華居葭玉相依兩歲餘每愧揮毫多魯豕
不須彈缺有車魚葵傾誠意常瞻仰茅塞心胸已翦除
寸草答春今欲展東風又見早吹噓

望雲

賢勞王事別雙親旅寓常瞻一片雲遠覆高堂如孔邇

梅讀稿

卷四

九四明叢書

約園刊本

長依愛日未應曠舉頭始結重樓狀轉眼還成舞綵紋
有待從龍施雨澤椿萱沾惠吐清芬

和林進士廷舉秋興八首韻

月到秋時色愈娟人逢秋景思無邊碧梧雨過涼生地
丹桂風來香滿天頗怪寒暄如驛遞不妨清白是家傳
公餘瀟灑觀周易自把銀硃帶露研

斗帳高懸雪色娟忽驚蟋蟀近牀邊庭空落木紛隨雨
兩潑寒潭淨蘸天客館無魚寧外慕鄉書有鴈得遙傳
更忙不墜窮經志誓把桑家鐵硯研

西風纔動旅愁深孤館寒鈴萬慮侵讀易未明消長理
揮毫空賦短長吟庭前碧樹翻成錦籬下黃花散作金
莫怪池塘芳草歇有時還展答春心

旅食京華歲月深不堪四序迭相侵西湖露重紅蓮墜
北冀風清碧樹吟夜靜自摩琴軫玉水寒頻淬劍鋒金
功成時遇皆爲用未信蒼蒼負壯心

客居全似出家僧況值清秋思轉增襪被漫懷三畝宅
窮經豈厭十年鐙吟看丹桂風生腋坐對青松月滿膺
夜靜雲空天似水龍光時向斗牛騰

梅讀稿

卷四

十四明叢書

約園刊本

學宦無能欲學僧俗緣猶重旅愁增班生有志終投筆
范老無時且帳燈滄海別來心感夢白雲望斷淚沾膺
何當展翅如鴻鶴趁此西風一奮騰

酒遇知心量自寬人生得志事無難暮年藏器需時動
平地居身到處安籬菊花開罽爲煖江楓葉落豈因寒
因知物理當消長更把叢經著意看

遙憶美人衣帶寬客程迢遞會期難一鳴老驥誰仍顧
三匝驚鳥自不安桂籍名香先得意柏臺氣肅晚凝寒
何當葭玉還相憶共把吳鉤帶笑看

百丈寺

寺名百丈古山田鷲嶺岩巖北斗邊青藜峯巒低萬象
白雲樓閣近諸天花開簷蔔香聞遠樹老菩提果結圓
聞道清規超幻境歸依無計脫塵緣

碧雲塢

禪房高卜碧雲端翠竹凝煙幾萬竿青靄拂簾秋氣早
蒼陰覆座曙光寒恍疑童子山移近絕勝王猷宅借安
料得箇中瀟洒甚欲從林下聽平安

送友人歸鄉

梅讀稿

卷四

十四明叢書

約園刊本

浮雲出岫本無心飛鳥知歸認舊林一紙陳情優詔許
百年逸興故山深吳江露冷楓成錦陶徑霜寒菊尙金
顧我何時脫塵鞅滿懷風月與同吟

正統八年寓京師所作

春日思親

皇州春雪霽又見柳條新萬里長爲客三年不壽親望
雲常極目愛日漫勞神歸計無由決青衫苦絆人

喜勉之攜守陳復至

宦途猶未達旅舍靜如庵久矣親僮僕俄然曾弟男剩

沽鄰舍酒香擘故園柑至喜拚沉醉挑燈徹夜談

寓清軒

乾坤清氣貯靈襟散作天然太古音流水高山塵外趣
陽春白雪郢中吟

陽春白雪皆琴曲

調成松曲風生壑奏徹梅

花月滿林莫教居然成獨潔南薰還協有虞琴

送縣令復任

一入花封善政多三年考績沐恩波人從紫殿金門出
馬向紅亭綠樹過百里編氓瞻畫鷁雙瓶別酒醉仙螺
牛刀再試加銛利行看徵庸上禁坡

梅讀稿

卷四

十三

四明叢書

約園刊本

張繡衣母挽詩

光沉寶婺夜漫漫夢斷瑤池春又闌行囊尙存丸膽苦
舞庭誰看綵衣斑月寒陝路哀猿切風慘川江弔鶴還
馳馬賢郎歸去日忍歌陟屺淚潺湲

梅讀先生存彙卷五

贈翰林侍講學士累贈南京吏部右侍郎楊自懲

正統九年在京師其秋再蹶京闈以後所作

送歲貢生入南監

都門楊柳綠絲絲馬首金陵控玉鞵驛路風雲當晚霽
辟雍芹藻正春熙鵬搏北海初張翼豹隱南山更澤衣
酒盡雙瓶無別話桂香願汝折高枝

送縣令之任

黃梅雨滌煩暑紅藕風香滿空賢才百里宰故舊雙瓶

梅讀稿

卷五

一四明叢書

約園刊本

在雙瓶酒將盡一別情何忍願言此去勤撫字均使斯
民利其利政績行看並三異

送陳繡衣按閩

驄馬肥時秋草青吟鞭一拂志澄清恩承北闕威風遠
名振南閩醜類驚猿鶴栖遲皆得所人民耕鑿總安生
行看回奏天顏喜俾掌經綸翼太子

甲子京闈又失解

屈首窮經鬢半斑豈知入芥轉多艱科名又在孫山外
仕宦無論季孟閒王氏三槐曾手植卻林一桂待兒攀

天門放榜休談夢祿養惟宜隱抱關

病後感懷

病臥經旬不出廬起來殊覺意躊躇空思丹桂香天際
還惜黃楊厄閨餘戶牖豈長貧孺子文園何久渴相如
試看調尾龍門者多是當年點額魚

守陳奉和

冠弁如星滿禁廬大人高步獨躊躇九苞丹鳳浮雲外
萬丈青松積雪餘世事紛紛渾不定人情落落更無如
終期射策登廊廟出有高車食有魚

梅讀稿

卷五

二四明叢書

約園刊本

病後感懷示一二知己

名駒產渥洼玉色雙分鬃調良可人意不與凡馬同方
當思騰踏柰厄鹽車中一朝遇伯樂迥立嘶長風何期
一顧後去去任西京駒兮復駒兮長思伯樂翁

又

叢蘭茁堦下若與羣草倫光風一披拂始覺英華新天
香與國色誠爲君子珍佳人媚麝臍豈足知其芳見之
不探佩於蘭又何妨會當一移植其芬自揚揚

分題送趙原政歸嘉興祭掃

瓦陵澤下暫停船，暗數賢才盡著鞭。
憶別幾經梧葉雨，相思又值菊花天。
金蘭名在無由見，錦纜風生底用牽。
慙向丰山先隴近，擬將卮酒酌重泉。
右瓦陵思賢
新裁賜錦許榮歸，船過吳門有故知。
夜月青尊重敘會，秋風綵纜暫相維。
政如范式逢張日，何似王猷訪戴時。
回向先塋瞻拜罷，修程早促莫遲遲。
右吳門訪舊

拙齋爲熊霖賦

歸處田園足養頤，性如鳩性絕謀爲。
冥心久坐同頑石，得意閑行類野麋。
機巧在人從有獲，是非於我了無知。

梅讀稿

卷五

三四明叢書

約園刊本

但存吾道由吾命，一任蕭蕭兩鬢絲。

箋云古詩用
拙存吾道

望松軒爲熊圭賦

山上青松手自栽，山中夏屋淨無埃。
推窗翠色排簷入，舉目蒼雲拂座來。
風動恍疑虬奮躍，月明遙見鶴飛回。
吾將假地同吟眺，只恐掄才架鳳臺。

寄章主事尚素

憶誦皇華早著鞭，都門一別又經年。
此身雖處江湖上，清夢應飛日月邊。
愁絕美人秋水隔，望窮老眼暮雲連。
遙知收姪行軒裏，閑把詩書對雪聯。

送韓繡衣永興巡河路

都城冬曉雪初晴
玉節瑤華相映明
狐兔畏威應遠遁
鴈鴻安集不相驚
秦淮水色青苔淨
揚子江波素練平
他日還朝奏嘉績
應云海晏及河清

古城八景

湖上春歸雨乍收
湖中春動水湍流
高低雲影雙清曉
上下天光一碧秋
桃浪湧時魚變化
煙波深處鳥沉浮
源源有本同吾道
何日操舟向此遊
右鯉湖春瀾

靈物蜿蜒水底藏
長時噓氣藹穹蒼
氤氳始見升潭洞

梅讀稿

卷五

四四明叢書

約園刊本

變化終當覆苑牆
涼夜和煙籠霽月
清晨隨霧捧朝陽
有時得遂從龍便
化作甘霖沃萬方
右龍塘晴靄

築城保障慕英雄
廟貌森嚴對古松
老榦固能存晚節
喬枝猶見振清風
似聞玉宇生天籟
恍覺蒼濤駕海龍
一自掄材登用後
賞音林下有誰同
右彭城松風

仙種成林月滿腔
余林遠接鄰林房
銀蟾散彩秋無際
金粟生輝夜未央
天上婆娑同弄影
人間皎潔共瞻光
何時直上清虛府
折取高枝兩袖香
右余林桂月

社陵高阜傍彭城
時有芻蕘對奕枰
棋勢遠連星點點

子聲清應木丁丁爛柯人遠空遺事賭墅臺荒浪得名
底用區區論勝負只茲消遣過平生 右社陵樵奕
水接蟠溪浸石磯持竿寧爲鱖魚肥半規璧玉該先兆
數尺絲綸韞妙機新月磨鎌聯潤色寒水出壑映清輝
有時徵上朝天佩聲雜琳琅響禁閑 右前潭釣璜

茫茫沃野儘寬平樹藝均爲治世氓連頃露華誇上瑞
繞廬雲穗喜西成厚生未讓黃金貴獲利方知白璧輕
爲語務茲家國寶勿云祿足代農耕 右人田寶稼

書房瀟洒覆貧簷中有焚膏讀夜長一寸草心常吐赤

梅讀稿

卷五

五四明藏書

約園刊本

五車雲卷爛生光花閒每報禎祥信燼落頻聞翰墨香
攜向金臺載挑剔遠聯銀燭色煌煌 右竹屋書鐙

甲子臘月十三日大雪題都憲幕壁

凍雀羣栖萬境空璠花飛舞下璇穹珠眸映色明千里
玉壘增輝壯九重敢效聲詩鳴世盛且書祥兆驗年豐
嚴凝已盡陽和至擬變甘霖助化工

乙丑三月父親誕日

親誕無由慶衷情盡付詩年齡欣既老筋力懼將衰陟
阡終無止趨庭近有期明春當此日戲綵獻金卮

和秋官郎中林公分書田詩

書田遺世勝金貨頃段分明付五兒肯播肯耰終獲利
也知貨殖是愚癡

經訓菑畚底用耘舌耕心種遺兒孫繩繩疆理毋荒廢
嘉穀長沾雨露恩

送秋官林公陞山西右參政

恩承丹鳳闕路出玉河隄吳樹聞鶯語薰風快馬蹄
樓紅遠近坡草碧高低藩屏歸參佐山川入品題九重
頒雨露三晉仰雲霓尊酒成留戀臨期惜解攜

梅讀稿

卷五

六四明叢書

約園刊本

送林廷翬侍父參政公往山西

昆弟從游五載餘薰風一別意何如客窗來往誰知己
賓館談論孰起予綠樹啼鶯猶繾綣紅亭去馬更躊躇
薇庭聯綵多清暇慎勿因循廢讀書

同題守陳作

兩餘沙路馬蹄輕兄弟聯鑣出帝城千里承顏供子職
一時分手惜交情幽并野帶風埃闊雲代山和霄漢平
藩府仁賢應濟濟琢磨雙璧貢皇明

七賢過關

服牛乘馬過關時雲自悠悠鶴自飛蕩蕩乾坤從去住
也知富貴是危機

乙丑八月入官吏部給事工部以後所作

上工部侍郎李公黃二十韻

河嶽鍾神秀人才毓俊英梁珠光照乘趙璧價連城
賢字馳才譽儒林振德聲北山移鶚薦南海奮鵬程粉署
聯司馬金閨籍姓名帝心恒簡在兵政益修明邊燧俄
傳警廷書卽命征坐謀知決勝飛檄遂戡平奏凱居前
列論功擢上卿秋風黃菊秀春雨紫薇榮靈囿祥麟出
高岡彩鳳鳴天時歸變理邦土俾經營羽翼惟賢智鹽
梅屬老成四朝崇事業千里著忠誠氣概思瞻仰威儀
獲覩迎厓鹽蒙一願吟石信王生未解成文豹羞稱點
額鯨志期穿翰硯工不廢韓檠寸草逢春展益葵向日
傾龍門今喜託薰沐獻愚情

贈徐中書瑛時贅李侍郎家

仙掖開簾麗碧霄金閨通籍友英豪珮聲搖曳趨青鎖
香氣氲氳染紫毫芸閣晝閑天語近薇庭夜靜客懷高
也知冰玉相輝潤行看恩榮載寵褒

贈凌先生宗政

時同邸李
亞卿家

先生家住姑蘇里，烜赫家聲滿人耳。英英標格玉壺清，
濯濯丰姿春柳美。早遊芹泮得淵源，獨抱羣經究終始。
太極圖探濂溪翁，先天學究庖犧氏。吉凶悔吝玩其辭，
進退存亡驗其理。舉指之時知變通，言動之間能議擬。
吟詠詩葩理性情，研覃禮樂消查滓。帝王聖治明典謨，
褒貶微言祖麟史。學既多聞無闕疑，才堪適用已明體。
折桂名成獨占先，拔茅彙進初由邇。當年拜職教登封，
達德成材有諸子。今年述職校銓衡，功績文章冠多士。
久知治道出斯文，行班資資陟綱紀。客窗邂逅識韓荆，
賓館從容共仙李。一團和氣幸相親，數仞門牆敢窺俟。
強裁俚語拜臯比，清興賡歌幾時已。

送林廷臯往山西省父參政公

時乃兄廷舉
擢監察御史

秋草黃時塞馬肥，若因孝友費驅馳。纔看荆桂聯臺柏，
又想椿萱對省薇。三晉雲山行靡靡，九重城闕去遲遲。
到時若問區區意，爲說相思淚滿衣。

同題守陳作

御隄秋晚柳初黃，送爾鳴鑣出帝鄉。客興飄飄詩滿袖，

交情戀戀酒盈觴
薇垣橋水風霜秀
柏府荆花雨露香
孝友存心須兩盡
往迴毋厭馬蹄忙

驄馬南巡

爲李繼衣奎作

紫詰鸞章下鳳廷
繡衣驄馬出龍城
霜蹄蹴踏秋風健
玉節光輝夜月明
常鎮名山皆震竦
吳松無水不澄清
錦牋題詠知多少
賸有民謠頌德聲

挽戶部李亞卿

纔聞鳴佩入清班
胡事神遊竟不還
位歷五朝聲赫赫
名垂千古史斑斑
烏啼冀北愁中月
鶴弔終南夢裏山
回首可憐埋玉處
淡煙荒草護泉關

遣興

旅館如僧舍
蕭條歷歲時
塵埃馮氏缺
風雪董生帷
講授推賢弟
賡歌任小兒
家懷猶足樂
世態不須疑

守陳奉和

大器無人識
深藏且待時
浩歌風拂座
高枕月穿帷
慕主期匡主
憐兒肯教兒
憑將一編易
更質幾重疑

挽章母

爲守規作

憶別慈顏折桂枝
常思榮祿進甘肥
青鸞一去何時返

梅讀稿

卷五

九四明叢書

約園刊本

白鶴雙飛空自歸無復倚闌頻望子更誰紉線密縫衣
幾迴目斷西山路古木蒼煙帶夕暉

雙節堂

夙喪移天兩鬢皤柏舟相繼泛中河姑心匪石那堪轉
婦矢如山實靡它雪夜勸孤勤蠹簡霜晨含淚織龍機
行看雙節該青史輝映千秋耿不磨

送本府二守閻公芳之任

聞道太安守傳家有義方辟雍文采著銓府治才彰紫
殿頒恩命黃堂待贊襄囊錐新脫穎匣劍舊騰芒去去

梅讀稿

卷五

十四明叢書

約園刊本

燕中騎飄飄濟上航野鴉驚玉勒沙燕語牙檣海甸春
風煖江湖新水香柳環陽羨里花隱會稽鄉西浙開藩
府東鄞切郡疆兩湖分日月五邑徧農桑膏澤期沾漑
仁風佇播揚剪除荆棘淨培植蕙蘭芳坐使民皆富行
看俗盡良政聲時赫赫歌誦日琅琅異績聞朝野崇班
擬廟廊獨慚羈薄宦未遂奉高堂甘旨嗟多缺生涯柰
久荒停輶訪民瘼顛望早垂光

同題守陳作

吾皇聖德如天運四序和平萬方順遐思窮困在遐方

特選賢良佐名郡公在橋門已十春共誇才行兩超倫
始捧除書出天上便促行裝臨海濱海濱沃壤踰千里
民樂農桑富文史故家遺俗尙彬彬善政流風方靡靡
公到黃堂畫閣中仁明須與昔賢同五邑行看霈霖雨
萬家坐見熙春風政聲漸覺盈人耳從此飛騰日高起
豈但榮懸太守章還應寵賜尙書履愚生自昔遊京國
欲向丹墀獻長策蹭蹬空懸捧日心低迴未展冲霄翼
忽聞熊軾下吾邦臨歧謁拜蒙謙光銀河湛湛襟懷闊
玉屑霏霏語話長歡如舊識難爲別征車爲我猶淹轍

梅讀稿

卷五

十一 明齋書

初園刊本

雙瓶酒盡見情深七字詩成愧才拙我向明朝歸古鄆
霄泥路隔恐難親若見吳公問幽側休嫌年少洛陽人
奉答父親寄示詩韻

嚴父高堂遠寄聲開緘如見綵雲生詩宗李杜原無敵
道學程朱更有名只愧愚兒違孝養空隨俊士慕恩榮
如今報道歸寧日花滿春山錦繡明

除夜

新歲將來舊歲過客窗便覺轉陽和且然爆竹殘除耗
遺著朝衫看舞雩綠酒飲餘愁尙在青燈坐久夜如何

君親未有捐埃報爭奈星星髮漸多

守陳奉和

殘臘蕭蕭雪裏過帝城風物見春和畫堂列炬祠神竈
紫禁鳴鑿引大儺生值明時終有待飲當良夜更無何
弟兄酬勸兒賡和未數豪門樂事多

我父才華眾莫過行兼夷惠及清和風高旅館緇衣敝
月淡天門玉佩儺孟子從來輕管仲馬周猶未遇常何
明春定是飛騰日曳紫紵金寵命多

梅讀稿

卷五

十三

四明叢書
約園刊本

梅讀先生存稿卷五

梅讀先生存藁卷六

贈翰林侍講學士加贈南京吏部右侍郎楊自懲

正統十一年春自京師謁告歸省所作

早朝

是年元且立春

玉漏將殘曉箭催重重闔闔白天開
旌旗影裏春風動韶濩聲中暖律回
蠻貊朝宗歸治化臣僚祝頌啓涓埃
宮筵宴罷龍顏喜散作陽和遍九垓

給假後喜家書到

十月河冰合家書久不遞平安今始得
愁悶一時空闌

梅讀稿

卷六

四明叢書
約園刊本

桂香方藹椿萱景尚融

長也歸寧有優詔鞍馬快春風

朱瑩昆季以子歸有日邀子兄弟到南郭園亭

酌別酒酣遂寫以贈

薰風聯轡出都城暫憩園亭興趣清
紅雨落花情戀戀綠陰啼鳥語嚶嚶
主人對酒難爲別客子停轅未忍行
便欲於斯從老圃卻纔身是繫簪纓

積慶堂爲陳仲延作

世人積金待高價手執牙籌論不暇
借使黃金積累多子孫不肯將如何
君家餘慶綿綿積信是先人曾種德

不須爲利日孳孳仁義存心自豐殖姚江家世幾千載
餘韻流風久猶在瓜瓞綿綿愈碩延芝蘭燁燁生文彩
邇來旅寓潞河濱肯堂肯構高嶙峋斗酒千錢恒好客
囊金百鎰長周貧嗟我平生久遊宦邂逅登堂覲君面
爲題詩句警來苗繼繼繩繩惟積善

潞河曉發

四月十一日

曉發潞河濱波香草正春推蓬猶望闕放棹欲寧親行
李不如舊衣冠頗覺新呼兒供小酌談笑敘天倫

守陳奉和

梅讀稿

卷六

二四明叢書

約園刊本

畫舫出陽濱汀花雨後春舉觴黃鳥鳴開幔白鷗親季
父棊書舊嚴君冠帶新明朝拜重慶歡樂世無倫

舟中端午

幾載端陽客帝鄉今年喜得泛歸航持盃正想斑斕舞
拂袖猶聞縹渺香禁鼓朝鐘聲尙近燕山越水路何長
往來只爲浮名絆卻被沙鷗笑我忙

守陳奉和

客路行行指故鄉順風流水送輕航懸篷艾葉垂垂綠
隔浦荷花冉冉香萬里浮雲山尙遠一簾晴日晝偏長

蓑衣且奉菖蒲酒不管篙師理棹忙

歸家

客夢到親闈斯須便覺非
昨朝猶遠別今日始真歸
忽睹雙絲鬢重披五彩衣
歡聲滿庭院台鼎不須希
爲客常無賴歸家頗得宜
柳塘風淡淡花院日遲遲
掃石閑眠處臨流獨坐時
悠然得真趣未肯顧公期

郊行

不過營湖二十春
小橋流水路還馴
耕童不識衣冠制
笑道烏紗別樣中

梅讀稿

卷六

三四明叢書

約園刊本

雨過郊原綠樹新
草香泥軟不生塵
舊時行處尤夷熟
不必停車去問津

野外招提憶往同
久要耆舊總成灰
小童不識曾遊客
報道催租官又來

雨餘村路浥塵沙
風信初終紫棟花
鷄犬聲聞在何處
綠陰林麓野人家

寄繡衣林延舉

攜手都門日相違
又一年交情雲聚散
人事月虧圓
恨比江南水心懸
冀北天何時菊花下
尊酒共陶然

寄林廷臯

旅寓同談笑家居歎別離情深千里共義在兩心知柏
府風清日薇垣月滿時應知秋景好慎勿誤佳期

記年

今年五十三漸覺鬢星添負米心無倦辭金志頗廉一
經難致用三徑未容潛塵鞅何時脫林泉自養恬

寄友人

一別十年多百年能幾何空聞黃鳥語不見白駒過幽
徑筍成竹閑庭草長莎頻頻爲芟掃秋景又蹉跎

梅讀稿

卷六

四四明叢書

一約園刊本

花香竹影

十年重過紫陽庭花竹相看眼倍青春好不妨蜂課蜜
晝闕應有鳳儀形月陰滿地人超俗風信環軒德並馨
正欲於斯同嘯詠獨慚飄轉易雙萍

花竹人多愛唯君尙影香轉移恒有節薰染自無芳杖
履時芬馥琴樽日蔭涼清風明月夜吟賞勝尋常

卽景

自春及夏無多雨自夏逢秋又少晴耕種失時苗不秀
田家何以望收成

正統十四年三月自家赴京待選紀行之作

曉發西壩

三月初七日

棹發西津埭清江一帶斜輕煙籠柳岸新水浸汀沙念
念方懷國行行漸離家倚櫓回首處堂上鬢雙華

晚次梁湖

西津方掛席瞬息到盱江風俗多趨利歌聲已變腔暮
雲藏驛舍殘月入蓬窗客思雖無賴家醅尙滿缸

弟自恣和

解纜猶鄞水收帆已越江嘔啞市人語款乃棹歌腔幾

梅讀稿

卷六

五四明叢書

約園刊本

處帘垂戶誰家燈映窗怡怡同笑語乘興倒春缸

到西興

弭棹西陵渚推蓬日已殘居人晡後睡行客夜中餐漠
漠煙光淡蒼蒼曙色寒長江如練靜一葦度非難

過錢塘江

遇征處州大軍經過無舟可倩幸林
繡衣以雙舟相送十六日在枯樹灣

身起

武林佳麗地物色正春陽弱柳何相繫閑花空自香南
征師入境北濟客無梁邂逅知心者方舟遠送將

到皂林

嘉禾朝解纜薄暮到桐鄉漁火分江碧山雪藹月黃舊
遊心不忘新別恨何長爲感汀洲鴈分飛作兩行憶自
也

弟自愈奉答

天邊鴻去遠孤雁在江鄉夜月兼葭白秋風禾稻黃
慈烏心共切反哺意偏長來歲春陽動遲歸共一行

次蘇州

帆疾追飛鳥舟便藉榜人山川猶昔日草樹正芳春但
念親庭遠寧辭客路貧吳門風月好吟賞興清新

梅讀稿

卷六

六十四明藏書

約園刊本

泊楓橋

萬室輿梁次孤舟夕照中翩翩南去燕渺渺北歸鴻聞
闔門前月寒山寺裏鐘往來成感慨何日免憧憧

到橫林

寂寞橫林夜其如感慨何親庭初隔遠客路正奔波未
盡還家夢俄驚發棹歌推篷正衣坐無奈曙寒多

到孟瀆河口次日過揚子江

長江天設險客棹慣經過風正帆無恙潮平水不波驛
亭紅掩映山寺碧嵯峨瞬息瓜州壩斜陽未下坡

到揚州

鶯棹雖無定停舟似到家風波頗辛苦情興也清嘉斗
野亭前酒蕃禧觀裏花偷閑且歡賞莫問客程賒

高郵湖口

曉發高郵口篷開眼界賒湖光涵杜若柳色帶蒹葭新
水吞滄海孤帆背綵霞故鄉行漸遠還望獨咨嗟

寶應驛前

暴雨平湖上孤舟曲岸隈居人方醜醜遊客正徘徊溝
水深成壑川雲暗作堆鄉知宰斯土相遇正御盃

梅讀稿

卷六

七四明叢書

約園刊本

淮安羅家溝

淮鄉多富庶客棹暫相維連壁金湯固交衢物色熙招
尋多舊友談笑有新知詩酒閑消遣舟行未可期

三叉河

清淮水迢遞雨過碧如苔望海思驥首乘流愧曝腮鱗
鴻何處覓蝴蝶夢中回願駐桑榆景義和且莫催

到古城

客舟初繫纜驛舍已張燈親老一憂喜身勞每戰兢震
消天色暝雨過水痕增行役微名累低頭愧野僧

皂河至邳州

河中新水足空外片帆飛沙鳥聲何碎江蘼綠正肥行
舟隨處泊遊子幾時歸呼取蘭陵酒微吟對夕暉

至新安驛

驛路幽燕接長河秦楚分野花開自落山鳥不堪聞夜
倚孤蓬月朝瞻一片雲驅馳爲王事寧敢憚辛勤

過呂梁洪

山川多險峻無過呂梁灘兩岸羅危石中流沸激湍瞿
塘猶覺易巴峽未云難乍到孤舟客驚看心膽寒

梅讀稿

卷六

八十四明齋書

約園刊本

過沛縣

靡靡登天路行行漢故鄉英雄雖寂寞遺跡尙昭彰泗
水雙馳驛歌風幾夕陽危檣有沙燕對我說興亡

至穀亭間

官河通漕運疏鑿自元功隄柳青連翠郵亭碧閒紅懸
情千里月快意一帆風率土皆朝貢舟航歷歷逢

至棗林間

入海河流急登天路不遙挽舟從逆水掛席待輕颺欲
擬過鄒邑那堪阻魯橋嗟嗟遊宦子漸覺鬢星饒

過師家莊閘

憶泛桃花浪行行夏景初
遡流多險阻爲客久躊躇
忍聽催歸鳥羞看點額魚
何當拔絃去還著老萊裾

到新安閘水勢危險阻而不進

一從洙泗路遠派不遑安
漸覺逢原易方知用力難
風中危坐石雲外靜波瀾
只待平平水艤艫自到灘

自恣和

世途多艱脆心定自然安
水失瞿塘險山夷蜀道難
迂徐觀物理談笑靜波瀾
從此推移去何愁逆上灘

梅讀稿

卷六

九

四明叢書
約開刊本

至濟寧閘

金鄉城下泊殘日在寒林
嘶馬憐芳草啼禽戀綠陰
懷吳空積恨企魯實勞心
欲遣登臨興同行有賞音

至草橋

遡流由渤海已過濟城濠
始識淵源遠尤知地勢高
舟航從往復魚鳥任遊翔
到此安流順舟人庶免勞

至分水閘

萬壑從茲會千源向此分
南流到淮海北派入燕雲
喜見鳶魚樂羞看鷗鷺羣
舟行始無礙超越藉南薰

經張秋口泊東昌

迢遞張秋口隄防忽已頽桑田驚變海河水怒奔雷彷彿瞿塘峽分明灩澦堆經行三太息有愧濟川材

曉發東昌晚到臨清

險阻皆經過開河水正平月明千里近風順一帆輕衆客從容語扁舟自在行篙人相指笑頃刻到臨清

阻風臨清聞下

順水到臨清舟行又暫停江天驟風雨聞水吼雷霆暗想梅如荳生憎絮化萍沙頭過親舊相慰盡雙瓶

梅讀稿

卷六

十一

明倫彙編
約園刊本

到德州

川流無晝夜客棹自晨昏野曠山禽少淵深水族繁居民多賈術戍卒半耕屯散步高原上瞻雲想故園

泊青縣曉雨

清宵舟泛泛拂曉雨纖纖古岸閑花落長河新水添塵氛皆帖息膏澤又旁霑咫尺天津路薰風晚更恬

到直沽

擾擾征行客離家近五旬林篁應解籜園杏已生仁回首鄆江側凝眸潞水濱忡忡兩心事何日得全伸

直沽哭季叔父

南浦三鳴鴈飛飛獨離羣
秋風家萬里夜月客孤墳
花落無由見鵲啼不忍聞
啖違猶子罪空自淚紛紛

到楊村

棹發北河中飄然遇便風
行人皆適國逝水盡朝宗
悵望山雲白顛瞻海日紅
一程高一級天路不難通

河西務行至高店下阻風

河西纔數里欲進又遲回
平水翻成浪飛沙聚作堆
遺軀深自保老眼謎難開
頃刻甘霖至襟懷又快哉

梅讀稿

卷六

十四明叢書

約園刊本

到和合站阻風

平明天色好胡事變昏幽
颶母初爲孽天吳繼效尤
塵途愁覆轍浪海懼翻舟
欲請龍泉劍飛誅兩逆儔

到灣登車入城

客路五千里辛勤良可哀
陸行嗟躑躅水涉苦沿洄
日月光將近風雲信又催
登車瞻望處闔閭自天開

送戴太守浩之永州府

朝罷天顏未及旬又蒙恩
璽出楓宸雙旌五馬聲名
舊二水三溇治化新曉日
都門初發騎薰風驛路不
生塵

願將聖澤覃斯土民俗行看盡變淳

挽兵部李侍郎黃

鹽梅正屬老成時何事金閨籍早違
夜月忍聞鶉淚血朝陽無復鳳來儀
四朝勲業昭青史千古聲名著紫微
惆悵當年珠履客哀章未寫淚先垂

送李聰扶父侍郎靈柩歸葬

嚴裝曉出玉河橋千里吳江水一篙
夜泊無虞常致謹晨興有事莫辭勞
行經楚澤黃花老望入蘇臺碧樹高
歸去早宜封馬鬣北堂調膳卽焚膏

梅讀稿

卷六

十二四明叢書

約園刊本

憶友人

別離偏覺易會合遯難期杳杳三秋隔
綿綿兩地思雨窗孤坐處雲樹遠連時
愈覺無聊賴新詩寫寄誰

贈致仕官

人到耆年古所稀聖恩優老許榮歸
身辭北闕寸心赤袖拂西風雙鬢絲
松菊猶存春意好蓴鱸正美宦情微
回家且遂期頤樂坐樹臨流任所之

中秋後有感

朔漠秋聲乍變寒塵蒙白日晝漫漫
六龍失御知何在

一榻羈栖豈自安紫塞雲深無過鴈瑤臺月冷有離鸞
英雄肯奮回天力駐景揮戈定不難

詠史集古句二十首

漢道方全盛

東方虬

天山報合圍

李商隱

君王自神武

杜子美

赫怒震天威

王仲宣

神武一朝征

張景陽

職司憂悄悄

杜子美

飛章奏天庭

李太白

鑒之以蒼昊

孫子荆

皇晉遭陽九

劉越石

刑臣弄天綱

朱文公

仰視浮雲馳

李少陵

白日難回光

李太白

梅讀稿

卷六

十三四明續稿

約園刊本

出師亘長雲

杜子美

喧呼救邊急

李太白

胡塵損漢兵

沈雲卿

萬乘猶辟易

杜子美

上谷抵樓蘭

徐敬業

上谷今宣府
土木境也

飄蕭秋半時

杜牧老

將一失律

杜子美

翠蓋蒙塵飛

杜子美

天驕毒威武

李太白

延我千穹廬

石季倫

白龍改常服

李太白

百萬化爲魚

杜子美

日月慘光晶

李太白

忽聞哀痛詔

杜子美

青山猶哭聲

杜子美

朝野色枯槁

杜子美

寒谷待鳴律

顏延年

寒谷卽上
谷宣府也

白登幸曲逆

石季倫

如

何當路子

阮嗣宗

閉門斂踪跡

范質

皇靈大動變

曹子建

迅雷中宵激

陸士衡

風雨聞號呼

杜子美

魍魎森慘戚

杜子美

宛轉龍火飛

李太白

彤雲麗璇蓋

顏延年

荒夷懷南懼

盧子諒

便卽下階拜

李端

虜騎入雲中

盧照鄰

雲中今大同也翠華捲飛雪

杜子美

賜子出

金銀

杜子美

胡雛負恩澤

杜子美

嗣皇新繼明

韓文公

一日值明兩

王仲宣

萬象咸光昭

謝靈運

太平可覆掌

李習之

梅讀稿

卷六

十四四明雜書

階亂禍誰因

陳伯玉

忠臣詞憤激

杜子美

首罪誅共兇

杜子美

同惡隨蕩析

杜子美

宿昔恨滔滔

杜子美

蝨賊陷忠讜

李太白

汨沒一朝伸

杜子美

皇穹雪冤枉

李太白

季秋邊朔苦

謝靈運

胡羯仍遺患

杜子美

極望見雲中

袁陽源

倚伏昧前筭

杜子美

胡關饒風沙

李太白

賊臣表逆節

杜子美

兵戈亂浮雲

李太白

天地日流血

杜子美

隱隱五鳳樓

李太白

冥冥翠龍駕

杜子美

兩宮遙相望

漢古百

步遠殊界

韓文公

詔發西北將

美杜子

盡驅詣闕下

美杜子

疇能補天漏

美杜子

回日向三舍

應休璉

都人望翠華

美杜子

霏衣門行在

美杜子

寒陰籠白日

鮑明遠

照耀天山外

美杜子

廟算建三略

韓文公

將令驕虜滅

王摩詰

六龍轉天車

李太白

佳氣向金闕

美杜子

梅讀稿

卷六

十四明叢書

納園刊本

梅讀先生存稿卷六

梅讀先生存稿卷七

贈翰林侍講學士加贈南京吏部右侍郎楊自慙

景泰元年春赴官泉州便道過家之任所作

元日試筆

聖皇繼統萬邦臣鳳曆初頒正朔新窮谷悉看歸至化
堅冰漸見泮陽春經綸譽重恩榮盛謀略名隆爵位臻
朝罷從容歸第宅未知誰是雪冤人

赴官泉州途中寓興

弟兄談笑出都城雨過沙隄草更青敢憚微官勞會計

梅讀稿

卷七

一四明叢書
約園刊本

且欣便道得歸寧紫韉瘦馬遲遲步綠樹啼鶯款款聽
遙想泉山連鄧嶺望中多少短長亭 右出京馬上偶成
潞河新水侵青莎倩得歸舟快似梭沙上閑鷗應笑我
若人何事苦奔波 右潞河發棹

二月東風萬物生如何連日作秋聲想因沙漠多巖險
天假威嚴爲掃平 右蔡村阻風

去年四月到天津今日重來又暮春獨立東風悲季父
纍纍荒塚在江濱 右直沽有感

日夕長川纜已收舟人云是古滄洲箇中果有神仙宅

卸卻塵緣向此遊 右滄洲懷仙

煙光淡淡色濛濛茅店鷄鳴未曉鐘聽得傍人相笑語

天公假我一帆風 右發磚河驛

去歲茲辰別故鄉今年又得泛歸航風波多少辛勤事

來往飛飛鴈獨行 右至安陵

江城萬雉擁熊羆獨倚孤舟對夕暉綠樹啼禽如有意

聲聲勸我不如歸 右到德州

比屋居民總富饒昔賢曾此用牛刀停舟試問今何宰

還有絃歌被爾曹 右過武城

梅讀稿

卷七

二四明叢書
約園刊本

行舟暫泊魏家灣水逆風顛去路難棗酒酤來隨量飲

黃粱炊熟夜中餐 右到魏家灣

名利牽人豈自由餐風宿水幾時休自嗟不及漁家樂

妻子團圓共一舟 右開河見漁

東風檣燕語呢喃今日情懷頗覺堪逆浪顛風都過了

一篙順水到江南 右趙村閘上

趙村解纜海蒸霞船過南陽日未斜九閘從容如捷徑

江南江北路非賒 右泊谷亭閘

景山低小似三陵借問何爲遠擅名應是路當衝要處

往來憑此記行程

右景山

呂梁凶險幾經過
順下扁舟似擲梭
此去料應無阻折
一帆風正水無波

右呂梁洪下

三月將殘四月來
今朝忽聽有轟雷
上蒼已覺屯膏久
好送甘霖沃九垓

右泊河坊淺遇雷雨

晚煙初起月初升
清淺沙頭萬舸鏜
昨夜甘霖纔數點
長湖頓覺水痕增

右白洋河

蘭舟泛泛過桃源
流水桃花竟杳然
不是仙踪何處覓
此身猶未脫塵緣

右過三义河

梅讀稿

卷七

三四明叢書

約園刊本

客舟日暮泊長淮
雨後波光碧似苔
一曲滄浪何處響
西湖渚畔老漁回

右到淮安

白馬湖中水渺茫
曉風殘月入蓬窗
懷鄉去國心無已
未審愁魔幾日降

右曉發白馬湖

煙雨霏霏曉色寒
大江逝水去漫漫
當今南北無疆限
去棹來航有底難

右過揚子江

酒罷登舟已夕陽
惠安橋下又昏黃
扣舷細和滄浪曲
名利煙波欲兩忘

右泊丹徒

自出都城一月餘
幾回翹首意何如
扁舟今夜毘陵泊

忽夢邊庭報捷書

右到毘陵

許市橋邊夕照紅
寒山寺裏定時鐘
扁舟明日同君別
不厭清談到夜中

右楓橋別張尙溫

綠陰隄畔兩三家
繞屋河流碧玉斜
最愛一般清致處
纖纖新月在蒹葭

右泊師姑橋

正統十四年二月手栽香梓於門前景泰改元四
月十一回家已喜長成

門前香梓去時栽
今日歸看花正開
叮囑兒童毋剪敗
長留清影蔭蒼苔

梅讀稿

卷七

四四明叢書

約園刊本

景泰元年秋八月自杭赴官泉州之作自此以後
爲南遊寓興

武林別守陳

父向南閩子在杭壯懷休爲別離傷
願渠高折蟾宮桂
早寫泥金帖寫將

范村接潮

潮來江水撼雷霆
潮過江波素練平
客子乍看偏覺險
篙師慣見不爲驚
沿沙宿鳥因人警
隔岸馴雁底事鳴
烏兔潛藏天未曉
仰觀惟有衆星明

釣臺懷古

七里灘連七里龍釣魚人去釣臺空溪聲自與潮聲接
山色偏宜樹色同怪石一拳存勝跡行人千載仰高風
我來卻被浮名絆羞覩祠堂爲掩蓬

守陞奉和

富春山勢若蟠龍峭壁高臺出半空千仞絲緡何處下
一時物色有誰同客星故顯狂奴態炎祚終延節士風
來往桐江舟似織無人到此不掀蓬

大洋曉發

梅讀稿

卷七

五

四明叢書
約園刊本

天雞三唱後海色漸離離水緩知溪闊山深見日遲客
舟將曉發居屋已晨炊遙望清源路行行自有期

守陞奉和

薄暮舟依岸侵晨又復離江空飛鳥疾風軟去帆遲石
灘聲如戰村嵐氣似炊蘭溪行欲近登眺散襟期

張埠夜雨

居屋張燈網罟收掩篷忽聽響颼颼池塘漸冷芙蓉老
枕簟初涼穉稷秋添得溪中三尺水送來心上十年愁
南奔北走知何事不覺令人早白頭

楊村晚晴

夕陽江上暫維船遙望家鄉竟杳然孤鶩飛邊秋水闊
殘霞斷處暮雲連愁聞狐兔聲相近怪見萍蓬跡屢遷
願得桑榆長駐景草心酬報自年年

蘭溪水磨

兩石相摩合化工誰將機巧設溪中轉移只仗雙輪力
推盪全憑一水功眼底浪花飛暮雪腰閒麩粉落秋風
居人卻笑村莊婦徒步周旋不及儂

夔州水碓

梅讀稿

卷七

六四明叢書

約園刊本

流水高低帶夕陽孤輪旋轉阿誰裝自春豈假人多力
相動寧論里有喪口漲滿時應更急晨炊遲處不爲忙
待將白粲充厨用卻把機關爲掩藏

清湖客房

一簇人家碧水隈舟人官櫓悉憑媒軒居自喜頻迎送
門徑何曾厭往回山鳥已馴溪鳥押桂花將盡菊花開
主翁冀我重來意臨別殷勤再舉盃

蒙頌曉行

初唱天雞已出門煙嵐交際正氤氳梯雲山徑隨宜步

觸石溪流到處聞，曉月初沉寒氣在。朝陽將出曙光分，
平明試看經行路上有猿獠下鹿羣。

甘嶺夜宿

崎嶇石磴倦躋攀，兩足胼胝日已殘。且向人家炊晚餉，
更令童僕備朝餐。山連霄漢昏偏早，雲臥衣裳夜更寒。
盡道爲官多自在，誰知經涉許多難。

界首書懷

行行行過幾山顛，更望仙霞軼紫煙。一嶺中分閩浙界，
千峰外隱朔南天。高登若在雲霄上，遠眺思依日月邊。
壯志不消今尙爾，那堪雙鬢漸皤然。

守陞奉和

萬仞霞關紫翠顛，浙山閩嶠接雲煙。兩藩自表中分地，
四海同歸一統天。旅次方言俄已別，客途風景總無邊。
巖君久蘊經綸志，感慨成詩氣浩然。

黎關寫景

信國公書立

望闕擬若在雲霄，上得關來日更高。華表凌空仙鶴去，
青楓夾路嶺猿號。秋容漸老侵蓬鬢，桂馥初香襲布袍。
離思宦情知幾許，逐時分付與霜毫。

南浦行舟

肩輿歷盡幾重山又倩扁舟下急灘綠水望邊天蕩蕩
白雲飛處路漫漫湍流旁寫如瓴建亂石中分似劍攢
況值淒涼秋暮景行人能不動長歎

蔡墩眺遠

海色初紅映遠坳推蓬危坐騁雙睛兩山夾峙如排闥
一水中流似建瓴人向高崖切處住船從亂石罅中行
紛紛來往皆名利誰和滄浪效獨醒

平洲登高

梅讀稿

卷七

八四明叢書

約園刊本

比屋連牆綠水涯舟人指點是吾家老翁艤棹將登岸
稚子推蓬便候茶一曲溪流涵杜若半汀秋色上蒹葭
須臾獨步高岡上回望東鄞路轉賒

小湖觀瀾

湖上斜陽纜已收憑舷閑看水湍流晨昏混混何曾息
今古滔滔不暫休金影晃搖千里月碧光清浸一天秋
欲知道體無窮處隨寓隨觀亦易求

建寧翫月

中秋

去歲中秋在帝鄉今年奔走望閩陽新萼滿眼雖堪賞

舊事經心亦可傷寓意去歲中秋北狩之事烏鵲驚飛栖未穩嫦娥獨宿恨應長清光到處纖毫見寇盜何由得掩藏

蒙洲人家

故老傳羅隱云蒙州好箇筆架山只出秀才不出官故此讀書者多目沙

縣賊作人家逃竄房屋被燬今漸復業

人道蒙洲好住居停舟試問近何如幾家煙火秋風裏數里丘墟野燒餘月夜驚烏猶繞樹夕陽歸犬暫依廬于今狐兔皆殲滅幸免城殃及子魚

延平路次

雄城萬雉枕溪山天設金湯不可攀曉日樓臺重整飭

梅讀稿

卷七

九四明叢書

約園刊本

秋風草樹半凋殘豺狼齧蠶雖潛伏猿鶴栖栖未易安守令急須加撫字免教黎庶迫饑寒

過水口驛

自此至福州皆平水矣

山裏山連山外山幾多灘瀨激飛湍順流放棹猶非易逆水牽舟更是難深淺看來宜揭厲艱危歷過始平安從茲纔喜川如練上下天光勝可觀

到福州城

久聞佳麗古閩州今借藍輿此地遊一時龍眼珠偏貴千里江山畫不收少年半醉青樓暮多士爭趨丹桂秋

遙想浙藩開榜處大兒應已占鰲頭

守陞奉和

聞越南來第一州城中三島列仙遊諸蕃珍舶來重譯
萬種塗田種兩收榕巷書聲鐙火夜蓼汀漁唱鷺鷥秋
道山亭在煙霞裏未得登臨最上頭

大義曉發

二十二日晚潮開
船到渡頭已鷄鳴

洪塘解纜已斜曛煙雨蒼茫轉覺昏望水望山空駐目
思家思國欲消魂棹歌互答聲難辨船火連明影自分
坐待天雞三唱後披開雲霧覩朝暾

梅讀稿

卷七

十四明齋書

約園刊本

涵頭野市

步入涵頭路坦夷莆田景致此爲奇連村田地多膏沃
夾道人家頗富滋居賈行商方物聚坐男使女土風宜
何如勸課勤耕織民俗還淳不浸漓

宿楓亭驛

楓亭路與惠安分驛置輦飛半夕曛豺虎當塗皆斂跡
牛羊下坂自成羣兩崖草木叢青藹千里江山鎖白雲
料得前程還去遠再行數里未天昏

過萬安橋

阿誰驅石濟長川
蔡守功成已有年
白鶴未歸華表月
蒼龍常見水中天
往來客有行山櫂
遊賞人無載酒船
橋下寒潮橋上月
幾回長落幾回圓

梅讀稿

卷七

十四明叢書

約園刊本

梅讀先生存稿卷七

梅讀先生存稿卷八

贈翰林院侍講學士加贈南京吏部右侍郎楊自懲

南遊寓興

景泰元年九月十日到任以後所作

到任上泉州府金同知

政令嚴明善撫緩男耕女織弗違時牆頭煖雨桑千樹
隴首春風麥兩歧暴虎有傷心服罪老龙無警足生聲
熙熙閭里皆絃誦民日還淳自不知

上泉州衛王指揮

世鎮清源冠八蠻文華燁燁武桓桓撫綏寬恕人心服

梅讀稿

卷八

一四明叢書

約園刊本

訓練精強鬼膽寒田野有成收兩熟軍民無事飽三餐
何時徵取參帷幄坐運籌謀四海安

新婦歎二首

寂寞空閨日思量嫁得宜誰知有家後不及在家時
姑舅年衰老兒夫又遠遊思量在家好今日反多憂

喜守陳中解元

讀書中舉分當然何幸題名獨占先更擬來年春色好
五雲深處聽驢傳

守陞次韻寄解元兄

一舉鰲頭已衰然龍門還擬奪標先弟今聞喜興遙想
衣鉢他年許可傳

守鴈次韻寄兄

桐城聞捷喜欣然桂籍芳名快覩先小弟愚頑無所以
也思讀易紹家傳

上范布政大人

清暑冰街照省堂八閩山水重輝光蠻煙淨掃風初肅
瘴霧全消日載揚坦坦周行歌德政茫茫沃壤富農桑
有時名覆金甌裏卓冠羣僚補衣裳

梅讀稿

卷六

二四明叢書

約園刊本

上參政吳大人

昔承恩璽出鑿坡參贊雄濬政若何八郡望風歸治化
羣公協德致中和撫綏有道民無訟巡歷多方海不波
指日燮調登宰輔股肱元首載賡歌

送人入京

小春天氣轉陽和爲客其如送客何詩爲關情偏覺易
酒因話別不知多仙霞楓嶺叢青藹淮海維揚浸碧波
此去賸交天下士眾人切莫唱驪歌

歲除偶成

我在他鄉父在家大兒應已到京華可憐骨肉分三處
何日團圓共一家

自恣奉和

同懷許國各離家那得樓樓老歲華弟勸兄酬傾栢葉
今宵且以醉爲家

今宵且以醉爲家只念親闈兩鬢華待及瓜期歸拜慶
斑衣多似老萊家

辛未正旦偶題

去年今日覲龍顏今日栖栖在八蠻潦倒儘添雙鬢雪

梅讀稿

卷八

三四明藏書

約園刊本

勤勞亦盡寸心丹風寒雁過心偏蕩月落烏啼夢不安
更憶天邊攀桂子離愁應是亦漫漫

得男守陳庶吉士兄

武林一別半年餘日日凝望未得書旅館忽逢天上客
喜聞瀟灑玉堂居

守陞次韻寄吉士兄

伯氏胸藏萬卷餘一官還讀禁中書相思忽夢對牀語
不道玉堂天上居

守爲次韻同寄

杏苑看花醉酒餘
遙傳金帖寄家書
愚蒙見此猶思奮
誰肯終身浙水居

賀王三舍贅相

侯門繡褥隱芙蓉
公子乘龍喜意融
爲免月娥來月下
轉教河鼓渡河東
鳳凰叶律音聲似
闌蕙同芳氣味同
更羨歸寧稱壽處
綵衣聯舞對春風

送行詩以天高一雁遠海闊孤帆遲分韻起句

東廣相思地南閩送別天
世情雲聚散人事月虧圓
曉路雕鞍騎春江畫鷁船
歸家何所樂萊彩日翩翩

梅讀稿

卷八

四四明叢書
約園刊本

旅雁南飛去乘風勢轉高
填簾雖共樂菽水敢忘勞
隄柳條牽袂汀莎色映袍
客懷多洒落隨興付霜毫

戚戚抱歸心歸心歎非一
甘腴難久違連理歡未畢
含情不忍分眷言不能悉
引領海南頭浮驂去何疾

巖巖北山陽雖離兩鳴雁
止息得其宜胡爲遽分散
分散非我情高堂遠凝盼
拳拳孝弟心慚子久遊宦

悽悽親愛分渺渺川途遠
泉山通圓沙舟車往來穩
來時秋正涼去時春未晚
因茲想故鄉羈縻幾時返

泉南二月時郊野春如海
微雨夜來過萬物生光彩
杜

宇時一聲遊人意何在促裝早歸寧救水歡萊綵
紫帽接羅浮修途儘寬闊嚴裝在味且車膏馬尤秣歧
分袂就判歸心孰能遏傾想新詩章頻煩慰饑渴
飛蓋隨人遠吟鞭伴客孤翠嵐浮海嶠碧柳謫官途望
斷雲衢雁聽殘月夜烏忡忡兩心事不足爲尊鱸
南海春風好飄飄一片帆波光搖彩旆草色映青衫遺
興詩成軸防身劍在函家居足清賞肯爲寄雲緘
旅寓云何促歸期只恐遲不堪秋水隔空有暮雲思杜
宇紅殘處靡蕪綠遍時扁舟獨斜倚感慨有誰知

梅讀稿

卷八

五四明燄書

約園刊本

祈雨有應詩一十四韻上李僉憲大人

玉節皇皇按遠方爲民陳悃達蒼蒼商羊感召隨來舞
旱魃聞聲卽遞藏纔見溪雲騰海宇俄警山雨滿江鄉
深恩廣被羣黎樂厚澤均沾品彙芳紅杏粉濡蜂蟹易
紫芹泥軟燕巢忙暗生池草形詩夢澤墜簷花動洒鷹
水足膏腴蛙鼓吹風和峯蔚鳥笙簧翠勻隴首雙歧麥
綠遍牆頭萬樹桑蹇足敢辭行泥濘曝腮空想跋滄浪
近瞻臺柏重添秀遙憶階蘭正吐香幾處焦原皆沃潤
經春渴肺亦清涼人心懇切天心格農事從容庶事康

志喜無亭書美績豐年有頌載周行使君自是爲霖手
願瀉天瓢沛八荒

喜雨詩上泉州府金同知

早至今春自去秋郡章初握爲民憂人心能與天心合
德澤翻成雨澤流萬物枯焦蒙發育羣黎蘇息起歌謳
村村錢鏹相交作共擬高低總有收

泉州送莊給事赴雷州太守

聖主分符遣近臣覃敷德化及斯民黃門青瑣聲名舊
紫綬金章氣象新五馬驅馳都市曉雙旌輝耀故鄉春

梅讀稿

卷八

六

四明雜書
約園刊本

雷陽豈久留天驥行看微庸立要津

景泰二年夏五月自泉州往攝德化縣事所作

同臧希玉先生往永春途中寓興

霏霏梅雨弄晴黔聯櫂趁公入遠岑雖有好山供賞興
那堪啼鳥動歸心循途自合隨高下涉水尤宜識淺深
不遇同鄉同笑語此時此景也難禁

攝德化縣

蚤負雲霄志蹉跎有二毛何由補龍衮聊復試牛刀
茅屋惟庭樹禾麻半舒蒿傷心離亂後撫字敢重勞

守陞奉和

邑里經兵燹公私一燬毛吏胥無案牘徒隸盡弓刀勤
政頭如葆憂民目正蒿宦途誰復爾吾父獨賢勞
瓦礫創殘地春來土不毛士風忘俎豆民俗競錐刀文
廟簷穿棘公德柱結蒿于焉設政教朝暮不辭勞
奉檄初來日煩苛若蠅毛強梁腹有劍柔佞笑中刀春
雨滋蘭蕙秋霜肅艾蒿流離民漸復耕鑿不知勞
撫綏纔兩月犬足已生毛有地皆牽犢無人更佩刀閑
栽庭外柳漸長獄中蒿從此居官逸都忘作縣勞

梅讀稿

卷八

七四明讀稿

約園刊本

德化縣齋偶成

縣治東偏一小廳自公退食散襟膺有山有水權爲主
無子無妻恰似僧時守陞在泉州未至縣也雨洗牆花紅欲滴煙生
庭樹翠常凝日長人靜塵氛少只把詩書當友朋

寓德化縣布政分司偶成

操習民兵奉府書不應暫假此公居三閒冷屋秋風裏
四望焦原野燒餘蘭蕙根苗須灌溉管茅萌孽務芟除
于今境土皆寧靖欲恤疲瘵愧不如

景泰二年秋九月還泉州以後所作

文苑清玩詩

霜落江水寒，鰓肥黃滿腹。有此無監州，居官寔云足。右鰓
心吐黃金花，葉委水蒼佩。舉世飫梁膏，誰知爾根味。右菜
雨葉翠雲連，露葉蒼玉立。採之作金齋，鸞胎不能及。右菜
昨夜山中雨，溪深不可杭。誰知牛背穩，浮渡且無妨。右騎牛過水

蘭陽四景詩

築土爲臺石作闌，四時花卉不曾殫。梅香清後蘭初馥，
葵萼紅餘桂又丹。每對韶華開賞席，長留春色助騷壇。
先人手澤今加溉，奕葉遺芳愈可觀。右臺花四季

梅讀稿

卷八

八四明讀稿

約園刊本

富貴春開富貴花，如何冬景發英華。芳根應抱凌寒操，
和氣偏鍾積善家。國色含章依愛日，雪光呈瑞映香霞。
蘭陽此種真奇絕，魏紫姚黃未足誇。右十月牡丹

一柄亭亭發兩葩，頑祥先報主人家。雙頭自是蘭陽種，
十丈寧論玉井花。並蒂紅妝應宮麗，聯房碧實更清嘉。
至今留得餘香在，薰染羣英詎有涯。古雙頭瑞蓮

紫鱗錦鯉物，芳陂圍圍洋洋足。可怡水暖揚鬢息，汎漜
兩晴翻鬣動漣漪。主人數畧何曾入，稚子鉤針亦不垂。
莫道箇中深得所，早乘桃浪躍天池。右方塘魚樂

龜峯八景詩

玉立雲根名號嘉奎星毛穎孕精華寫成地理圖長有
書盡天文點不加自喜中書封得地何須太白夢生花
獲麟絕後無尋覓今見關西伯起家 石筍文筆

樓東有鳥曼然鳴相伴吾伊分外清不是露從丹頂滴
也應月傍九臯明放神欲覓仙遊處側耳九閨子和聲
暇日攜琴來試問肯同飛舞到蓬瀛 書樓聽鶴

自古名家出大材樓東榕樹宋時栽千尋黛色參蒼漢
數畝清陰覆綠苔老幹屢曾沾雨露新枝常欲振風雷

梅讀稿

卷八

九四明叢書

約園刊本

連牆接屋蒙餘蔭只恐徵輪架鳳臺 東墅古榕

蓄涵爲礙自有堙不勞煎火假人能成功須待朝陽曝
獻巧爭看暮雪凝想像藍田生美玉恍疑凌室納寒冰
更聞龍坂多梅子若欲調羹向此徵 龍坂鹽堙

亭山名利舊祠堂時有鯨音送夕陽海月漸生林外影
鑪煙未斷佛前香清隨梵唄飄中界遠逐樵歌散下方
借問旋蟲經幾代鑄來原自義莊楊 山寺晚鐘

洗馬塘中水接天古今灌溉義莊田果生菱芡珠還浦
花落芙蓉錦濯川開鑿自因先世澤疏通亦賴後人賢

鄉民藉此忘乾旱共樂年年大有年 馬塘秋水

業漁家住水西頭幾度斜陽紅半樓岸上帘旗猶未捲
江中罟網已全收每看蘆葦光還照更喜桑榆景久留
此屋有魚兼有酒黃昏一醉更何憂 漁村夕照

斷崖對立鎖中流日上潮生宿雨收貝闕清涵金鏡曉
珠宮寒浸碧天秋連艘犀象皆朝貢列艦魚鹽任去留
欲假涼颺乘鷁舫片時吹送到瀛洲 海門秋霽

送劉茂才歲貢之京

一見清懷分外投匆匆行李不堪留龍樽酌別紅蕖夏

梅讀稿

卷八

十四明叢書

約園刊本

鳳闕趁朝碧樹秋三尺天人期獻納兩京風月任遨遊
長安若見吾兒問爲說星星髮滿頭

梅讀先生存稿卷八

梅讀先生存稟卷九

贈翰林侍講學士加贈南京吏部右侍郎楊自懲

雜著文稿多所亡逸今僅存十數篇分爲二卷

曲江書屋記

人之名世者不擇地而居地之名勝者必因人而著孔之闕里顏之陋巷非擇而處之也因孔顏居之而名特著耳江之一曲何地無之而韶與陝之曲江特著者豈不亦因張九齡杜子美居之哉吾鄞之江西受姚虞諸壑之水南引奉化衆溪之流匯於吾鄉積瀆碛之南而

梅讀稿

卷九

一四明叢書

約圖刊本

朝宗于海碛之東二里許江流曲折縈紆環抱若去而復顧向而復奔早潮晚汐蜿蜒可愛故老因名之曰曲江江之北沃壤衍廣清淑幽勝居屋林林者望族滕氏擅其地而世居焉不第文雅且積書以遺後人嘗題其居曰曲江書屋迨今有俊其名者性敏好學與予友善予常造其居矣入其書屋則見其牙籤滿架寶軸充棟典謨訓誥誓命之書國風雅頌之詩三千三百之禮儀二百四十二年之筆削裁文周孔之心傳孔曾思孟之面命莫不在焉至若立說名家支離背馳者吾未暇閱

也出而觀乎江則見其來也有源其歸也有宗源委之
相接脈絡之相通晝夜不息往來無間睹其來則知其
所出察其去則知其所宗乃相顧而言曰斯猶聖人之
道耳江之流宗學之正也海之巨斯道之大也水之流
也不盈科不行人之學也不成章不達今子處是地安
是居而讀是書果能於是而博其學探其源育其德精
而擇之約而守之漸進不已以盡夫明體適用之學以
究夫修己治人之道光著先人積書之志將見曲江之
名不獨專美於九齡子美而希賢希聖以學孔顏者求
之於書亦有餘師哉子其何如滕子曰勉之矣請書以
爲記

賀應孟春冠帶序

棠谿之金天下之利也不銛範不砥礪則不能成青萍
結綠之劍而芻犀兕斫蛟鼉也崑山之玉天下之珍也
不錐鑿不琢磨則不能成圭璋瑚璉之器而表朝儀薦
宗廟也士君子固爲世之所美然而不進修不明試又
何自效勤勞施政治而爲國家之器用哉江右鄱陽應
君孟春氏世居慶右族大以蕃鬻纓蟬聯厥祖父咸以

儒術淑諸鄉人多所成就迨祖某相淳湖之地幽閒而
徙居焉孟春氏早聞庭訓克踵先武羣經子史靡不淹
貫行植學充蓄爲文章刑爲威儀由是光輝發越名譽
洋溢故郡國舉其賢羣試于京遊于輦轂之下觀城郭
宮室之壯麗珍奇寶貨之駢集輿馬甲兵之強盛足以
侈其聞見及交儒林聞仁義禮樂之說觀朝之大臣黼
黻彌綸之道又足以恢其心志其於文章政事蓋有不
習而無不利者正統丁巳聖天子臨御之初首詔天官
策四方才士優劣以爲任使之具仲春遂得敷陳治道

梅讀稿

卷九

三

約園刊本

脩合厥旨拔居優等獲授冠帶之榮其親友邵桓輩喜
鄉邦之有光來徵子文以賀之子嘗觀易象有曰君子
多識前言往行以畜其德今則及時而進以爲國家之
器用政猶金玉之鎔範琢磨而爲劔爲器焉他日有官
守焉有民社焉則據其素蘊大其設施擯伏奸邪鋤去
強梗亦猶劔之剗犀兕斫蛟龍也至於拾級方岳陟庸
華要豈不亦猶圭璋瑚璉之表朝儀薦宗廟也耶書此
以待

送貳尹范君某之黃陂序

牧民之職莫重於縣官縣官之設有令有佐雖其職位之有差而責任之重則無差焉夫治百里之地撫百里之民以上承乎治化者縣官之責也賦稅之當征力役之當平與夫民情休戚之所係風俗醇醜之所關令特提綱挈領舉其槩耳所以贊助分理旁通酬酢者則在乎佐是則佐貳之責又不輕於令矣尙何等差之論哉鳳陽范君某奮身學校拔尤成均試事秋臺讀聖賢之書友天下之士覩國家之政接於目聆於耳蘊於心弼中而彪外乃於正統己巳夏天官試其才可用俾佐湖

梅讀稿

卷九

四十四明藏書
約園刊本

廣之黃陂縣之官有日其鄉仕於朝者求余文以華其行余惟聖朝設官分理所以爲民也爾之往亦惟體聖朝愛民之心爲心使賦役是均力役是平獄訟是清隨其所便而處之從其所好而施之察其所惡而去之俾戚者以之而休瀆者以之淳心古人牧民之心行古人牧民之行將見陟崇階躋顯秩豐功偉績與古牧民之善者齊驅而並駕矣奚暇與一邑之等差校哉爾其最

諸

代祭外母文

惟母名尊太岳德配冰翁儀容整飾性行從容奉承宗
祀相理閨門佐興家道女嫁男昏贅我愛息傾筐是將
館我甥禮恩愛何當情雖半子與子無異柰我蚩蚩不
能奉侍天胡不仁致母遽疾女思母恩號咷罔極我思
母德欲報何及日月逾邁利於舉巽維遵崇果維酒崇
觴三宿三咤再拜永訣言之不悉泣聲嗚咽嗚呼杜鵑
花兮雖未發子規啼兮先泣月子兮婦兮五內崩裂女
兮倩兮淚痕流血母其靈兮來享來格錫其福兮永庇
衰經

梅讀稿

卷九

五四明叢書

約園刊本

送翁鼎鈇歸鄞序

翁君鼎鈇者四明鄞之舊家也世皆讀書肥遯尙質朴
敦孝友迨某性尤冲淡不與富貴名勢接不與聲色貨
利適惟讀書力穡孝於其親恪盡子職若將終身焉有
司聞其賢辟司文墨辭弗克乃幡然而起勵厥志勤厥
事於簿書期會之閒酬酢應變之際靡不致其謹而適
其宜焉由是上官器之同儕式之下民感之既而循例
來京雖聲譽益振而違親之念靡有朝夕積勞迨盈眾
皆喜其有搢紳之榮而某獨曰家有嚴君曠養久矣吾

聞古人一日之養三公不換而況升斗之祿乎與其崇名遠遊而不得侍親之側寧無愧於昏定晨省者乎與其厚祿富家而不得養親之志寧無愧於叔水盡歡者乎況吾年而親躋耄耋脫或有渝則樹欲靜而風不停子欲養而親不逮悔將何追胡可耽君之祿而違親之養也遂白情于天官允之戒行有日鄉之宦遊于京者咸異其志述其言徵予序以餞之嗟夫世之人孰不欲貴身也孰不欲富之潤家也亦孰不欲名之彰顯也是三者翁君行將有之矣今獨能不動其中而必以養親爲辭非篤於孝友者能之乎是歸也吾知其籩豆旣備兄弟旣翁具班衣之樂歌棠棣之詩與世之商財賄計班資者奚可同日語哉孔子曰惟孝友于兄弟施于有政是亦爲政奚其爲爲政請誦以爲君贈是爲序

祭守陶姪

正統十四年十月十八日故二十一日祭

嗟汝有生賢而且智博覽詩書通達時事叔姪之間爾我無二昔我家居汝從授記難疑辨析若合符契及我居官汝亦隨侍名聞郡侯辟司書繫酬酢公私頗適人意我來京師汝亦隨至三四年閒更相倚恃我昔歸寧

思念不置我今來京愈敦恩義未及逾月汝室云逝汝
繼遭疾往來看視延經四月醫禱罔治柰值時艱葬祭
難備乃效茶毗火厝歸瘞嗟汝爲人且不輕易嗟汝妻
帑云何弗繼衣服房屋與汝舅議不致遺忘汝母介意
嗚呼望汝爲官致宗族光耀兮豈意早世致我之反服
兮天壽在天匪人能爲兮諒汝明達不以介意兮母快
快留滯他鄉兮早率妻子逕往南方汝父垂白在堂兮
招汝魂待汝喪汝其亟歸兮慰其悲傷吾言至此兮雨
淚其滂汝其有靈有知來格洋洋邪抑亦不聞不知幽

梅讀稿

卷九

七

四明叢書
約園刊本

冥茫茫邪

梅讀先生存稿卷九

梅讀先生存稿卷十

贈翰林侍講學士加贈南京吏部右侍郎楊自懲

雜著文稿泉州所作

送黃原吉之京序

予以非才謫官來閩公退之暇有黃生者持重慶堂卷求詩予觀其題詠皆當時鉅公非讀書世家不能致也及觀生之貌豐而頤長言溫而氣和動止有則非儒家子弟不能然也予既異之遂不辭而贊于卷末未幾有求文贈生者拜而言曰黃生者慶其名原吉其字乃甫

梅讀稿

卷十

一四明讀稿

約園刊本

之望族胄也簪纓文章代不乏人生讀書好禮奉大父母父母至孝人無閒言郡大夫聞其賢辟試諸事復薦之京某等不忍捨此願斬一言以華其行予益喜之乃言曰湛盧豪曹之器鑄以棠谿之金礪以越山之砥淬以具區之水其未用也光鋌氣燄晝眩霄漢夜衝斗牛已自不容掩矣及致用也其鋒鋟銛利則陸搏犀兕水斷鴻鴈豈有不利也哉今黃生生文獻之邦出世儒之家獲重慶之樂庭訓固有素矣又得郡大夫以甄陶之所謂事其大夫之賢友其士之仁嚴憚切磋以成其德

猶劍之鎔鑄淬礪以致其利焉他日試用天官尙當以
湛盧蒙曹自期益加淬礪駸向用則有衝斗牛眩霄
漢之光芒矣迨乎懋官懋賞敏政敏事豈無搏犀兕斷
鴻鴈之廉利哉如此斯不負諸公贈言之意抑亦有加
重慶堂之光焉生其懋諸

送龍巖縣儒學司訓盧先生欽守制序

僚友潘仲威謁余言曰吾浙之黃巖盧先生早膺鄉薦
擢南省乙榜貳教福之龍巖縣學日與羣弟子講授討
論辨釋難疑充其所未充擴其所未擴渙然若朝陽之

梅讀稿

卷十

二四明叢書

約圃刊本

泮春水怡然若時雨之化萬物不數年而士子咸抱明
體適用之學懷致君澤民之術出而居侍從任方岳列
胄監典卿校者彬彬其盛也今以內艱計聞輒仰天呼
曰人之於親養生送死爲事今吾有生早卽庠校游歷
仕途生不得盡菽水之歡病不得躬湯藥之奉死不得
盡殯斂之誠罪莫逃已徇身何及遂鬢跣而奔朝抵暮
而悲號水漿不入于口幾至頓危道經於泉吾忝瓜葛
之私慮恐其踰禮滅性將迎而慰之願子爲我言之予
惟先生經明行修司掌教化其於喪禮講之已悉奚待

予言矧人子喪親哀戚之情不能自已奚其慰之雖然
予意先生悲哀心勝不暇顧禮今亦不容不申之焉夫
聖人制禮政恐民爲死傷生特爲之中制故三日而食
旣殯食粥蔬食水飲小祥食菜菓大祥食醯醬禫而飲
醴酒喪止於三年雖孝子之心無窮而聖人之制有節
且漳之抵台幾千餘里陸則巔崖峻嶺水則飛流激湍
高低攀緣深淺揭厲艱辛萬狀况羸弱之體而履險畏
之途可謂孝乎當俯情就禮節哀順變珍重遺軀歸終
襄事以行道顯親自期不亦可乎予試相子強之先生
必喻之潘作而謝曰然請遂書以爲序

送張君某省兄歸鄉序

詩曰天生蒸民有物有則夫有物必有則是天下無一
物無其則也蓋子之爲子弟之爲弟孝悌爲之則也清
源別駕張公弟某自南海抵泉幾數千里不憚跋涉閒
關而來省視其兄風雨連牀之會盃酌酬酢之娛春草
池塘之詠怡怡和樂且孺且耽不啻若鳴鴈之雛雖棠
棣之韡韡者非友愛之深其能然乎暇日則與列第諸
公子適情遊覽更唱迭和登紫帽之峰探清源之洞謁

二朱先生祠與夫泉之形勝歷覽迨周而襟度寬闊胸
懷軒豁充然有得因思寧養高堂促裝戒行同游諸公
予不忍捨去乃載肉崇酒追而送之于洛陽橋亭相與
酌別各賦詩以華其行予亦挈榼走餞僉速予爲序予
惟贈行以言古人之所重也自尹吉甫餞申伯仲山甫
而有崧高蒸民之詩蘇武李陵倡爲五言以相贈別自
是而後騷人墨士習茲雅典輒以登山臨水之興寓於
祖道分歧之際今觀諸公子之詩或美其孝弟勤勞之
意或寫其征途風月之懷或託於雲樹愴別之思發乎
性情止乎禮義心至意切自不容已豈勉強爲非交誼
之篤其能然乎茲歸拜高堂而致慶登先隴而展祭則
其孝敬之心又孰得而然哉吾知南海之人聞君歸而
迎之觀斯文誦斯詩而知君孝友之實積于中而著于
外人皆信之無間言也必相顧而言曰彼孝如是吾何
爲不若彼之孝彼弟如是吾何爲不若彼之弟彼之交
友又如此吾何爲而無友乎將見人人觀感而興起其
良心則是君之事親敬兄交友又爲鄉人之則矣其有
補於世教也豈淺淺哉遂書以爲序

送泉州府經歷王侯考滿序

良材產於深山大谷崎岩絕壑之上盤錯其根節焦枯其柯葉荆榛雜之而爲伍芻蕘過之而不顧然而迆風生於谷口冷水瀉於溪頭吸清露咀嚴霜吐夕陽含素月而清淑英靈之氣鍾焉則其抱負若將無預於世矣一旦遇師襄翦其焦枯斲其盤錯輪斲磨礪合以膠漆製爲琴瑟被以朱絃徽以金玉登之清廟列之堂上金石相宣祝嘏合止可以格天神可以舞百獸可以平八風若然者材良而遇於用也若夫卓犖不羈之士殆亦

梅讀稿

卷十

五四明叢書

約園刊本

儀之今泉州府幕長王侯寧國簪纓胄也家食時德蓄前言往行該明體適用材美不外露若無預於人事人固未之識也猶材之伍於荆榛而芻蕘不之顧也及至遊芹泮登冑監試諸事而受斯職猶材之遇師襄翦斲輪斲以成琴瑟得不朱乎絃而徽乎金哉比至郡贊襄政治綜理卷籍凡厥事爲一揆以道正統戊辰沙尤二縣梗化朝廷命將統天兵來勦有竄匿南安境界者于時寧陽侯兵來駐泉選侯率衆追之侯於是展其籌謀奮其勇力出奇用正與下同甘苦而能得人之死力或

折其首或脫其距或獲其醜連克報捷泉之屬邑賴以
平寧尋以德化永春二縣各隘口爲逆賊奔竄往來交
關之所檄侯守之由是賊路拒遏窮迫就縛者衆而二
縣奔匿之民悉皆來歸未幾會德化缺長俾兼其政一
年之間勤勞徠善撫綏凋瘵之民變爲康強愁歎之聲
轉爲歌謳景泰改元以九載考滿例當述職達諸上司
不許民又往告留之又數月矣今迺援例決行德化吏
民復欲借留度不可得相與咨嗟涕洟若赤子之離慈
父母彷徨無措遂徵予文以敘其去思之誠予惟侯之

梅讀稿

卷十

六四明叢書

約園刊本

材果若是而良乎以之贊郡則郡理以之討賊則賊平
以之撫邑治宜乎吏民不忍捨去也今將入覲以述所
職天子旌賢資功列之侍從陟之方岳濟斯民澄海宇
何啻若琴瑟之登清廟列堂上格天神舞百獸平八風
者耶予賤且辱言不足徵而吏民之請辭不容已不幾
乎操斧於般門弄鐻於郢室者強顏而序之

送泉州府廣平倉副何君考滿序

予嘗讀魯論有曰不患無位患所以立至哉聖人之言
也今觀世之人惟思不得崇其位者爲患不思所以立

乎其位者爲患苟不思所以立乎其位雖徼倖崇乎其位而不致下人之譏貽自己之辱者吾未之見也泉州府倉副使何君淮其名惟深其字廣西梧州府滕縣望族胄也家食時讀書好禮立心制行自殊於人區品高下辨析是否一當於理爲滕月旦之翹楚者也有司聞其賢辟司文墨薦之京進試大廷文合矩度銓衡以其兼善書計擢授是職夫是職也班次至卑而所係至重所處至難也且泉之一郡七邑民之常賦於此焉輸泉之一衛五所軍之常食於此焉給與夫諸司官吏之俸道途軍旅之餉莫不出於此焉苟非有所立者而處乎此則錢糧如此之繁夥軍民如此之叢雜則出納會計之際眩然莫措拘拘於事入則多取以損於民出則剋減以虧於軍必衆議紛紜孰能禦之今何君處是出納均平會計允當若軍若民稱道者如出一口初不見其爲重且難也官府耳目其能俾署幕事適簿書期會之間事機酬酢之際略無虧隙之可議秩滿迨行藩府又檄署司獄事而囚之輕重各有攸分衣糧各有所給又以見君之材隨用而效非局於一氣者焉予始至泉聞

軍民稱道君之材德孔至未之信也迨今一年來久愈敬君之設施措署無不適宜而稱道之言非虛譽也孔子曰如有所譽者其有所試矣予於何君試之矣今將入覲述職司黜陟幽明者量材而超擢以之贊方岳以之佐州郡無所往而不可及何患乎所以立哉於其行也同寅趙君讓等及所與交者咸載肉崇酒追餞于洛陽橋亭酒既出文軸示余宜敘以識別余不能藻文以華其行遂直書其實以俟當道采擇云

文苑清玩序

梅讀稿

卷十

八四明叢書

約園刊本

玩金玉者眾人之所同玩文翰者君子之所獨夫金玉出於沙石之中適足以致人之富文翰出於好事者之手僅足以致人之清宜乎君子眾人用心之不同也其有能於富貴中而取清者必其才思優贍識見超卓之人惜吾未之見也一日清源郡守胡公之子文泰來旅于次因攜古今圖畫一帙名曰文苑清玩謁余求序予曰噫他人於官所回必攜金玉寶貨以資其家今獨以文翰相隨其可異哉及視行裝惟衣服與此而已余知其爲富貴中取清者也遂展而觀之而得山川花卉木

石之眞羽毛鱗介昆蟲之狀天光雲影煙嵐之態寺觀樓閣之偉觀竹籬茅舍之幽閒小橋野渡之旁通暨平人物隱居遊賞之趣棲品彙於尺素置萬里於方牋皆至精而極妙者至若竹葉鳥跡之篆文春蛇秋蚓之筆陣皆不可易而致者也余聞胡公之治清源也有蒼松翠竹之操有冰壺玉鑑之守故清源平治厥聲載途宜乎其子得家庭之訓能好文翰而取清視富貴如浮雲漠然無動於中也今將攜是編而歸故鄉出閩嶺而度三關過劔津而至嚴陵盡天倫之樂敘親戚之話啜茶焚香不以他物玩之而玩之以此相與指而議曰某也賢而隱遜某也隱而見徵某也退而閑居其閒必有可取法者某物機變之巧某物生成之奇某物禎祥之應其閒亦必識而辨之或臨池而模倣或濡毫而詠題則其清玩爲何如哉至於感慨今昔興發志意倣古人之出處則在乎子矣是爲序

龍江釣隱序

古之君子有其具而未得施其效者必遜跡山林任情漁釣以求其志以待其時豈肯銜玉枉道以徼一時之

利祿哉若今之楊君儀鳳卽其人也君之先有國諡公者闢室於龍山之陽積書以遺子孫代爲文儒每多達人至君得家學之尤藏易備之具求古人之志不與富貴名勢接不與聲色貨利迹寓情山水之間因自號曰龍江釣隱而請予爲序予惟隱居奇觀在於龍江焉涵龜峰控海門七邑之流於此朝宗時或清風自至翠煙自留一碧連天遼夔無外雲帆沙鳥往來翁忽者此隱居之勝槩也然而舟人漁子多萃於此罾罨罾麗織紅江流鳴榔擊楫歌唱誰呼者此漁人之得漁也隱君之釣有類於漁得無異於漁乎潮汐薦至信而有常波瀾湍流晝夜不舍海霞島霧變化無窮清風明月取用不竭一葦中流隨意所適於斯時也則企夫川上之歎而知吾道之運行而不已也奚計魚而梏於釣哉至若煙消風止水鏡湛然天光雲影上下相涵仰而之天有鳶飛焉俯而之淵有魚躍焉一曲滄浪舉無愧怍於斯時也味夫旱麓之詩而見吾道之昭著于兩閒也奚在釣而必得魚哉是知君之隱於釣者不在乎魚在乎道而已嗟夫子嘗求古之人有其具而隱於釣在乎道而不

在乎魚者曾幾人焉若太公望之遇文王張志和之終
於煙波其心則同其跡則異何哉曰是有命焉不可幸
而致也君今幸得優游山水安於家食遇卽爲太公行
其義以達其道否則爲志和守其道以終其生夫豈絕
物而忘世亦豈決性命以饗富貴哉君曰然遂書此爲
序

梅讀稿

卷十

十二

四明叢書

約園刊本

梅讀先生存稿卷十

梅讀存稿附錄卷一

梅邊讀易記

予友自懲楊君篤學君子也讀周易得先天後天之妙
嘗於梅下翫易以探義文周孔之奧閒有所得則語人
曰易本先天一理判而爲陰陽五行散而爲造化萬物
皆易也歛而藏之則歸一理推而達之復生萬物惟梅
亦然其始也稟一元之氣疏而爲枝條發而爲華葉皆
梅也及夫精氣凝聚則爲實實而萌孽復爲梅方其易
之未名渾然一理不知有造化萬物也造化萬物之生

梅讀附錄 卷一

一四明叢書
約圖刊本

各具一性不知本於易也正猶梅之初生塊然一氣不
知有柯條枝葉而柯條枝葉亦各自遂其性初不其出
於梅也指易而謂易斯易矣指造化萬物而曰易非易
乎亦如指梅而謂梅斯梅矣指柯條華葉而曰梅非梅
乎此予所以酷嗜乎易而讀易必於梅之下也聞微子
記嘗聞公所自謂於易與梅之理及所以傍梅讀易之
故旣已明白洞達而無事乎稱述矣試舉易與梅之資
於世者言之繫辭曰君子居則觀其象而翫其辭動則
觀其變而翫其占是以自天佑之吉無不利其資於世

可謂厚矣梅也暮春結實中蘊至味與作鹹之物同登
鼎俎以薦郊廟其資於世豈不深哉資於世者既深且
厚如此則公於梅邊讀易以究夫造化之理者夫豈世
人所識哉君與予斯文契家故不敢以瀆告姑舉其資
於世者言之若夫梅與易本然之體則公既自得之而
復屬其冢嗣守陳亦既造其妙矣資世之用豈不如易
之自天佑之吉無不利如梅之調味鼎俎以爲郊祀宗
廟之薦哉庸書此以俟時正統十三年歲次戊辰六月
望日賜甲辰進士中憲大夫都察院右僉都御史慈谿

梅讀附錄

卷一

二四明叢書

約園刊本

張楷式之書

賦得梅邊讀易四絕錄似復之先生侍史深媿
不工伏希笑擲

一卷殘經幾斷韋窗前老樹尙堪依春風吹破枝頭玉
悟得先天造化機

娟娟明月上梅稍讀到中孚第二爻何處人家雙白鶴
相呼相喚隔林坵

爲愛羲皇畫後辭伊吾長到夜深時屋頭幾樹梅華月
還笑林逋錯詠詩

梅華落盡苦難收
白髮窮經肯暫休
莫道明時才竟屈
調羹消息在枝頭

辱知金湜稿奉

白雲堆裏雪梅開
凍合香飄講易臺
勿怪調羹心事負
枝頭青子已枚枚

時正頓首書于時雍官邸六月之晦月

賦得梅邊讀易五言近體一章奉復先生之命
耳詞極鄙俚奚足發揚改教爲荷云

孤山清絕處楊子數椽廬
瘦影半輪月閒情一卷書
薜

梅讀附錄

卷一

三四明叢書

約園刊本

浮寒榻外聲徹夜窗虛
地僻人稀到探玄樂自如

無名氏

梅邊讀易詩

韋編三絕老梅邊
悟入羲皇畫卦前
蓓蕾未分含太極
孤根獨煖得先天
月移疎影臨窗几
風動清香襲簡編
萬物靜觀皆易理
隨時從道樂華年

慈谿陳敬宗 祭酒

梅窗展卷思悠然
讀過羲經第幾篇
索笑自占宜白賁
和羹先兆得金鉉
驚春臘月連正月
江總梅詩臘月
正月早驚春 觀

象先天與後天試看千花原一本心爲太極是真傳

南山黃潤玉 僉事

半世窮經鬢有霜三冬挾冊近梅傍巡簷索笑花無語
滴露研朱點亦香未擬和羹如傳說且須映雪似孫康
平生不作羅浮夢月落參橫誦幾章

桐廬姚夔 吏部尚書

齋前百卉盡枯茨惟有孤根煖獨回貞下起元春意泄
無中有象玉花開細推康節觀梅數如對包羲畫卦臺
韋氏一經傳素業連枝俱占百花魁

梅讀附錄 卷一

四 四明叢書

月湖陸瑜 刑部尚書

臘盡梅開玉半林歸藏讀罷自沉吟三冬陰戰玄黃色
一白春回天地心淺淡妝來真絕代吾伊聲外少知音
纍纍結子堪調鼎方識東君著意深

鄉晚生毛弘 都給事中

梅是百花魁書從一畫來觀梅推理數玩易傍花臺萬
理從頭解千花次第開專門精此業世出奪魁才

門下生章鑑 給事中

敬梅軒記

敬梅軒者翰林編修吾鄞楊君守陳之書舍也君之先君子自懲公明易經篤學好古有志斯世嘗卽軒之前植梅以自況曰吾非徒愛其本根貞固先春而葩繁有感於商宗命說之言殆將觀其實之成以致於用焉而公被薦入朝請試藝于京闈弗售僅沾一命仕於閩嶠數千里外不竟其施以歿君於是親手澤之猶存思封植之不替兢兢朝夕如執玉如奉盈肅乎神明之格警歎之臨因以敬梅名軒請予記夫梅植物也昔之好者衆矣若何水部若林逋第皆資之以爲吟賞之適非所以比物徵義也惟宋廣平之在唐賦以見志其詞若未幾於雅馴而其指微其意遠其冰霜之操鐵石之心自有不可得而揜者其後翊相武氏當危疑板蕩之時忠言讜論如秋霜烈日義氣凜凜百折不衰高映千古斯真無媿於梅者孔子所謂歲寒松柏信不誣哉雖然以今揆之君之先君子所存使其幸而志遂功名事業必有卓然大過人者而終於偃伏不信豈不重可悲夫抑予又聞前人之所欲爲爲其後者能嗣而成之斯之謂孝不特桑梓敬恭而已君以敏達之資夙承家學之

懿亦既魁鄉選第進士以陪列金馬玉堂之署是有其時有其地矣其於趾美乎何有擴而充焉則爲舟楫爲霖爲礪爲鞠藁皆吾分內事和羹云乎哉先公有知當不悼其不終於九原矣以予辱交於公與君有斯文之誼因不讓而爲之記天順庚辰中秋日郡人馮損之

敬梅軒賦

主一而無適者其爲敬乎自宗廟而朝廷猗父兄兮師長均此敬而不殊出降衷兮非強若夫出門如賓承事如祭乃持敬之所存無須臾之或離亦有鄉人之長長

梅讀附錄

卷一

六四明叢書

約園刊本

我伯兄庸故在兄斯須鄉人皆天理之所繫與凡物而不倫卓哉楊子俊傑之士左儒右墨出經入史旣持敬於天倫復推誠於凡卉拳拳於梅之是敬往往啓人之非譬迺有二客疑而未定爰造於予以取厥正一謂梅植物也剛勁其姿貞白其性雖霜雪兮莫欺與竹松兮可並但當充吾博愛之仁難以啓吾主一之敬主一敬德之聚也動必有道擇必有宜待人而行隨義而施所當協吾心以用者豈可於非類而加之乎余應之曰二者之論固各云然楊子之心則有主焉予交楊子而知

其事者故敢抑二說而爲之抗言君之先子志慕易學
理悟先天業開後覺不安於雪案螢窗獨愛此梅邊之
樂其故何也蓋以易原一理梅根一氣理散萬殊氣周
萬樹運造化分育羣生資柯條而養根蒂故知梅之斂
則知易之所存知梅之敷則知易之所施知梅之傲睨
乎乾坤則知易之周流於天地以易而觀梅不殊以梅
而契易甚易故終身樂此而不移期以因心而觸類今
楊子之繼志述事也過庭有訓弓冶有傳得易之旨於
梅之邊雖梁木之壞矣幸梅樹之存焉不於此而加敬
是得魚而忘筌故其於梅也愛之無移觀之不舍屏氣
而觀斂容而坐過之如入公門倚之如軾路馬對之如
對嚴君尊之如尊冕者巡簷索笑如學禮而學詩疎影
暗香似緝熙乎純嘏匪曰足恭於目前實爲懸思於膝
下豈若愛竹之比君子拜石以爲丈人封松立大夫之
號美蘭歸隱士之倫見觀裏之桃而感舊規窗外之花
而思人者哉二客聞已洞識其非爰扣楊子決以所疑
楊子曰先生其知我者予復奚以言爲遂坐客於梅下
酌卮酒而歌之歌曰梅開兮有英親歿兮有靈契先天

於讀易垂後訓於過庭親亡兮梅存見梅兮敬敦每聞
香兮躡影若顏和兮氣溫二客倚而和之曰文比花兮
德比仁闡易道兮存天真傳一經於梅下期世世之相
因歌既闕二客修容而起歛衽而別如滯得通似盲斯
豁走復於予遂終此說天順元年仲夏中泐賜甲辰進
士前中憲大夫都察院右僉都御史征南監軍慈谿張
楷書

題敬梅軒詩

軒前雪後見寒梅忽憶椿庭手自栽翁府方期千載壽

梅讀附錄 卷一

八四明叢書
約園刊本

賢郎已奪百花魁步隨流影辭苔徑坐拂清香避酒杯
培植本根勤愛敬一枝一葉敢傷摧

休樂老人敬宗光世

君家軒前老梅樹敬之如神不敢忽年年歲歲謹封植
重是先人舊時物枝柯蝕盡苔蘚皮花開每值冰霜時
琴尊手澤久猶在夢寢藥牆親見之慨想當年栖隱處
三絕韋編真得趣和氣猶能感紫荊角弓尚不忘嘉樹
憐君敬梅如敬親幽軒靜對清無塵題詩愛寫月中影
淚洒長思泉下人先翁種樹如種德條枚未許輕攀折

薰風佳實滿枝頭鼎滯調羹看命說

臨川講大年 教授

先人手絕韋編處舊屋寒梅尙儼然自寫箴銘懸座右
肯容兒女戲花前長因對雪衣冠立時爲留賓几席遷
一度開軒一瞻仰巡簷索笑更何年

吳興張寧 給事中

重是先人讀書處每見寒枝必整冠影地引泉開墨沼
華時買隙置雕闌行吟皓月非關醉立侍東風敢憚寒
千載相傳同手澤子孫珍愛媿珠玕

梅讀附錄 卷一

九 四明叢書

約開本

鄉人夏時正 大理卿

一見梅花便整襟先君讀易此潛心角聲催漏偏難寐
月影當窗敢浪吟含綠萼成齊拱璧傳黃子熟賓兼金
東風後夜飄香玉人物俱亡恨轉深

雲開錢博 按察使

雲塢虬枝父手栽玉堂詩卷映三台肅焉敬止吟哦處
難寫孤芳萬古懷

臨川吳與弼 徵士

梅讀存稿附錄卷一

梅讀存稿附錄卷二

歲除高詠卷敘

除夜感懷詩七言八句一首迺四明楊復之先生待次
寓京邸時所作也維新學士先生重惟手澤存焉和者
咸一時文雅迺用裝璜爲卷屬太僕金公本清題其卷
首閒持示余余得受而卒業焉惟先生之詩辭氣溫厚
屬對精切而藹然忠孝之念見之篇終所謂和而莊寬
而密發乎情止乎禮義者歟先生通經好古踐履淳篤
嘗抱其有試而不合退晚得一官復非其志夫當天空

梅讀附錄 卷二

一四明叢書

約園刊本

景晏旅寓孤羈其寄情節序忘其抑鬱不平而惟君親
在意非知道其能然歟余聞君子所遇有不同者時也
窮約榮光往來何常浮雲然耳其所守而不易者操也
一志不分蓋必有皎然不可昧翹然而獨立者矣故能
歷萬變而凜乎松柏其後凋障狂瀾而屹乎中流之砥
柱夫豈偶然之故耶天下有廣居也惟君子能居之天
下有正位也惟君子能立焉天下有大道也惟君子能
行焉是以繩樞甕牖安之而不以爲病也抱關擊柝能
使其官大也板蕩崎嶇視之平康正直也是以有以樂

其樂譟聲若出金石也余之知先生者如是九原其可
作乎當亦以可與言詩見與矣成化丁酉冬南京大理
寺卿致其事仁和夏時正書于城陰之儼儼所

除夜 正統十年

新歲將來舊歲過客窗便覺轉陽和忽燃爆竹除殘耗
還著朝衫看舞儺綠酒飲餘愁尙在清燈坐久夜如何
君親未有涓埃報爭柰星星髮漸多

辱示除夜佳作依韻奉和用博一笑云

京華又見一冬過陽氣先回四海和葦戟桃枝天上賜

梅讀附錄 卷二

二四明叢書

約園刊本

朱衣晝務禁中儺感時倍覺君恩重懷土無如旅況何
守盡殘更朝謁去春城萬井曙鐘多

東吳李黃 兵部侍郎

昨見除夜佳作詠歎久之用次厥韻錄如左方
歲除長在客中過共說時平俗更和萬戶燃燈皆祀竈
九衢撾鼓盡驅儺送寒已覺春歸近守歲無如漏永何
明發與君同覲闕遙空雪霽五雲多

潮陽林厚 山西參政

守歲俄驚乙夜過紅爐宿火散春和此時對雪金杯滿

明日朝天玉佩儺詞學世誇唐杜甫勳名人擬漢蕭何
窮堅老壯男兒事莫爲流年感慨多

四明復之楊先生學行高邃而屢困場屋未遂
厥志嘗作除夜詩一律其所感慨深矣兵部侍
郎李公賁刑部郎中林公厚皆其知己也旣爲
和之閒以示予予亦敬和如右但珠玉在側覺
我形穢耳
草窗劉溥 太醫院判
和梅讀先生除夕感懷

一年將盡二更過頓覺東風釀黍和棲穩林鴉驚列炬

梅讀附錄 卷二

三四明叢書
約園刊本

途窮疫鬼畏驅儺流年華髮悲無極厄閏黃楊柰若何
窮達於人知有命老來深願子孫多

寧陽許彬 侍郎兼學士

深巷幽扉少客過自將高調付雲和年華亦是雙奔轍
造物眞如一戲儺闕里門生輕管仲新豐游客待常何
良宵且向尊前醉柏葉千鍾莫厭多

慈谿張楷 僉都御史

奉和除夜之作具藁如左效顰之譏諒不能免
也呵呵

一歲光陰又復過，雪晴風細晚鐘和。畫堂紅燭千鍾酒，紫禁朱衣幾隊儺。歲月莫嗟顏駟老，才名誰忤子雲何。試看佳製生光彩，滄海驪珠萬斛多。

東吳錢溥

南京吏部尚書

奉和除夜詩韻

又看寒冬一度過，帝城風物見時和。翠簾光動家家燭，畫鼓聲喧處處儺。白髮數莖嗟我老，陽春一曲奈君何。明朝共飲屠蘇酒，花柳千門淑氣多。

安成吳節

太常卿兼學士

梅讀附錄

卷二

四一四明叢書
約園刊本

次韻錄奉復之先生一釵

浩漢功名五十過，空懷珠璧並隋和。蕭蕭行李青氍在，楚楚衣冠珮玉儺。身外所需惟藥耳，時閒未遇奈材何。渭川亦有鷹揚老，莫惜流光感興多。

尋交夏時正

大理寺卿

坐惜年華夢裏過，弊裘禁冷待陽和。沉香火底誰吟曲，爆竹聲中人舞儺。旅抱可堪孤憤在，才名其奈五窮何。巡簷試與梅相問，春到南枝有幾多。

東海徐程

武功伯

奉和除夜佳什錄似梅讀先生侍史深媿不工
伏希改教幸幸

爆竹聲中夜未過家家絃管笑相和只疑楚俗猶驅疫
不道金吾亦進儺柏葉杯殘知歲盡椒花頌好柰春何
五更又整朝天珮共喜新年雨露多

侍生金湜 太僕寺丞

奉和梅讀先生嚴律希笑擲之

俄聞爆竹一年過謾擁紅爐滿室和驛使從今傳煖律
鄉人倣古制時儺圖新盡道明朝是餞舊其如此夜何

梅讀附錄 卷二

五四明叢書
約圖刊本

詩酒相忘梅讀處森森蘭玉爲君多

光溪趙政 刑部郎中

昨造華第辱示除夜之什讀之不覺技癢輒敢
效顰錄似求教

客舍滔滔歲月過隆冬欲盡向微和紅椒盤裏花無數
翠柏壺中葉有儺鄉思可能忘楚越才華應擬勝陰何
草玄莫道無人識明日春風雨露多

東里陳紀

奉和梅讀先生除夕之作

歲晏詩筒一度過，雞林聲價重隋和。頭風已愈今人檄，厲鬼還驅舊疫儼。交誼從來忘爾汝，才名畢竟屬誰何。明朝載取屠蘇酒，唱和樽前感慨多。

江陰十莊 戶部郎中

伏讀除夜佳作，忠孝之情，藹然溢于言表，非獨辭律之美而已。勉強奉和，甚爲嚴韻所窘，深媿不工。誠所謂持布鼓以過雷門者也。萬祈斤削，是幸。

一冬渾是雪中過，纔入新年景象和。燈火舊看吳市博

梅讀附錄 卷二

六四 明叢書
約園刊本

鼓聲遙識漢宮儼，試傾柏葉香。偏美借問梅花信，若何聞道先生歌。白雪調高安得和，人多。

東吳徐瑛 中書舍人

和梅讀先生除夜寫懷

椒盤獻頌一年過，煖入屠蘇氣漸和。共惜光陰同守歲，獨慚風俗盡驅儼。青雲有路憑誰引，白髮無情柰老何。試向梅花探消息，南枝底事得春多。

江東曹冕

鼎鼎百年隨分過，光塵漫爾亦同和。失時自合虎爲鼠

閱世翻成鬼逐讎原氏貧來非病甚顏郎老去柰時何
紛紛得喪俱塵土贏得清名身後多

遽瑗行年五十過伯淳氣象一團和天人妙契能通聖
神物馮呵底用讎弈世詩名唐杜甫傳家易學漢田何
勾章自昔文儒盛德業如公政不多

閒中歲月靜中過孤竹清風柳下和文解送窮聊自劇
詩成泣鬼不須讎頭顱種種遽如許世態悠悠能幾何
不朽只消賢子在尋常名利孰爲多

瓊山巨擘

尚書兼
大學士

梅讀附錄 卷二

七

四明叢書

約園刊本

五十流光暗裏過窮途誰謂有陽和憎年滿眼屠蘇酒
逐疫喧騰晝袴讎爆竹聲寒灰欲盡萼梅春信曉如何
獨憐雙鬢無情甚得喪於人白易多

姚江魏瀚 布政使

流光忽忽夢中過且飲屠蘇樂太和故國青山空繚絡
御堤金柳又猗讎都緣詩債渾無暇未遣文窮可柰何
明日趨朝應有喜燈花先已得春多

華亭張弼 南安知府

畫袴前頭小隊過九重天樂奏雲和先王典籍存周禮

昭代官儀陋漢儺節物屢驚成往矣詩名空在柰愁何
無人不和陽春曲歌舞雖多淚更多

嘉禾周鼎

光陰長歎客中過明日三陽氣又和也欲送窮追古作
不須逐疫效鄉儺一官末云勞形役百事無成柰老何
欲罷屠蘇思熟睡怪來兒女笑言多

姑蘇奚昌

進士

殘臘韶華此夕過坐看天意漸回和椒盤滿薦家家酒
畫鼓頻催處處儺不向門庭祝茶壘謾將詩句鬪陰何
酣歌慷慨風流遠三度遺音恨轉多

梅讀附錄

卷二

八四朝華書

約園刊本

儀真黃錫

旅舍邊城少客過灰飛葭管轉陽和漫書茶壘同燕俗
獨對梨樽聽魯儺白髮又添嗟歲暮青雲無計柰愁何
朱門先達應無限誰道揚雄賦最多

慈水翁禧

府經歷

近承錄示除夜詩辭鏗意粹可愛可愛茲踵嚴
韻聊伸相羨之私希改教萬幸

殘冬物色眼前過明日逢春喜泰和官舍笑談傾歲酒

乍階升立待鄉儺年來已羨青雲達老老新添白髮何
坐對曉鐘清不寐梅華窗外暗香多

友生章珍

四時玉燭一宵過景逼正元氣轉和三殿鼓鐘嚴宿衛
九衢燈火擁鄉儺故園可是梅開未芳甸其如雪霽何
待漏方將歌萬歲頌椒佳興坐來多

宋恢

敬和梅軒先生除夕詩韻伏希斥正

一年光景又將過寒盡須知候轉和萬井香燈同守歲

梅讀附錄

卷二

九四明叢書

約園刊本

千門簫鼓共迎儺梅花影裏吟初就爆竹聲中思若何
自是皇都春意早上林拂曙鳥鳴多

余賓

奉和除夜詩韻錄乞改教是禱

光陰迅速隙駒過又見東風氣轉和萬井兒童喧社鼓
幾家冠冕待鄉儺眼前那得無憂者世上誰能奈老何
獨有先生心似水鏡中白髮亦添多

周祉

獨坐寒齋守歲過漏聲催曉轉陽和醉拈班管題新帖

笑看兒童學舞儺物外功名安淡泊江南風景樂如何
自嗟來日年徒長鏡裏羞看白髮多

侍生張應騏

梅讀先生異時以科目不偶僑寄京師因而有
除夕感懷之作予亦蹇連於仕途者誦先生之
作而重有感焉於是次韻一章以續貂于左蓋
效慕之切不自知其握鼻之可笑也

流光荏苒客中過抱玉誰憐似楚和丸印朱泥啞土俗
鼓喧赤幘看鄉儺數聲爆竹知春近明日屠蘇柰老何

梅讀附錄

卷二

十四

明徵書
約園刊本

自信丹心猶未變傍人餘論或相多

番陽童軒

南京禮部尙部

深巷無人載酒過獨眠蓬室養天和椒花定是誰家頌
爆竹徒聞幾處儺窮似退之終有待飲如袁盎日無何
明朝試展書帷看萬井春花雨後多

合肥方臬

主事

守歲京華丙夜過寒威轉眼變春和深香甲煎隋宮燎
畫袴朱衣漢殿儺柳下肯因三黜去昌黎共柰五窮何
賢郎今在瀛洲上禁直從容寵數多

吳興唐廣

一度年光流水過又從梅柳見天和春盤聚飲延分歲
朝服升階遣戲儺髮墜銀絲嗟老矣眉橫粉黛奈愁何
尋思急措遊山興日醉風花苦不多

武昌陳謙

坐見光陰瞬息過青皇又欲駕羲和屠蘇煖入千門酒
晝袴衣翻四隊儺耿耿丹心應自壯星星白髮柰渠何
東風一夜回生意海宇重看景物多

海虞凌遠

梅讀附錄

卷二

十二四明叢書

魏園刊本

敬和除夜詩韻錄呈梅讀楊老先生前輩閣下
伏希改教是荷

子雲門巷少人過獨對遺經養至和萬里秋風蟾桂遠
幾回春雨隲桑儺一年光景從茲盡半世功名竟若何
天路青雲看漸近前途荆棘已無多

半世光陰迅速過明朝漸覺近陽和兔毫且自題春帖
熊帽還看舞大儺司馬無心干狗監馬周有日遇常何
承家喜有青雲子不負人誇百不多

流光汲汲隙駒過歷盡冰霜氣漸和莫嗟敵寒無臘醞

喜看驅疫有鄉儺青雲入望愁如許白髮侵頭恨若何
若把功名期呂望子生年紀尙無多

慈谿侍生張斐

光陰瞬息隙駒過爆竹聲中律轉和玉歷先春傳萬國
金吾此夕進羣儺羈懷憶昨悲時舊華髮逢年柰老何
入手柏醪須盡醉五陵車馬不勝多

昌國陶恭

年華又向此宵過大地陽回氣漸和佳景得歡宜盡醉
盛時無疫不須儺送窮尙憶唐韓愈高壽空聞蜀李何
最是賢郎觀手澤青衫幾度泪痕多

梅讀附錄

卷二

十三四明叢書

約園刊本

魏偁

今宵臘盡歲云過從此人閒氣轉和院院送年燒野竹
家家祛疫舞鄉儺春隨斗柄回多少寒逐散灰去幾何
曉近牆梅探消息向南枝上見花多

車馬紛紛徹夜過隆寒送盡又春和雙笙紫玉吹韶樂
四目黃金舞國儺歲月催人如轂轉功名老我柰愁何
明朝獻頌金鑾殿惟有辭臣雨露多

吳興丘太祐

土牛前日送寒過當見春風轉泰和賢路有才終見錄
聖宮無鬼不須儼杯中柏葉香尤在簾外梅花意若何
看取燕山寶家桂餘芳傳與後人多

慈谿王淮

跋梅讀先生遺卷

正統中予仕路曾識今翰林侍講學士楊公尊翁梅讀
先生先生今已作古人而其主器守陳字維新高科顯
仕于朝朝廷追贈梅讀先生爲翰林編修次子守陟字
維立亦擢高科爲翰林編修猶子守隨爲監察御史長

梅讀附錄

卷二

十三回 謝 叢書

約 閱 刊 本

孫茂元爲刑部主事次孫茂仁已未領鄉薦其餘諸姪
孫爲府庠生者非一人一門榮盛世罕能儷豈無所自
然耶蓋必梅讀先生有莫大之陰德是以享莫大之榮
報吾知諸昆仲將來名位所至必皆遠大無疑也書以
俟之成化十四年戊戌秋九月初吉衰疾退夫長洲韓
雍永熙識

梅讀存稿附錄卷三

贈遺詩文

近知文旆之京強搆鄙歌一首用陳數年交愛
之情以壯萬里雲霄之志伏希笑覽斤正幸幸
長空八月風力高羣鳥養羞爭真巢此時鴻鵠偏得意
扶搖直上凌雲霄功名有若楊氏子壯懷正與鴻鵠比
桃華浪煖姑不行亦俟秋風奮然起秋月皎皎秋日晴
蓼紅蘋白連洲汀山中黍熟得新釀一壺持送登蓬瀛
沙頭不忍分襟別握手臨風情最切飛黃蟾蜍固有之

梅讀附錄 卷三

一四明叢書
約園刊本

強搆愚辭陳略節我昔同門忝知舊盟言並效功成就
何期不肖早歸田寂寂柴門掩清晝幾回謾憶楊與趙
二子昂藏出人表但知才貌無妍色詎料升騰有遲早
趙郎已見魚化龍君今志氣如長虹胸襟特達抱經濟
此行必遂謀爲同蟾宮擬折丹桂枝讀書不負寒窗時
佇聽金殿拜恩寵綠袍換錦聲名馳雙親堂上已垂白
祿俸分將養朝夕臣子職分宜兩全永作家邦後人則
子雖忝在平生契亦望音書早傳遞不圖拔茅連茹私
恐免相思遠繫繫

鄉溪張琳稿奉

鸞鴛篇奉寄復之楊先生閣下燕陋不工伏惟
目入幸甚

睠彼鷗江湄飛飛兩文禽生偶一何擊比翼復同心奇
毛賁五彩往來雲水深晴眠渚沙上兩息菰蒲陰朝夕
此遊行情好無或侵豈知中道阻況迺異升沉雄歸五
雲裏照影天地濶音容踵殊愛不啻珍與琳羈雌獨留
滯戚戚悲故林驚風摧弱羽胡能諧遠尋本期金石固
倏忽如辰參何時遂良貽庶以釋煩襟莫學孤飛鳳遲

梅讀附錄 卷三

二四明藏書
約園刊本

回戀遙岑

侍生宋恢頓首

鄉友楊公復之三世讀易學行俱優交好甚篤
茲子遠鄉賦詩一首以別

萍水浮游我共君客窗風雨話離羣一經父子皆名世
四聖門庭久策勳踏踏甘爲明主棄倉皇忍與故人分
親闈若問天涯事道子朝朝望白雲

慈谿張楷

友生陳彥端頓首書奉

復之仁契先生坐下嚮在京師禮勤會數膺志同而心契所謂若飲醇醪不覺自醉者及至定適當孔道星使之往來者肩摩踵接僕僕送迎殆無虛日由此遂久闕其書啓之禮疎慢取罪幸以明哲雅量無所銜之茲左繡衣至忽辱書承示別後體況清適且喜贊政蘭臺公外足以游心載籍兼審三令弟動履亦獲康勝殊慰企渴往年見長令子幼而騰異心已卜其遠器今其長也聞能漸進于學不較其成就當有大過人者異日蓋不負所期也區區忝竊科第授此學職然以材薄力綿教靡成效碌碌而無所裨耳乃承喻以衰拂之辭併致期望之意是待之厚而愛之過其何敢當此哉相見無期臨書悵惘惟祝倍萬保重不宣正統癸亥冬十有一月朔旦友生陳彥端頓首再拜奉書

林氏分書田記

林子當休沐之日諸子踞而言曰世之人多置良田爲子孫計獨大人以官爲家以祿爲田兒輩自能食時食大人俸餘今弱冠者垂髻者字育恩厚矣然縮郡章九載不殖厚產典文衡三次不放美莊第恐大人登耆老

之年致政南歸祿不入於家兒輩不知稼穡之艱難將何以仰食耶大人幸留意焉予拂然叱之汝輩真豚犬耳吾家世居官清白將何以遺汝乎不殖厚產吾不敢犯蕭何之律不放美莊吾不敢荒陸氏之莊且賢而多財則益其過吾豈敢玷清白以益汝輩之過乎既退靜而思之兒言亦有理四顧環堵蕭然惟先君子積書一厨在翌辰乃召舉臯壘準申立於前曰吾爲汝輩置良田久矣以力尙弱弗能耕故未之分今當支分與汝耕矣有田一區在魯地凡十有二頃爲二百四十有二畦

梅讀附錄

卷三

四四明叢書

約園刊本

乃吾家世業舉乎汝嫡長世業之田當汝耕爾祖嘗耕之初不甚獲歲之所入少至晚年始大獲一歲得米二百五十二石迨予承其業懶弗肯播耰故所獲減於先然一歲亦得米九十二石遇年若豐或有倍於是不可知然是田有嘉穀焉有狼莠焉閒有螟蟲蟲賊害稼者焉苟不屬辭以治之比事以去之則大無麥禾矣汝當鋤削狼莠培植嘉穀使善惡判然明白且修德以去其能害稼者然尤須憂勤惕厲以祈六月之雨則不止有年將大有年矣乃取周地田以命臯曰是田計六十四

畝爲畦三百八十有四其壤始於乾州終於濟水自耒耜教耕之時已懇之矣治田必貴乎及時耕以時種以時耘以時俾其田潔淨而無草萊之穢則所獲之米精微而無莠稗之雜矣三子暈性頗敏乃分田四大邱曰虞曰夏曰商曰周其土有九等所入之賦亦有九等焉田閒有九河灌溉之暈乎是田廣而用力多汝必力穡乃有秋九河勿令其湮塞須疏通以致其遠然耕之之要貴乎得中自日中星鳥而東作興以至宵中星虛而西成畢中之一字不可失也吾嘗耕是田而未卒業汝若弗力穡則人謂之曰厥父蕃厥子弗能播矧肯穡乎汝必勉之惟準性浮薄故以田三百十一畝俾耕之是田爲方不一自周南召南以至十三國地甚博也其疆界則有正焉有不正焉汝當耕其正而治其不正所謂思無邪是也然鹵莽而耕之則鹵莽而報之滅裂而耘之則滅裂而報之必也一之日于耜二之日舉趾溫柔以耕之敦厚以藝之于以戒汝之性焉屢遇豐年則芄芄黍苗實堅實好我黍與與我稷翼翼千斯倉而萬斯箱可期矣申也少然聳教小兒先要安詳恭敬故取田

三百畝於大戴小戴之家卑申耕之是田自王制一定之後其五等分地甚均然其閒曲折之勝有三千耕之貴乎恭儉能恭儉則歲之所收足乎用又貴乎莊敬必如古人衣冠而耕蒸嘗之田又若耨於畝畝閒其妻饁之相敬如賓之類是已申乎吾教汝耕之法曰毋不敬既分其田復進之曰世之人皆安土重遷雖有愚公之術莫能移吾與汝輩之田可以卷舒而隨身且耕不用犁而用舌耕耘不用鋤而用筆無沾體塗足之勞無水耕火耨之苦力省於三農而所獲萬倍焉雖然魯西邑

梅讀附錄

卷三

六四明叢書

約園刊本

名嘉祥其地產麟夫麟乃文明之祥今逢文明之世麟當出矣舉乃吾家千里駒汝有獲當貢于廷與之偕遊郊藪焉臯耕周田既有秋勿家食當觀國之光以利賓于王可也畷所耕之田伊尹嘗耕之矣汝能志伊尹之所志則迪簡于王廷有日矣準之田既熟必有臺萊之徵則當歌鹿鳴之什申之田既稔必至論定然後官之任官然後爵之汝輩當勉之哉章也最幼時亦坐膝上曰兒獨無田乎予笑曰汝力未勝耒耜俟長當以次分汝諸兄田然吾尙有私置之產一所其壤甚小四方不

過寸則吾自耕自耘者汝輩今日所不能與其力他日當與耕之是田之利非特汝輩食其報雖若子若孫尙亦食其報焉諸子請問其地久之乃願曰厥田在靈臺之下丹府之中請問四至曰東至高門于公田西至三槐王氏田其北則以燕山竇氏心地爲準其南則以吳中范氏義莊爲鄰云客有聞者鼓掌而笑曰以五經爲田則近乎迂以方寸爲地則涉乎誕先生眞迂誕之儒也予起而謝曰是誠迂誕矣獨不聞先賢云吾家無厚產經史是良田乎又曰但存方寸地留與子孫耕古人

梅讀附錄

卷三

七

四明叢書

約園刊本

迂且誕於前矣子特捧腹而效顰庸何傷客乃赧而退諸子復告曰大人教兒輩耕固善矣如水旱饑饉何惟先聖有云耕也餒在其中矣學也祿在其中矣人事旣盡天理自見夫何疑於是作分書田記俾舉輩各書其一以置之田舍之壁時正統六年秋七月吉賜進士出身奉直大夫刑部郎中潮陽林厚撰久不能造拜然亦不承枉顧思仰何可言昨撰得分書田記錄去乞發一笑亦望指教甚幸餘非面莫盡厚頓首

二月二十日辱友李蕢頓首再拜

復之先生執事卽日春和計惟文侯體勝朝夕溫清外
與故舊相詠觴樂可知也僕德薄能鮮叨此厚祿常以
爲愧比者遷貳夏卿尤懼不勝其任先生有可以見教
者幸無吝也豚子聰失所依歸舊植頓落尤希遠賜教
言俾萬一有成詎敢忘所自邪因風草草奉伏不宣贊
再拜

送楊先生歸省序

予官翰林與尙書刑部郎中今山西大參林公厚交篤
正統辛酉春往公第獲面四明復之楊先生於文館接

梅讀附錄

卷三

八四明叢書

約園刊本

其容煦乎春風之和也聆其言肅乎秋霜之厲也探其
學浩乎淵源之溥也於是予亦遣子禎從之而往返彌
篤語及令尊甫栖芸先生德業淑諸人也博登其門而
穎異材成者不可勝計若今地官章公繪蓋其一也干
以識夫先生之學有所自矣居夫何先生秋闈弗捷子
以內艱去參商相望者幾年而予來京師先生數對
大廷登名仕版亞司馬姑蘇李公茂實聞先生之賢延
聘于家授諸子經而林氏昆季泊予子禎復得就正門
牆立寒雪挹春風者踰年而先生謁告歸觀嗟乎先生

之才之德雖未克行之於時大展所蘊而乃涵養德器
獎引士類殆亦孟子所謂育才之一樂歟今之歸也父
母俱存而兄弟具在峩冠博帶謁拜于高堂耀光乎里
閭其爲先生之榮且樂又可知矣他日踐崇階躋顯秩
以其蘊諸已者而措之於用以其淑諸人者而施之於
民將見豐功偉烈掀播于時耿耿而不磨則豈惟先生
之榮抑亦邦家之光也先生之行生之父兄及嘗與交
者置酒酌別謂予贈言於是平書正統十有一年歲在
丙寅夏四月初吉賜進士大理寺副儒林郎兼翰林檢

梅讀附錄

卷三

九四明叢書

約圖刊本

討東里陳紀序

拙作奉送楊先生歸四明

自笑京塵染客衣春風空老故山薇舊時手種寒梅樹
留得琪華待子歸

鄉後學夏時正拜奉

聞知老兄有閩嶠之行略不足較孔子大聖萬世所宗
而一屈於乘田一屈於委積自古如斯尊兄盛德宜有
所俟此何足計第安之而已遠大之期何可量也呵呵

益頓首

復之尊兄契家

唐律一首奉寄司倉楊先生幸希電矚

温陵山色海東頭兩髻清霜此地遊
祿薄自甘營國計家貧應只爲親謀
章編夜雨孤燈坐玉粒西風萬斛收
尼父當年勞會計晚從司寇表春秋

慈谿張楷都御史

對鷓鴣賦有序

對鷓鴣者侍講學士錦川楊先生繼父志而作也楊之
隴故有閣家徙而閣亦廢先生之父梅讀公從祖父避
地而歸漸復故宅嘗遊川上誦李左祐南風不用蒲葵

梅讀附錄 卷三

十四明徵書

約園刊本

扇紗帽閑眠對水鷓之句蓋其志欲復故閣至先生而
成焉東陽從先生官翰林獲觀所自爲記又從其弟府
丞維貞編修維立鄉進士維德及其子員外郎志仁聞
茲閣始末爲詳乃作賦曰鏡川先生之作對鷓鴣也開
扉其陽設牖于陰乾藩坤籬山帶水襟遠則雷峰天井
石樓木阜錫嶺金峨翠巖雪竇天童育王驃騎車廐四
明中空五馬羣走句餘武陵之墟聖公隱仙之居左盤
右紆莫詳其餘近則金磧珠潭芝山桃浦北渡南塘蕪
湖蓬渚六滂兩川十洲三嶼花迷學士之橋竹暗尙書

之墅奇蹤麗跡不可僂數於是啓扉而入則飛籟灑地
鳴琅戛空鱗瓦動日翬簷挾風上下轆轤東西冥濛藏
虛納秀後與川通開牖而眺則屏圍畫張澄練秋碧長
林落日倒影千尺平岡一綠與望俱極若乃岸芷洲蘭
灘蓼汀蘋杞柳樛樛而落蔭芰荷的歷而敷芬鳥鷺結
伍鷓鴣成羣鷺跼跼以如墮鰓洋洋而若馴時有白鷗
西來載汎載游旣飄揚以雪舞忽浩蕩而雲浮先生方
對客高詠覽物尋搜獨宿留以延佇若嬰情於彼鷗客
有在席者起而問曰何爲其若是也先生曰噫此吾先

梅讀附錄

卷三

十一四明叢書

約園刊本

君子之志也試爲子言之我居楊隴自宋及元傑構連
甍有閣嶄然國版更肇家徒外遷鞠彼蓬蒿蕩爲荒園
百礎星落下沈清淵先君子常倦焉於此矣復芸栖之
故地創梅讀之新軒歌越里之雅調誦唐人之遺篇蓋
將拂蒲葵而小憩岸紗帽而閑眠時度隙景志齋重泉
彼鷗何心以歲以年予乃晨興暮思左相右度木嶽峭
嶸石疊塋确十稔交閱七楹並落幸往志之粗償恨九
原之莫作今我與子游神丘塹放意觴酌孰懷厥憂孰
響其樂睹羣鷗之在目增一感於茲閣客乃俯而歎曰

嗚呼起廢殊地悲歡異時數雖天定業乃人爲有始必
復靡終弗持先生實勤童子何知然嘗聞之矣談史絕
筆遷書繼成祐不作相旦終台衡故周貴述事孔稱楊
名先公官不及再命業不過一經存弓裘之舊物概堂
構之餘情今先生身歷霄漢步登蓬瀛文播海宇望隆
公卿固將修五鳳於天闕庇萬厦於蒼生彼美兮一閤
惡足以盡先生之經營他日志遂功成名完身退行藏
有時俯仰奚累知倦鳥之終還念閑鷗之可對春斯時
之未晚非此閣其焉賴蓋有詒盛業於諸孫播清風於
百代者矣先生曰然子其爲我識之于時簪纓並輝子
弟咸侍左京兆右太史趨秋官列貢士絃誦閒作觥籌
來駛客旣醉散鷗亦翔止先生獨居廓思方將合萬物
而一視也

長沙李東陽

慶榮壽賦

世所謂司嬾人之壽者非婺女邪予一日支頤假寐南
窗之下忽趾若騰雲肘若生羽飄飄乎凌太虛之九重
恍惚乎至於婺女之所須與青鸞前鵲綵鳳后翥中擁

一人狀如仙子委蛇而來杳不知其姓字子乃進而問曰仙子非所謂婺女邪茲非仙子所都之處邪仙子輒然而笑曰是也子因問之曰觀仙子之儀衛似有適也仙子曰君欲知子所適乎子將告君所適也粵維鏡溪之濱楊氏所宅楊氏有太孺人焉爰當茲晨宏開壽域故予往觀焉請得爲君悉之方夫壽域之開也靡東以西姻朋遠來寶文瓊章輝煒煒有攜孔殷有牽孔肥由是陳几席羅尊壘駢峯麟脯之肴交梨火棗之核雜然前列有斑陸離但見芝蘭玉樹繞膝盈階婀娜五采之衣澱澱九霞之杯孺人兀然中座白髮鬅鬢其容澤澤其樂怡怡當是時也正稱慶之交錯賀歡聲之載道笙管嗶嗶旌幢翩翩風雲爲之擁護龍虎爲之鄉導草木煥其光華山川燁燁其有耀告之者曰此天子封孺人之誥也孺人於是出迎道左百拜祇受翟冠戴之峩峩象服被之袞袞羗恩寵之旣加矧容貌之似茂由是賀客樂甚舉觴以進其一客曰於皇聖恩不降自初度之先不降自初度之後斯罕吾生之逢希天下之有者也旣而一客亦進曰積厚者報厚孺人之積厚矣此宜

有今日之報旣而一客復進曰孺人亦旣榮矣亦旣壽矣其始自今榮邪極鍾鼎矣壽邪極台者矣子時化爲白鶴飛旋左右每祝辭之載陳輒戛然而長聲叫觀之者咸謂爲孺人綿壽之徵久榮之兆也予曰異哉孺人誠何德以致此邪仙子曰噫嘻君未知孺人之爲孺人歟春樂先生善士也孺人以爲之父梅讀先生正人也孺人以爲之夫是其所以基乎榮壽者猶之大木樹屯乎鴻濛美稼穡植於膏腴也況其鸞鳳之子列仙之儒奪魁乎詞場藝苑高步乎金馬石渠文名響于天下碩

梅讀附錄 卷三

十四四明叢書

約圖刊本

學簡于帝知則其登孺人於榮壽者君試謂爲何如子方首肯其言欬然驚寤悵徙倚乎南窗見日輪之乍午天順五年辛巳八月上澣賜進士出身翰林編修南昌張元禎書

梅讀稿附錄卷四

幽光錄上

幽光集序

泉州倉副使贈翰林侍講學士四明楊公復之與其配張宜人先後以壽終士夫人能言者或狀其行或銘其墓或祭以文或輓以詩或哀以辭聯篇累牘不可勝選公之子維新類爲一帙題曰幽光集以宣同年故俾序其首簡嘗聞諸傳曰大上立德其次立功其次立言意謂言非士君子之所急也殊不知自當時而論之則德

梅讀附錄

卷四

一

四明叢書
約園刊本

修於己功著於人其視空言無施者似有閒矣自久遠而論之則德也功也非能言之士爲之表章烏能保其不沉沒耶以張中丞許睢陽之功烈不能不待於韓昌黎而段大尉之忠義不能不有賴於柳柳州也語云堯舜得孔子而其道益明顏淵附驥尾而其行益顯況下此者乎是則立德立功反有待於立言者也言其可少乎哉公自幼攻苦讀書志在推所學以覆庇斯民而困於下位守其道以終身未嘗屈於人人宜人脫去絀綺之習與公甘辛苦沒齒無怨尤雖鮑子都桓少君之高

風大節莫之或過似不待言而必傳矣然柳子不云信
人口語每每異辭日以滋久決必沉沒矧其他微言細
行人所不能盡知者非賴斯文以發揮之豈能保其盡
傳於後世耶人子之於父母無所不用其極是宜維新
之收拾靡遺者也維新與其弟維立先後發解兩浙入
官翰林文章之名隱然動天下其子茂元舉進士爲理
官一門榮盛世莫之比方來所就未有涯涘此皆公與
宜人遺澤之浸灌也異時史官立傳推本所由則必取
徵於斯集焉是爲序成化庚子季春初吉賜進士出身

梅讀附錄

卷四

二四明鼓書
約圖本

中憲大夫南京太常寺少卿前翰林院修撰右春坊右
庶子經筵講官同修國史安成劉宣序

明故泉州府倉副使楊君行狀

君諱自懲字復之姓楊氏四明鄞人也其先代有顯仕
曾大父輔道大父浩卿皆以德隱父九疇爲鄉鉅儒號
栖芸鄉人稱栖芸先生而不名母朱氏出邑右族生三
子長君也自幼穎敏好問學遵父母訓年十四能幹蠱
十六爲童子師於人事父母無違禮友愛二弟睦於宗
族鄉黨禮接諸賓客往來者且有雅量雖小人未嘗與

較所爲事一尸以禮而禍福委諸命橫逆至往往自反處困約妻子不見其有憂色人之急則如已事以赴之而施與無吝意又嘗舉藍田呂氏鄉約故事月一行之先是家故殷以役室遂罄然君克樹立稍振所作詩文有程度里之士夙望者聞其名折輩行與交宣德閒以易應鄉試不偶歸其邑宰胡敏強起君爲從事辭至再四不得已就之居數年以清慎聞心恆恐陷人於無辜死獄每求其可生不得則哀矜之人故稱爲楊佛邑有吳姓者爲勢家所誣令欲寘之死君力爭得免餘類是

梅讀附錄

卷四

三四明徵譜

約圖刊本

者甚衆君嘗曰吾活人多矣今雖一子後未艾也已而果得二子皆明敏人以爲陰隲之不爽焉正統庚申上吏部秋官郎中林厚延授諸子經辛酉甲子試京闈皆不偶乙丑秋滿考賜冠帶侍郎李公賁延如林禮明年以省歸凡親之沐浴浣濯及厠踰類事必身爲之君母嘗止之曰有婢僕可使也君曰此子職所當盡逮謁選授福之泉州倉副歎曰吾讀書將以行志也今志何能行旣而改曰孔子乘田委吏安爲之吾不安可乎旣抵官克素所履郡自守以下咸加愛禮景泰辛未屬德化

員缺郡檄君往攝而德化經閩盜鄧瘡痍之餘民莫底
定君招徠撫輯多歸業者事不加鞭笞而自完集以是
民悅之踰三月去還泉州不意以是歲十一月三日卒
于官享年五十有七邈君之生則洪武乙亥十二月五
日也君平生有遠志慨然以古人自期嘗欲立義田祠
堂義塾以勸俗不克遂其子守陳魁浙省解擢進士入
翰林爲庶吉士君示書曰吾志科第弗見錄今汝可謂
繼志矣又懇懇以忠義仁恕致君澤民之道爲勉君配
張氏有淑行子男三人長卽守陳次守陟守隰孫男一
撰

梅讀附錄

卷四

四四明叢書

約園刊本

故泉州府倉副使楊君墓誌銘

資善大夫太子少師兼戶部右侍郎翰林學士經筵官
前國子監祭酒泰和蕭鑑撰榮祿大夫少保兼太子太
傅工部尚書東閣大學士淮南高穀篆亞中大夫太僕

寺卿雲閒夏衡書

君姓楊氏諱自懋字復之四明鄞人自少讀書立行慨然欲有以自見于世年十六出爲里塾師刻意爲文辭下筆輒數百言立就率由程度當時自輩類咸推讓以爲不可及前進負夙望者往往折節與之交其聲藉甚閭里閒宣德中以易經應鄉試不偶歸歎曰是有命焉然不可遽已吾將利吾器以俟命邑宰聞其賢強召爲從事君避逃之宰怒執其家人鈎致君不聽將傳之罪君不得已就焉滿六載上京師雖客邸稍隙力學不厭

梅讀附錄

卷四

五四明藏書

約圖刊本

凡再試京闈再不偶授福之泉州倉副使忿曰勤苦讀書將以行吾志乃不意命之奇一至此乎少而悔曰乘田委吏孔子猶屑爲之敢不盡心乎在官僅一年以疾卒君家居孝其親友其弟昆其需選吏部歸省也二親尙無恙凡朝夕所以奉養承候之禮備至浣漱之細亦躬親之未嘗付之人孝友之行鄉邦稱之至今其爲邑從事清慎自持事必歸忠厚有吳甲者爲勢家所誣邑宰聽其屬必寘諸法君力爭得免邑人相傳以爲難然他所全活者尤多第君不以言人亦莫能盡知也在泉

州恪謹所事郡自守而下愛禮之屬德化令丞皆闕檄
君往攝焉當寇亂凋弊之餘能撫輯其民而事以完集
民大悅之踰數月還泉州君雖勤力效官然以不獲如
志恆悒悒不樂卒之時年五十七景泰辛未十一月三
日也娶張氏有淑行子男三長守陳浙江庚午鄉試第
一明年擢進士選翰林庶吉士次守陞孫一茂元
楊氏其先世有顯者曾祖輔道祖浩卿俱有隱德父九
疇業儒號栖芸人稱曰栖芸先生母朱氏君平生志科
目不遂常以爲恨比聞守陳登進士喜曰吾所爲慕科
名者非以微富貴求達吾道耳而不幸不能得吾兒乃
今得之復何憾耶君子於是知君之志所著有梅讀稿
大明律賦潛虛註若干卷藏於家至是守陳將歸奔喪
乃以其同官戚瀾所爲狀謁余泣請銘爲之銘曰
緊篤學以進取兮志胡弗酬士不振而趨冗兮噫將誰
尤心徒勤而事左兮命莫與謀幸有子而繼述兮抑又
何求我銘以慰君兮昭哉斯丘

楊司倉哀辭

憫幽蘭之猗猗兮託深谷以含芳處陰崖而自潔兮媚

春日之臨陽俯碧漪之涓涓兮振英華而再揚濯春風
于九畹兮竊獨懷此馨香播徽絃以詠歌兮結玄思之
孔長酌芳樽而延賞兮卻塵慮而弗將慘繁霜之夜零
兮紛雪霰之交飛黯溪山之岑寂兮頓消滅乎容輝奄
菸芭而謝榮兮倏藏秀而斂奇混蕭艾其不分兮又何
異乎江離歌梁折而孔萎兮賦懷沙以沉屈賀諧讎於
玉樓兮誼興疑於問鵬彼一聖而二賢兮卒淪胥以汨
沒視委化而澌盡兮又奚閒於人物彼蹉躑之永齡兮
卒何裨於秉彝也使施資其長年兮又何取於資世也

梅讀附錄 卷四

七四明雜書

一約園刊本

賢與哲雖云亡兮炳其德之允垂也蘭與菹雖云萎兮
藹其薰之遠遺也噫吁唏先生之處兮德美內溫先生
之出兮馨香外聞死生夜旦奚足悲兮所悲者斯文幸
詩書之遺澤尙未泯兮詭燁燁之芳蓀

都臺遺老慈谿張楷

輓詩

力學馳清譽傳家本義方居官安祿薄攝縣見才良浙
水歸魂杳閩山客路長九原殊足慰翰苑有賢郎

潔庵胡澆 禮部尚書

賢郎擢桂報泥金閩海俄從動訃音久爲司倉淹職守
暫因攝縣快民心庭闈綵服虛華侍道路銘旌返故林
無復小窗燈火夜研窮經史坐宵深

臨郡習嘉言詹事

兩試文衡樣不登久淹從事豈無能一官司庾知名未
千里蒙恩攝縣曾孝友不教張仲獨詩書儘許阿戎承
鳳毛棲只瑤臺上五色襲章著美稱

古吳陳鑑國子祭酒

雄文險句舊知名上國傳來目四明兩舉京闈無路入

梅讀附錄卷四

八四明叢書
一約園刊本

一官閩海有人迎西風忽動黎雲夢北客猶聞薤露聲
獨惜賢郎天上去麻衣奔訃淚如傾

東魯許彬太常卿兼學士

哲士今云沒鄉人惜老成飽諳天下事空擅世閒名民
感生前惠兒傳架上經清時有恩典指日到佳城

河東邢讓國子祭酒

早將經術戰秋闈兩蹶霜蹄眾所悲閩海一官淹驥足
賢科三甲付麟兒精魂已入槐安夢潛德惟留太史碑
最是不堪腸斷處高堂白髮淚雙垂

吉水劉儼學士諡文介

清時逢掖老司倉幾載棲遲倍自傷科第未能酬素志
箕裘應喜屬賢郎榮封正擬承恩早仙夢誰知入夜長
見說雙親逢暮景重泉遺恨想難忘

安成李紹禮部侍郎

倉曹生盛世曾不一露榮經學無人識科名有子成堂
封秋草合宰樹暮雲橫潛德應難泯誰爲有道銘

東海徐有貞大學士武功伯

早歲才猷著明時宦譜登家庭教自舉倉庾職堪勝親

梅讀附錄 卷四

九四明叢書
約園刊本

老供朝膳兒勤對夜鏡鳳雛方奮迅鵬鳥忽驚騰榮養
嗟何及哀思諒克承他時賤贈下始信顯揚能

永新劉定之侍郎兼學士

關西有遺裔博雅古君子學既有造詣行尤謹蹈履抱
藝不見售聲名著鄉里有司聞其賢曹事資佐理弊弊
文牘聞進學心未已兩舉竟失辭龍門未燒尾所尙益
自高不肯隨風靡一官領司倉殆非其志耳攝縣有猷
爲輿論共稱美庶幾展其略未足盡底裏有力爲推轂
大任立可俟吾亦有心哉惜乎今已矣

三山薩琦侍郎

四明有佳士夙負遠大期抱璞人罕識一命嗟奚卑司
倉職初試攝縣材僅施可憐攀桂手空老五經笥秀毓
丹鳳雛接翼翔盛時初飛冠百鳥來自澗水滙朝陽煇
瑞羽文采光陸離父志少云遂君恩行見推如何不一
載生死路已歧賀客方滿門弔閨復萃之訃聞到京國
子痛心何其哀哀感風木血淚盈天涯

東吳錢溥南京吏部尚書

鵬賦初成蝶夢迷泉南歸窺度鄞溪共嗟丹穴悲孤鳳

梅讀附錄卷四

十四明叢書
約園刊本

爭向玄堂奠隻雞劍影高秋飛碧落文光午夜徹青藜
一官曾攝花封政異績猶聞卓茂齊

雲間錢博按察使

微官纔小試大夢竟難醒花縣留賢譽梅軒想德馨傳
家無長物教子只遺經幽隴披黃處龍光煥日星

仁和汪諧禮部侍郎兼學士

聯城白壁價無憂志氣冲霄老未降百歲清儀今不忘
梅華雪月照西窗

雖然服鳥上承塵不學長沙泣楚臣蟬蛻飄飄離泥濁

清風留遺後來人

復之先生學行過人老而彌堅徘徊仕途竟得一司
倉有子登科已祿養而大故及之豈非命歟失此三
益既爲哀之復賦二絕以相餘哀云

仁和夏時三

大理
卿

遇得盤根錯節遲故教利器未曾施賢郎不屈青雲志
獻策先登白玉墀閩水有人懷惠政越山無處固歸期
雙親哭向空堂上添得蕭蕭兩鬢絲

江陰卞榮

戶部
郎中

梅讀附錄

卷四

十二四明叢書

約園刊本

學古位不顯其如造物何皇天終有意令子掇高科舊
業雲山在浮生歲月過可憐埋玉處霜老碧梧桐

草窗劉溥

太醫
院判

碩人觀化久遺恨不堪論花縣流風遠梅軒故業存文
章歸令子科第及諸孫獨有絲綸在揀揚荷主恩

錢唐倪岳

吏部
尙書

屈職如京可奈何牛刀小試政聲多雙親未受公家祿
一子先登進士科夢斷香山歸旅襯愁傷故友動哀歌
獨憐剡薦孤羣望無復天階振玉珂

同邑周濂

禮部郎中

厚積誰憐未盡施高風贏得後人思
梅軒三絕韋編在蘭室千年世澤遺
乘化未須論壽夭有官那復計崇卑
請看玉立風前樹葉葉先承雨露滋

丹山董越

南京工部尚書

蓋棺事定歎寥寥辜負平生志
九霄客裏襖還聞海遠梅邊魂逐朔風消
義方已見成賢子官況其如屈下僚
料得九原遺憾處二親堂上髮蕭蕭

莆田李庭修

梅讀附錄

卷四

十二四明叢書

新圖刊本

興味梅千樹生涯易數編宦情隨分樂
詩句有人傳緒業魁三榜光華慰百年
眼中誰得似泉石定欣然

豫章李士實

刑部侍郎

司庾泉南會計平花封攝政更馳聲
纔聞賢子陳三策何事遊魂奠兩楹
洗硯池邊芳草綠彈琴石上碧苔生
隴頭抔土新埋玉賴有詞垣太史銘

莆田楊瑛

編修

拜官小試入閩區未盡長才卽殞軀
不忍高堂垂鶴髮寧堪玉署泣鵝雛
牙籤緗帙芸空馥馬鬣青山草自蕪

墓石新銘鏤太史誰能讀罷不沾楮

豐城孫曰讓

半世攻書志未伸不知華髮早盈巾一官強就休言貴
斗祿雖沾亦是貧霄漢致身誇令子林泉怡老說巖親
可憐迢遞閩山外白玉樓成記已真

金湜

太僕寺丞

才大深嗟用世難若爲中歲遽凋殘一經遺教田何易
幾葉餘芳謝氏蘭花落梅軒春寂寂焰消黎火夜漫漫
鄞江怪底龍光起錦敕曾封侍從官

梅讀附錄

卷四

十三四明叢書

約園刊本

新昌俞欽

禮部侍郎

績學明經有俊才曾煩公府辟書來氣豪場屋文難售
官領司倉命可哀石建高風垂百世晉公佳兆協三槐
銘碑寧似瀧岡晚早有恩光照夜臺

雲閒周輿

翰林編修

一夜霜凋玉樹枝士林耆舊漸看稀才如柳惲詩偏好
官似東方俸甚微鶴弔空庭人已遠丹藏夜壑事都非
天涯遊子傷心劇血淚爛斑染素衣

會稽沈性

高堂一夕悲風起百歲靈椿竟先委凶訃遙馳萬里來
詞垣令子空哀毀君生自是名凋東盛時幾葉論亢宗
孝友肯爲當世重心懷直欲古人同青鐙黃卷平生願
白雪陽春時共羨桂殿芳期早擢科法曹何意先爲掾
辛勤十載功始收一官榮拜當泉州豈但充庾爲國計
尤聞攝縣慰民憂長途政擬超騰好二豎何因遽相惱
綵服哭殘層砌孤白頭愁殺雙親老迢迢旅襯故園歸
斷雲落日含淒悲也知不盡有餘福鳳毛留得生光輝
焚黃佇待恩榮至九京瞑目應無愧墓門石刻太史辭
潛德將垂千萬世

梅讀附錄

卷四

十四四明讀書

約園刊本

安成周必兆

御史

薄宦驅馳志未伸可憐回首一霑巾青山有石題新誌
白髮無依哭老親芳草夕陽江上塚落花寒食雨中春
賢郎客邸聞哀訃歸去惟看舊寫真

華陽曹冕

翔鸞集千仞驚鴻逸中洲高風逸難支至德孰與倚伊
人充下位經畫皆良猷賢哉魯委吏壯矣齊麥三纏身
厭圭組娛老營菟裘梅軒啓新構讀易發潛幽非惟究

玄理亦以爲貽謀翩翩雙彩鳳連飛瑞歧周爰有五色
雛鳴聲亦相儔惜哉桑榆景冉冉去不留靈椿殞朝露
芳蘭悴清秋山樊竟陳迹俯仰成前修白楊起悲風逝
水無還流惟看千載下竹帛垂芳休

山陰張以弘 參議

錦心老醉太古經玉粒忍淹當世英聲騰冰檠沸人耳
弗祿不永天不平流光閱世鷗輪轉倏斷琴書掩書卷
幸遺苞鳳毛翩翩五色文綾出金翦瀛洲縱步稱詞僊
薇垣小星黎火燃筆宣綸綉代黃閣袞補山蟲臨御筵
推恩曾封紫鸞誥存破門庭動光耀琢成國史螭首銘
鑿破玉花鬢耳竅叢梅雪落嗟無主飛來靈鶴傳人語
白楊風冷清明煙阿嗣歸啼淚如雨

東吳張習 郎中

梅讀羲經授子孫一門頻見奪魁元朝中昆五恩榮重
澗上衣冠德望尊連理一株培厚本鏡川千丈濬深源
哲人雖逝心無憾況復當時手澤存

東吳馬紹榮 少卿

蚤歲卽相親才華迥出羣一官初拜命千古竟修文花

塢闌春日松阡慘暮雲有兒能繼美昭代策華勳

徐悠

嗟嗟孤鳳凰噉噉鳴朝陽一身備九苞煥爛成文章振
翮出丹穴翩然遊帝鄉旋復適南國羣羽瞻輝光所志
不獲騁孰知中道亡哀哀雙瑞雛泣涕何徬徨睠彼梧
桐枝高岡鬱蒼蒼故山已埋玉使我增悲傷

徐奉

大樹始盛茂悲風忽成秋衰麻爲之感苑此終天愁行
行出南郊衰草滿林丘仰觀青山雲俯視長河流零淚

梅讀附錄

卷四

十六四明叢書

約園刊本

露衣裳白楊聲蕭蕭

句章章珍

小試青雲步俄驚玉樹萎家山東望遠旅禰北歸遲謾
憶生前事寧忘歿後思德崇先世澤心與古人期藝苑
推多學文場恨數奇高情三徑菊佳興一囊詩親老貧
猶樂官卑節不移龍泉變化驟足失驅馳齋志歸長
夜懷才負盛時塵編閒錦帙綠綺推朱絲馬鬣經秋慘
猿聲入夜悲芙蓉開別館蒼蘚翳新碑報國嗟無命昂
霄喜有兒推恩褒紫誥墓柏洽春熙

山陰陳端

梅讀先生去不回
梅花開遍鏡川隈
鳳雛運占秋闈首
鸞誥初褻翰苑才
芳草淡煙迷石逕
白楊寒雨暗泉臺
不堪倚棹門前過
雲斷山青猿嘯哀

鄭惟廣

清材未展玉含輝
薤露歌來淚灑衣
讞獄有心恩已霽
贈官將拜鶴先歸
過庭丹桂魁黃甲
入宦文章近紫微
孤負半生經濟術
漆鐙寒照夜臺扉

榮陽潘暄

梅讀附錄

卷四

十四明叢書

約園刊本

讀書萬卷慕科名
卻負蟾宮桂子榮
志士不堪乖始願
微官聊且寓高情
從來有路通霄漢
自是無人達聖明
夢躍龍門三月浪
心懸鳳閣九重城
醉斜烏帽看山色
高臥虛窗聽鳥聲
身外浮雲何足論
吟邊佳景許誰爭
茫茫世事同流水
杳杳仙魂入上清
華表令威歌未歇
青春蜀魄怨難平
洞前尙見桃花發
籬畔空多藥草生
人境至今傳勝槩
山靈終日護佳城
江湖才子收詩藁
館閣先登著墓銘
鸞誥追封應有待
鳳雛今已到蓬瀛

勾餘張瑤

才富科名拙官卑政有聞泉南方攝縣地下竟修文鶴
化閩天月猿啼鄖嶺雲鳳雛能繼述黃閣播清芬

慈谿翁禧

經歷

清時有味志多違塵滿新豐舊客衣歲月銷磨雙鬢短
乾坤偃蹇一官微河東獻賦人誰引越上招魂鶴自歸
卻喜鳳雛成五色瀛洲僊路正聯飛

吳興唐寅

無媒徑路杳茫茫榮辱升沉付彼蒼幾度荆門空泣玉
一朝晉水竟司倉關山迢遞歸無日志業因循鬢有霜
纔向花封施惠澤豈期桂瘿入膏盲宦情贏得詩千首
往事翻成夢一場朝士不須歌薤露邑人應自頌甘棠
玉堂孤子初聞訃錦里雙親已斷腸旅襯遠辭閩海外
佳城新卜鄖山陽百年身世多潛德千載貞珉有耿光
吟就些詞何處弔天涯南望獨心傷

慈谿張麟

先生讀易梅華下竟爾幽明隔死生惆悵章編春寂寞
淒涼鄰篴淚縱橫百年心事閤金鼎八極神遊可玉京
愛爾家聲舊清白瓊林丹桂又聯榮

嘉禾周鼎

梅頭附錄

卷四

十九
四明叢書
約園刊本

梅讀附錄卷四

梅讀稿附錄卷五

幽光錄下

敕封楊太孺人行狀

太孺人諱素綸姓張氏世居鄞之櫟社號九世簪纓之家曾祖 祖 皆不仕父侍宗攻書善詩號春樂先生有春樂詩稿藏于家母鄒氏太孺人少敏慧烹飪翦製之事一學輒過人遠甚性婉孌寡笑言志識高遠春樂異而愛之曰是不可以與凡士鄞人議姻重世族時舊家子姓鮮有當春樂意者一日見少年美秀而文

梅讀附錄 卷五

一四明叢書
約園刊本

詢之則鏡川楊栖雲先生冢子名自懲後官泉州倉副使贈翰林編修號梅讀先生者也春樂奇之旣而楊請問名姻族交諫曰是雖舊家大族柰其貧何他日春樂過鏡川人指栖芸之屋曰此弊屋僅三閒空如懸磬柰何欲女之春樂曰世有才如楊氏子而終窮者乎或語太孺人曰汝父陷汝於貧家將終身不任困苦盍訴之母猶可止也太孺人恬然無言春樂聞之曰吾固知吾女志識不凡卒歸梅讀繼祖姑且病栖芸與其配御家嚴宗族繁庶僕傭悍驕太孺人奉上接下動皆有禮

且治生勤儉至躬操井臼不辭衽芸喜曰吾家其昌矣
居數月不任勞苦然未始愠于色辭或慰之輒曰吾聞
家尊嘗言孟德耀與桓少君之行矣吾固安之時家纔
有田數畝園數十畦梅讀方隆養祭卹鄰族廣延師友
賓客貲不能給太孺人紡績爲布帛鬻之又綴白華草
爲帽幣之又取其珠翠金銀綺縞組繡之物鬻之貲用
日裕田園日增然德行不改其初二姒入門皆仰而師
之姻族亦傳以爲法梅讀後應鄉舉不利被逼掾於邑
太孺人從之居每得一珍味必先寄奉其舅姑家去邑

梅讀附錄

卷五

二四明叢書

約園刊本

三十里度其寄至舅姑食矣迺始與梅讀嘗焉其孝多
類此梅讀滿考入京家遭頻歲凶荒莫能給太孺人取
金繡之屬質之人以貸穀又鬻其二以供旨甘其于
今爲侍講學士號鏡川先生名守陳者出游學太孺人
復脫兩銀簪資之鏡川惜不取太孺人曰吾無用此矣
願汝力學以成而父之志幸而得遂可償我以鳳冠霞
帔此安足惜然汝嘗宜存惜簪之念學則勤苦必成則
清白無玷可矣鏡川幼多病屢瀕危險弱不能勝衣太
孺人保養之百方多人所不能者後鏡川發解居第一

將赴禮部太孺人聞途多寇竊密以銀數餅縫之短襖
之著中濱行始告無何梅讀在泉州卒鏡川時已登第
爲翰林庶吉士歸守制栖芸與其配繼喪然猶三世同
居內外數百指皆太孺人統之井如也鏡川服闋赴選
太孺人語之曰事必循乎理命皆聽乎天德行文學必
視在前者而思進富貴利達則視在後者而思退此汝
父之所怕言者也汝其念之勿忘吾無他訓矣鏡川拜
翰林編修滿考推恩封太孺人居數載仲子守陟號碧
川者亦居鄉選第一又數歲長孫茂元鄉選第五太孺
人樂之鏡川選洗馬告歸省明年太孺人壽七十其誕
辰八月十六日也是月之初天淫雨太孺人病且危居
數日雨止病痊自藩臬府衛而下來上壽者雕鞍畫舫
彌旬不絕于路里人以爲榮又數載季子守隰卒憂傷
之甚發引慟哭遂病臥踰十日竟卒成化十年十一月
十五日也壽七十有五子男三卽守陳守陟守隰孫男
六茂元茂貞茂仁茂禮茂行茂勤曾孫男一卜以卒之
明年 月 日啓梅讀之穴而合葬焉其地則里之和
嘉阜也惟寒門於楊氏累世通家而鎰嘗受學於鏡川

先生故太孺人行實知之甚悉謹狀賜進士兵科右給事中同邑契家生章鎰書

贈翰林院編修楊公夫人張氏墓誌銘

賜進士出身翰林院侍讀學士奉直大夫經筵官兼修國史安成彭華撰賜進士出身翰林院學士奉政大夫經筵官兼修國史錢唐王獻篆徵仕郎中書舍人直文淵閣蘭谿郭時頤書

張氏諱素綸鄞世家處士侍宗之子泉州府倉副使贈翰林編修同邑楊公諱自懲之夫人也以成化十年十

梅讀附錄 卷五

四四明叢書
約園刊本

一月十五日卒于家夫人享年七十有五其伯子守陳與其仲守陞先後發解浙江俱第一蔚然以文學名天下而守陳登進士入翰林歷遷侍講學士夫人享榮養受褒封久之迺奄然以其壽終訃聞天子特賜之祭蓋異數也於是其孫茂元會試中魁選占進士上第凡縉紳士夫莫不歎慕以爲夫人之福之隆所以全躬而兼後者可謂備矣夫五福本乎德德盛者福隆楊夫人蓋兼有之夫人性穎敏有材識善籌度事理於女工一習輒能而慎重寡言笑自幼爲處士所鍾愛曰是必不與

凡子已而奇編修公許以妻之或告夫人曰楊雖故族如其貧何盍訴之母猶可及止否則恐終身勞苦不任夫人恬然不應處士聞之笑曰吾固知此女志識不凡卒歸于楊歸時繼祖姑薨且病舅姑嚴編修公方隆養祭喜賓客而四壁蕭然田僅數畝圃纔數十畦庸作往往惰弛不率夫人上承旁接下指使咸節適而躬自儉勤至親操井臼不厭且日夜治絲枲爲布帛綴白華草爲帽鶯之以佐費用田園亦稍增編修公迫於官爲縣掾夫人從之居得一珍味不敢專必馳獻舅姑度舅姑食乃食公上京師遭歲惡食艱數貨奩中物以供甘旨無難色子守陳長出游學亦脫簪珥資之子惜不取曰願汝力學以成而父之志異日或可償我以翟冠霞帔此安足惜及子登第無何時而公卒官舅姑又相繼沒二叔尙同爨家日益繁夫人治喪御家井井有法子服闋之官丁寧舉公之訓以訓曰文行視在前者而思進富貴必視在後者而知足此汝父之恆言念之毋忘居四年以子編修績最封太孺人又九年年七十矣子自洗馬歸省誕日稱壽適久雨新霽夫人亦臥病頓愈自

藩臬府衛而下文僚武吏雜沓來獻觴者彌旬不止里人榮之每舉酒壽其親必以夫人爲祝夫人三子其季守隰先數月卒六孫長卽茂元次茂貞茂仁茂禮茂行茂勤一曾孫尙幼葬以卒之明年 月 日耐于里之和嘉阜編修公墓夫人行應銘華與守陳爲僚友銘宜於我乎屬爲之銘曰

家之昌大自闈門始於嘉夫人有德有祉其德維何勤儉順慈上承下誨慶則有貽其祉維何榮祿考終生封沒祭恩則有隆從公于藏和嘉之阜我銘昭之以規女

梅讀附錄

卷五

六四明叢書

約園刊本

婦

輓詩

勤苦成家訓子孫眼看次第躍龍門旨甘正喜榮三釜精爽俄驚隔九原昔日襄封曾拜命于今諭祭復承恩良人同笠牛眠處辛木蕭蕭泣莫猿

俞欽

禮部侍郎

九世簪纓胄來歸積善門掇魁誇二子衍慶愛諸孫懿行聞天下殊恩感至尊珮環歸去後鏡水亦聲吞

屠滿

吏部尚書

機社晉纓裔來嬪清白門尊章安壽考孝敬極晨昏君
子逮賢淑宗嫻無閒言中與家益裕慈訓德彌敦庭砌
蘭爭秀雲衢鳳並鸞畫堂分祿養紫誥渙天恩機杼聲
初歇栝棧澤尙存斗南星失婺堂北草迷萱弔鶴秋空
杳啼鳥晚樹繁平生餘謫館直筆屬詞垣卹典頒侵數
光華慰九原

盱江左贊

浙江參政

風雨摧慈竹飄零向此時九原那可作三釜遠如遺白
髮封恩久高堂返夢遲鳳毛奔莫遠寂寞真泪靈垂

錢唐倪岳

吏部尙書

梅讀附錄

卷五

七

四明叢書約圖刊本

堂下兩兒子江東二解元文辭應瀚海慶澤信淵源疎
鬢秋空薄深恩暮境繁鏡湖風雨夜回首斷人魂

豫章李士實

刑部侍郎

動地淒風晚色寒訃音忽報五雲邊可憐金馬登庸日
不是斑衣戲舞年茆屋春深歸舊燕垂楊日暮泣新蟬
翰林牘有招魂些潛德無慙孟母賢

郡人劉洪

參政

逝川赴滄海頽陽逼高春物運有遷易壽命寧無終懿
哉淑人德蔚爲九族宗班姑才與並孟母迹可同奄忽

赴窻多時不懷德容良辰輒采蘋中饋乏尸饔蘭砌塗
朝霜蕙帷悲夕風有子翰苑英儒流共推崇揭來陟華
要聞訃愁無窮鵠文表柔嘉庶以展孤衷體魄雖云化
淑聞期永隆

山陰張以弘

參議

白髮今何在瑤池鳥不來織機閒夜月几杖上春苔
鶴凌空化慈鳥繞樹哀獨能留鏡行終不闕泉臺

莆田楊瓚

郎中

赤堇山頭寶婺沉閨門無復著徽音一函封誥絲綸在

梅讀附錄

卷五

八四明叢書
約園刊本

半畝玄堂草樹深終養未酬哀子願表儀偏繫族人心
生芻欲致天南北楚些歌殘思不禁

錫山陳賓

布政使

相夫教子總承恩婦道端良母道尊清白家聲今似昔
詩書世慶子傳孫泉鄉一旦音容隔閨闈千年內則存
愧我辱知賢主器小詩聊擬續招魂

戈陽黃溥

按察使

楊家鶴髮太夫人小住乾坤八十春人借鵲巢歌懿德
天將麟趾報清貧夜堂有恨烏啼樹寒澗無香月照蘋

想象西風環珮遠瓊樓千尺倚秋旻

宜興邵珪 郎中

內相功成兩鬢霜
大家人物自非常
孤鐙婺緯生前操
一代恩封地下光
南澗蘋蘩荒暮雨
北堂蘭桂藹春陽
千年往事眞成恨
江水東流日夜長

雲間曹時中 刑部員外郎

貞淑宜室家孝敬奉尊嫜
所天不終養孀居謹蒸嘗
福善必昌後有子雙鳳凰
九苞絢五采盛世呈禎祥
文風播翰林忠誠動巖廊
御祭頒內廷門戶生輝光
爲母孰不死爲兒心自傷
執紼引輓車送送登周行
回看兩白鶴弔彼丘壠傍

梅讀附錄 卷五

九四明叢書
約圖刊本

句章徐奉

高堂垂白淨無瑕
一夢瑤池路轉賒
曾相藁砧榮宦道
惟餘聯璧瑞皇家
錦機停織閑孤月
金誥重褒絢五華
不獨邦人哀令德
葭莩椿悵海天涯

薛穰 州

七旬有五旬孀軌
籠閨門性行莊
昔奉舅姑崇孝敬
時思宗祖致烝嘗
奩裝助乏無私蓄
簪珥資勤有義方

兩嗣解元名甚著一孫經冠訓尤彰恩榮屢被來金殿
祿養恆膺白玉堂鸞救天章功德報翟冠霞帔願懷償
宜躋壽考加封號遽作仙遊謝寵光蘭砌那仍觀綵服
桂庭寧復飲瓊觴歌休錦里感懷惻計達綸闈倍痛傷
御賜祭儀承數異大襄葬事合經常翩翩飛旆翻涼吹
鬱鬱佳城鎖夕陽忍聽哀猿頻哽咽愁看弔鶴謾翱翔
應知道贈焚黃處紫誥輝昭馬鬣岡

臧汝服 知縣

嗚呼此楊氏幽光集也其子維新授越而誦之一誦而

梅讀附錄 卷五

十四明叢書

約園刊本

喜再誦而悲一喜一悲皆情之不能已也緬思景泰辛
未春越與維新忝同甲榜是歲冬維新之父梅讀先生
沒母氏存焉暨入翰林爲編修官推恩之典曠及存沒
距今成化甲午先生沒二十有六年維新已爲學士母
氏夫人始沒凡朝野卿士名能文與詩者掄揚哀悼之
辭聯珠疊玉後先相映充溢汗簡維新萃爲一集名曰
幽光先德之詳開卷在目九泉雖幽而光照千古矣況
維新與弟守陟鄉選皆第一從弟守隨拜官御史子茂
元亦登進士第一家三世袍笏滿門此非獨幽者有光

又斯文之光天下之光也越與知未胡爲乎而不喜若
越者自承乏憲臺東奔西馳未嘗一日安處其位俛仰
維新眞在天上且生無同胞形影相續厥大愚癡不解
世故視維新父子兄弟聯翩顯達不覺愧歎二親沒世
迫於王事倉卒稿葬至于今尙無片石以載墓表白楊
蕭蕭半供樵者之斧斤歲時不能持杯酒以酌墳土弔
挽有詞不遑修輯每一興懷有淚如雨獲誦此集胡爲
乎而不悲悲喜之餘謹題數語俾後之讀幽光集者或
感于情樂而喜哀而悲庶有以會越之心成化乙未三
月十有九日太子少保兼左都御史黎陽王越題

梅讀附錄

卷五

十二四明叢書

約園刊本

贈南京吏部右侍郎先府君神道碑

先君之沒翰林編修戚公瀾狀其行而太子少師兼戶
部侍郎翰林學士蕭公鑑誌其墓及先夫入合葬翰林
侍讀學士彭公華又爲之誌皆藏之墓中矣今先君與
先大夫蒙恩賜誥加贈三品例得立神道碑以昭于其
外守陞哀不能文敢據三公之所述而補其所未備者
以勒于碑先君諱自懲字復之姓楊氏四明鄞人曾祖
諱輔道祖諱浩卿皆有隱德考諱範字九疇德學高古

爲時名儒世稱栖芸先生贈通議大夫南京吏部右侍郎妣朱氏有賢行贈淑人先君生有異質長身而修髯言動有則人望之知爲君子蚤受庭訓得詩之敦厚書之疏通易之精微以充其德學發而爲文章炳如也宣德閒以易應鄉舉有聲邑大夫辟知名士掌書記先君避不屑就鈞跂之黽勉從事不廢經業正統五年上京師辛酉甲子兩科應順天府鄉試俱不偶隨例積功勞入仕版謁告歸省二親尙無恙孝養備至雖浣濯廁牕必躬親之曰此子職也十四年行取上京其秋北虜犯邊駕將親征草疏大略言兵凶器戰危事萬乘之重不宜輕舉惟明信賞罰以馭將士之用命與不用命者則虜不足平也知者難之八月土木失律十月虜犯京師先君目擊時事忠憤痛切爲詠史集句詩二十章識者以爲長歌之哀過於慟哭者也景泰元年授福建泉州府倉副使初抵任奉府檄監押重囚十數人于按察司論決押者慮囚之道亡也請碎其脛先君曰彼所犯法惟應一死耳不宜非法虐之且審錄之際或有可生之路今虐之因而致死是法未必死而虐之以死也不死

亦爲廢人矣法未必死而致之死無廢疾而使爲廢人
吾不忍爲也惟謹護之而已有一囚過其里門泣訴家
有母老且病乞一永訣先君哀而許之囚既與其母訣
鄉鄰遂欲篡之囚曰死自吾分得一見母死無恨矣敢
以是累楊罷邪閩人謂參爲罷時防守亦嚴衆莫敢動
按察諸公聞而勞之時文懿公初發解適鄉書至閩諸
公問曰今科浙省解元楊某爾知之乎先君曰吾子也
諸公驚起禮貌之居官綽有餘裕監司才之檄署德化
縣事縣經鄧寇兵燹之餘雖簿書政令亦無統紀先君
手爲條教吏受成書之招連亡撫凋察寬征役杜侵漁
三月境內大治又奉檄帥永春縣民兵討餘寇先君張
聲威揭榜諭之自歸者貸罪怙終者必誅不踰月而賊
平代歸之日二邑吏民感泣攀送填道相屬既還泉州
時文懿公已舉進士改翰林庶吉士先君喜曰吾平生
有志科第非以徼利達欲爲行道之階耳今吾見階此
以進道其可行乎故每以行道顯親致君澤民之事勉
之其常誨弟子必曰順理行將去從天付命來又曰德
業文章必視在前者而思歧及富貴利達必視在後者

而知止足聞者以爲格言罔不欽服不幸以疾卒于官年纔五十有七耳夫人諱素綸姓張氏春樂先生諱侍宗之女春樂善吟詠有才識以夫人德與工容皆超異不以與凡子因先君問名輒許之曰此正佳婿也夫人既歸逮事繼祖姑并事舅姑皆以孝謹稱相先君能輔以義然始終未嘗從宦以舅姑老常留侍養也比先君喪還撫棺大慟曰君顧父母之養命我不隨任孝也我從君之命欲成君之孝亦順也子孝婦順而神不我祐奈何乎天聞者哀之夫人終養舅姑喪祭以禮教育子

梅讀附錄 卷五

十四 四明披書
約園刊本

姓宦學有成始而家道中衰繼而振起終而祿養貶封家日昌大而夫人處之一恭慎儉勤有恆德也年七十有五以卒後先君之卒二十有三年先後卒葬歲月已各具行狀墓誌矣子三人長守陳吏部右侍郎兼詹事府府丞贈吏部尚書卽文懿公也次卽守陞次守隰舉經明行修不就先夫人卒孫男八長茂元安慶府知府次茂貞次茂仁四川按察司副使茂禮茂行茂清國子生茂深茂潛孫女三長茂英適御史陸偁次茂華適義官陳瑛茂荆適儒士黃文瑞曾孫男十五長美珩次美

璜國子生美瑒美瑤美弁美冕美珣美緹美琮美紘美
□餘未名先君沒後以文懿公貴贈翰林院編修進侍
講學士今以守陞推恩贈南京吏部右侍郎夫人封
太孺人沒贈宜人加贈淑人先君贈侍郎之制有曰博
涉經書惇行孝弟官資不滿其平生義訓遂成乎二子
後先相望佐銓部于兩京存歿攸同進恩封於三品大
哉王言足以發潛德之幽光矣唐燕公張說自撰其先
府君神道碑謂莫假詞於他者務傳信於我也然非燕
詩大筆孰能無假詞哉守陞年十六七從宦泉州天傾
信也銘曰

梅讀附錄

卷五

五

四明叢書
約園刊本

地壤珠方獨哭先德雅行皆罔聞知獨泉州之事知之
爲詳而其他不免假三公之辭惟補其所未備耳謹擬
制詞之所褒者以侈於墓道然不敢誣不敢諛亦務傳
荆山之璞可圭可璋玉工不識厥足用傷鄧林之材可
棟可梁匠斲小之以爲楸枋聖如仲尼始爲委吏天不
假年孰識其至漢有倉公曰淳于意有女無男名亦傳
世嗟我先君道德純備良玉美材用世之具三獻不收
一階少試兆足以行命不可俟百不一施九泉質志繼

之述之惟我文懿守陞不肖父兄自愧無能顯親以永
終譽惟我先君暨先夫人潛德幽光自不可湮三朝錫
命輝耀日新俾彼神道有碑維珉燕許大筆疇能比倫
小子狂簡惟質勝文紀實傳信於千萬春弘治十八年
歲次乙丑六月初九日男通議大夫南京吏部左侍郎
守陞撰

梅讀附錄

卷五

士大
四明叢書

約園刊本

梅讀附錄卷五

四明叢書

四明叢書
約園刊本